

সুখের আড়াল

এক

শেষ ক্লাশটা সেরে জগন্নাথ করিডোর দিয়ে স্টাফ-রুমের দিকে ফিরছিল। দূর থেকেই দেখল বারান্দার রেলিঙে ঠেস দিয়ে এক অদ্ভুত মূর্তি দাঁড়িয়ে আছে। পরনে আধময়লা হ্যান্ডনুমের চেক শার্ট, খাকি প্যান্ট, কাঁখে রুক-স্যাক্, একগাল দাড়ি। একটু কাছে আসতেই স্লথ গতিতে সোজা হয়ে দাঁড়িয়ে হাসল, বলল—হ্যালো। একটু চমকে গিয়েছিল সে, পরমুহূর্তেই হেসে ফেলল। বলল— অপদার্থ। কোথা থেকে ফিরলি ?

অরিজিৎ হাসিমুখে তাকিয়েছিল জগন্নাথের দিকে। একটু চূপ করে থেকে বলল— তোর জন্য প্রায় চল্লিশ মিনিট দাঁড়িয়ে আছি।

—দাঁড়িয়ে কেন ? জগন্নাথ জ্ব কুঁচকে বলে, স্টাফ-রুমে বসলেই তো পারতিস !

চোখ বিস্ফারিত করে নিজের দিকে আঙুল দেখিয়ে অরিজিৎ বলে— এই বেশে ?

ওর বাড়িয়ে দেওয়া হাতটা টেনে নিয়ে সামান্য একটু চাপ দিয়েই ছেড়ে দেয় সে— আজই ফিরলি ?

—এইমাত্র। হাওড়া স্টেশন থেকে সোজা আসছি, মালপত্র স্টেশনে জমা রেখে। বলে হাসল অরিজিৎ— ফিরছি অমরনাথ থেকে।

একটু অনামনস্ক দেখাচ্ছিল জগন্নাথকে, জ্ব সামান্য কোঁচকানো, বলল— বাড়ীতে ঘাসনি ?

—যাব। অরিজিৎ জগন্নাথের কাঁধের দিকে হাত বাড়িয়েছিল, কি ভেবে হাতটা টেনে নিয়ে বলল— অনেক কথা আছে। এখন আর ক্লাশ আছে তোর ?

—না। জগন্নাথ মাথা নাড়ে। অরিজিৎের দিকে খানিকক্ষণ শূন্য চোখে চেয়ে থেকে হঠাৎ বলে—কোথায় কোথায় ঘুরে বেড়াস এখানে ? বয়স হয়নি তোর ?

—মা-মাসীর মতো কথা বলছি। একটু থেমে থেকে বলল— এখানে কথা হয় না। তোর ছাত্ররা ঘুরছে চারদিকে; আমাকে বার বার ক'রে দেখে যাচ্ছিল সবাই। তার চেয়ে চল্ বেরিয়ে পড়ি।

—চল! বলে একটু থমকে গেল জগন্নাথ—কিন্তু অতদূর থেকে ফিরলি, তোর টায়ার্ড লাগছে না?

—দূর! আবার হাসল অরিজিৎ। দুজনে পাশাপাশি হাঁটতে লাগল। জগন্নাথ আগেও দেখেছে, এখনো লক্ষ্য করল অরিজিতের হাঁটার ধরনটা আলাদা। বেশ রোগা অরিজিৎ, মাথায় অনেকটা লম্বা, কোলকুঁজো। হাঁটার সময় আরো ঝুঁকে পড়ে দীর্ঘ পদক্ষেপে হাঁটে, প্রায় নিঃশব্দে খুব দ্রুত-বেগে হাঁটতে পারে। সে সময় কেমন একটা আক্ৰোশ আর আক্রমণের ভঙ্গী ফুটে ওঠে ওর শরীরে। অনেকদিন ধরে হাঁটছে অরিজিৎ, ঘুরে বেড়াচ্ছে পাহাড়ে, সমুদ্রে, অরণ্যে। রোদে পুড়ে ওর মুখ আর হাতের চামড়ার রঙ বাদামী, কিন্তু জামা খুললে ওর শ্বেত পাথরের মতো শরীর দেখা যায়। কেমন পাকিয়ে গেছে শরীর, মুখ আরো শ্রীহীন হয়েছে, তবু জগন্নাথ জানে ওর শরীর পালকের মতো হালকা, চিতাবাঘের মতো ক্ষমতাসম্পন্ন, অসম্ভব সহনশীল।

নিঃশব্দে হেঁটে দুজনে কলেজের বাইরে বড় রাস্তায় এসে দাঁড়াল। হাওয়া দিচ্ছে খুব। জগন্নাথের পাঞ্জাবী ফুরফুর করে উড়ছিল। অরিজিৎ হাঁ করে বড় নিঃশ্বাস ফেলল—কলকাতায় এসে গরম লাগছে খুব। কোন দিকে যাওয়া যায় বলতো!

—সে তোকে ভাবতে হবে না। জগন্নাথ ঙ্গ কুঁচকে বলল। খালি ট্যান্ডির জন্য রাস্তার এদিক ওদিক তাকাচ্ছিল সে।

—কি খুঁজছিস? অরিজিৎ প্রশ্ন করে।

—ট্যান্ডি।

—কি হবে।

—যা চেহারা করেছ—জগন্নাথ দাঁতে দাঁত চেপে বলে—তোমার সঙ্গে ট্রামে বাসে ওঠা যায় না।

—ঠিক কথা। অরিজিৎ হাসে—কিন্তু নিয়ে যাবি কোথায়? তোর বাসায়?

—নয় কেন?

—দূর! অরিজিৎ চাপা গলায় বলে—তোর নতুন বৌ আমাকে দেখে ভয় পেয়ে যাবে। এ পোশাকে নয়, একটু ভদ্রস্থ হয়ে নি আগে, তারপর যাওয়া যাবে।

কথাটা ভেবে দেখল জগন্নাথ, তারপর হেসে ফেলে বলে—খুব মন্দ বলসনি। আমিও প্রথমটায় ঘাবড়ে গিয়েছিলাম। তবু চল তো, তোকে দিয়ে একটা ‘শক্’ দেওয়া যাক ওকে।

—না ভাই। গত জেড় করে অরিজিৎ, এ দানটা ছেড়ে দে।

—ঙ্গ কুঁচকে জগন্নাথ বলে—তবে কোন দিকে যাবি, অপদার্থ?

অরিজিৎ কপালের ঘাম হাত দিয়ে মুছে বলল—কোথাও গিয়ে বঁসা যাক।

—কোথায়! রেস্টুরেন্টে?

—দূর!

—তাহলে?

একটু ভেবে নিয়ে অরিজিৎ বলল—ময়দানের দিকে চল। ফাঁকা মাঠ আছে, গাছতলায় বসলে গঙ্গার হাওয়া লাগবে।

জগন্নাথ অরিজিতের দিকে চোখ ছোট করে তাকাল—বাস্তবিক, এতদূর ট্রেন জার্নি করে টায়ার্ড লাগছে না তোর? আমার তো চারটে ক্লাশ করলে হাঁক ধরে যায়।

—ট্রাম আসছে। এই বলে—অরিজিৎ লম্বা হাত বাড়িয়ে জগন্নাথের একটা হাত শক্ত করে ধরল—আয়। চমকে উঠল জগন্নাথ, অরিজিতের হাতটা খরখর করে কাঁপছে। পরমুহূর্তেই ছেড়ে দিল।

টার্মিনাসে ট্রাম থামতে নেমে পড়ল দু’জন। এলোমেলো হাওয়া দিচ্ছে, শরতের রোদ নিস্তেজ। ভাল লাগছিল জগন্নাথের। বলল—এমন হুট করে আসিস আর চলে যাস যে তোর তাল পাওয়া যায় না।

—এই তো ভাল। বলতে বলতে পকেট থেকে একটা রোদ-চশমা বের করে চোখে পরে নিল অরিজিৎ। সঙ্গে সঙ্গে ভুতুড়ে হয়ে গেল ওর মুখ। সম্পূর্ণ অচেনা। বলল—চোখটা ট্রাবল্ দিচ্ছে, বুঝলি! সন্দেহ হয়, বুড়ো হয়ে যাচ্ছি না তো। বলে হাসল।

বহুদূর পর্যন্ত দেখা যাচ্ছে, খোলা ময়দান, যতদূর চোখ যায় সর্বত্রই ছড়িয়ে ছিটিয়ে রয়েছে মানুষ। এখানে কি করছে এরা তা জগন্নাথ ভেবে পায় না। অভ্যাসবশতঃ জোরে হাঁটছিল অরিজিৎ, তাল রাখতে গিয়ে জগন্নাথ ক্রমশঃ অনুভব করে যে তার হাঁক ধরে যাচ্ছে। তাই হঠাৎ থমকে দাঁড়িয়ে গেল সে, অরিজিৎ এগিয়ে গিয়েছিল, মুখ ফিরিয়ে নিল—

কি হল রে?

—কিছু না। জগন্নাথ একটা শ্বাস ফেলে বলে— এত জোরে হাঁটছি কেন?

—অভ্যেস।

—আমি পারি না।

—তোমার সুখের শরীর। বলে হাসল অরিজিৎ— বিয়ে করে আরো ট্যাপসা হয়ে গেছিস। বলতে বলতে কাছে এসে দাঁড়িয়ে দু হাত ওপরে ছুঁড়ে বলল—অনেকদিন পর বড় ভাল লাগছে।

—কি?

—এই আকাশ, বাতাস, মাটি, মনুমেন্ট—এই সব আর কি! তোকেও। জগন্নাথ স্থির হয়ে দাঁড়িয়ে রইল অরিজিতের মুখের দিকে চেয়ে। অস্পষ্ট ভাবে সে একটা কিছুর টের পাচ্ছিল। এর আগেও বাইরে গেছে, ফিরে এসেছে অরিজিৎ, দেখা করেছে জগন্নাথের সঙ্গে। কিন্তু এখন সে কোথায় যেন অরিজিতের জঙ্ঘুরের আভাস পাচ্ছিল। বাইরে থেকে বোঝা যায় না, কিন্তু নিশ্চিত কোথাও অসঙ্গতি রয়েছে। জগন্নাথ আস্তে আস্তে বলল— কি কথা ছিল তোর যার জন্য এতদূর টেনে আনলি?

—কথা! স্নায়ুতন্ত্রীর বিকার থেকে যে ভাবে হাসে লোকে সেভাবে হঠাৎ হাসল অরিজিৎ, গভীর শ্বাস টেনে বলল—আমি বুড়া হয়ে যাচ্ছি।

মরা আলোর পশ্চিম আকাশের দিকে পিছন ফিরে অরিজিৎ দাঁড়িয়েছিল। অদূরেই সূর্য অস্ত যাচ্ছে, এ পাশ থেকে ওর মুখ দেখাচ্ছিল কালো ব্রোঞ্জ গঠিত। কাঁধে রুক-স্যাক, পায়ে নোংরা বিবর্ণ হ্যান্ডিং বুট, কাপড়, জামা ময়লা, গালে দাড়ি, বড়ো বড়ো চুল কপাল ছেয়ে আছে— দীর্ঘ পথ অতিক্রমের সমস্ত চিহ্ন রয়েছে তার চেহারা, তবু জগন্নাথের মনে হল সদ্য গ্রীনরুম থেকে বেরিয়ে এসেছে অরিজিৎ, খোলা মাঠে ভীড়ের মধ্যে হঠাৎ ভাঁড়ের মতো দেখাচ্ছে তাকে। জগন্নাথ আস্তে আস্তে বলল—তোমার বয়স তো দু বছর করে বাড়ছে না!

তেমনি নির্বিকার থেকেই যেন হাসল অরিজিৎ। একটা গোপন কিছু ঢাকা দেওয়ার জন্যই যেন তাড়াতাড়ি বলল—আমার নার্ভগুলো বোধহয় নষ্ট হয়ে গেছে, অল্পেই শরীর ঘন কাঁপতে থাকে। বেনারসে ভয়ঙ্কর পেটের ব্যথায় পড়েছিলাম কিছুদিন। সেই থেকেই দেখছি—

জগন্নাথ হাসল, নিশ্চিন্ত হাসি। বলল—আর কোনো কথা ছিল না তোরা।

মাথা নাড়ে অরিজিৎ। না। কিন্তু তার মুখ দেখে জগন্নাথের মনে হল ভয়ঙ্কর এক ধরনের অস্থিরতা চেপে রাখতে গিয়ে কষ্ট হচ্ছে ওর। বড় বেদনার্ত দেখাল ওর মুখ। একটু আগে যার সঙ্গে ট্রাম থেকে নামল এ সে অরিজিৎ নয়। জগন্নাথ বলল— আমার সঙ্গে আয়।

একটু ইতস্ততঃ করল অরিজিৎ, পরমুহুর্তেই মাথা নামিয়ে নিয়ে আস্তে আস্তে হাঁটতে লাগল, জিঞ্জেসও করল না কোথায় নিয়ে যাচ্ছে তাকে জগন্নাথ।

ফেরার সময় ট্যান্ডি করল জগন্নাথ। সারা রাত্তা দুজনেই নিঃশব্দে বাইরে চেয়ে রইল।

—আপনাকে দেখায় অনেকটা সোলজারের মতো। বলে বললতা হাসছিল। টেবিলের ওপর একটি মাত্র টেবিল ল্যাম্প জ্বলছিল, সে আলোটাও অর্ধেক আড়াল করে টেবিলে ঠেস দিয়ে দাঁড়িয়েছিল বললতা। সারা ঘরে অন্ধকার ছড়িয়ে আছে।

—সোলজার? কথাটা বলে একটু ভাবতে থাকে অরিজিৎ।

—সোলজার। বললতা বলল— ফ্রন্ট থেকে ফিরে আসবার পর অবশ্য।

ঘোলা গলায় হাসে অরিজিৎ—ফ্রন্ট থেকে মার খেয়ে হেরে ফিরে আসবার পর, না? কোণের চেয়ারে বসে জগন্নাথ অরিজিৎকে দেখছিল। সারাদিন পর স্নান করেছে অরিজিৎ, বললতা খাবার করে খাওয়াল। এখন তৃপ্ত ও খুশী দেখাচ্ছে অরিজিৎকে। স্মিত মুখে জগন্নাথ চেয়ে ছিল, কিন্তু অরিজিৎ যতদূর সম্ভব এড়িয়ে যাচ্ছে তার চোখ।

—মার খেয়েই তো! যা চেহারা করে এসেছিলেন, আমি ত প্রথমে চমকে উঠেছিলুম। বললতা বলল।

মাথা নামিয়ে নিয়ে লাজুক গলায় বলে অরিজিৎ—আমার দোষ নেই। জগন্নাথকে জিঞ্জেস করুন, আমি প্রথমটায় ঐ ভয়েই আসতে চাইনি।

—বাঃ। বললতা খোঁপায় হাত তুলল—আমি চমকে যাবো বলে আপনি বন্ধুর বাসায় আসবেন না? দেখবেন না কেমন নতুন সংসার

পেতেছে আপনার বন্ধু?

—দেখব না কেন? কিন্তু তার জন্য সময় নেওয়া উচিত ছিল। বলতে বলতে আবার একটু অস্থির বোধ করে অরিজিৎ—দেখুন কেমন জংলীর মতো এসেছি, প্রথম দেখা আপনার সঙ্গে অথচ একটা উপহারও নিয়ে আসিনি হাতে করে।

—তাতে কি? বললতা ঠাট্টার ছলে যেন খেলছে অরিজিৎকে নিয়ে—পরে দেবেন। আমি খুব নির্লোভ নই, উপহার পেতে ভালবাসি।

—দেব। অবশ্যই দেব। নির্বোধের মতোই খানিকটা প্রতিজ্ঞা করার ভঙ্গীতে বিড় বিড় করল অরিজিৎ—ভাবছি কি দেওয়া যায়। কিসে মানায় আপনাকে।

একটু চাপা হাসি মুখে বললতা তাকায় জগন্নাথের দিকে, হাঙ্কা গলায় অরিজিৎকে বলে—যা খুশী। আপনার রুক-স্যাক্টাই দিয়ে যান না। আর সেই সঙ্গে কথা দিয়ে যান যে আর রুক-স্যাক্ কাঁধে নেবেন না।

অরিজিৎ হাসে—কিন্তু তা হলে আপনাকেই রুক-স্যাক্ কাঁধে নিতে হয়। চকিতে জগন্নাথের দিকে চেয়ে বলে—তাতে জগন্নাথের কি খুব সুবিধে হবে?

জগন্নাথ অরিজিৎকেই দেখছিল, সারাক্ষণ কথায় কথায় ওকে নাস্তানাবুদ করেছে বললতা। অরিজিৎ হাসছে, কিংবা হাসি দিয়ে কিছু চাপা দিচ্ছে। চেয়ারের হাতলের ওপর হাত দেখছিল জগন্নাথ, ওর তাকানোর ভঙ্গী দেখছিল, ওর গলার ঈষৎ কর্কশ স্বর মনোযোগ দিয়ে শুনছিল।

বললতা অরিজিৎের কথার উত্তরে বলেছিল—রুক-স্যাক্ আমি কাঁধে করলে ওর কোনো ক্ষতি নেই, বৌ বাউলু বলে তাড়াতাড়ি ডিভোর্স পেয়ে যাবে। আমি নেবো কাঁধে, কিন্তু আপনাকেও রুক-স্যাকের বদলে অন্য কিছু কাঁধে নিতে হবে।

—ও তো সেই পুরনো কথা—অরিজিৎ হাত তুলে খামাল বললতাকে—ছেলেবেলা থেকে শুনে আসছি।

বললতা একটু থমকে গেল। সামলে নিয়ে পরমুহূর্তেই হেসে বলল—আপনার ভ্রমণকাহিনী কিন্তু একটুও শুনলাম না। কেমন ট্যুরিস্ট আপনি? লোকে লিলুয়া ঘুরে এসে কান ঝালাপালা করে দেয়।

অরিজিৎ হাসে—সেই ভয়েই ত বলি না। তারপর থেকে একটু গম্ভীর হয়ে গেল—একটানা গল্প বলে যেতে আমি পারিও না, বলতে বলতে সন্দেহ হয় বলাটা হয়তো ঠিকমতো হচ্ছে না, লোকে বোর্ হচ্ছে। পরমুহূর্তেই হেসে বলল—ওটা একটা আর্ট; লিলুয়া ভ্রমণ-বৃত্তান্ত বলেও লোককে মুগ্ধ করে রাখা যায়।

বললতা কি বলতে যাচ্ছিল জগন্নাথ বাধা দিয়ে বলল—ওকে এবার খাইয়ে দাও। অনেক দূর যাবে ও।

বললতা চলে গেলে কিছুক্ষণ কেউ কোনো কথা বলল না। তারপর প্রথম কথা বলল অরিজিৎ।

—উ!

—আমি আবার বেরিয়ে পড়ব। খুব শীগগীরই।

—হুঁ!

কিছুক্ষণ আবার চুপচাপ। অরিজিৎ কিছুক্ষণ চেয়ে সামনের দেয়ালে ক্যালেন্ডারটা আবছা আলোতে দেখার চেষ্টা করল। তারপর হঠাৎ অপ্রাসঙ্গিক ভাবে বলল—তোর চেয়ে আমি চার বছরের বড়, তোর বোধহয় বত্রিশ চলছে, না?

—বোধহয়।

একটু শ্বাস ফেলল অরিজিৎ—বুড়ো হয়ে যাচ্ছি।

—একই কথা বার বার বলছিস কেন? তোকে বুড়ো দেখায় না।

—না?

—না।

আবার দীর্ঘশ্বাসের শব্দ হয়, অরিজিৎ বলে—তবু বয়স তো হচ্ছে।

—তাতে কি? নিষ্পৃহ গলায় জগন্নাথ বলে।

অরিজিৎ হাসে, তেমনি স্নায়বিক বিকারের হাসি—একটু উঁচুগ্রামে বাঁধা! বলে—আমার কাছে এটাই সবচেয়ে বড় ফ্যান্টারি।

—কেন?

—মৃত্যুভয়! আবার হাসে অরিজিৎ—আমি নাটক করতে ভালবাসি না জগন্নাথ, তবু হয়তো খানিকটা নাটকীয় শোনাবে। আমি তীরে তীরে ঘুরে বেড়িয়েছি, আর প্রার্থনা করেছি।

—কিসের?

—যেন আমার মৃত্যু না হয়। অসুস্থতার হাসি হাসে অরিজিৎ—বিয়ে করিনি, হয়তো করবোও না। তবু যদি কখনো করি, তাই থেকে প্রার্থনা করেছি যেন আমার স্ত্রীর মৃত্যু না হয়, অনাগত সন্তানের যাতে মৃত্যু না হয়।

—এর কোনো অর্থ নেই।

সে কথা শুনল না অরিজিৎ, এক গভীর স্বপ্নময়তার ভিতর থেকে বলল—আমি ভাগ্যবান যে প্রিয় আপনজন কেউ নেই। কলকাতার বাড়িটা ফাঁকা পড়ে আছে, এবার বিক্রী করে দেব। তারপর—আঃ! বলে মৃদু হাসি মুখে চেয়ারের পিছনে মাথা এলিয়ে দিল অরিজিৎ।

—কি বলছিস? জগন্নাথ আস্তে করে জিজ্ঞেস করে।

—যেন আমার মৃত্যু না হয়। অরিজিৎ অবহেলায় চেয়ে থাকে ঘরের সেই একটাই দেয়ালের দিকে যেটা তার সামনে রয়েছে, বলে—কিন্তু হবেই জগন্নাথ, কে ঠেকাবে তাকে?

—ঠেকানো যায় না। জগন্নাথ আস্তে বলল।

—সমস্ত অধিকার ছেড়ে দিলে শুনেছি মৃত্যু হয় না। যদি তাই দিই?

—কি পাগলের মতো যা তা বলছিস? জগন্নাথ স্পষ্ট বিরক্তির স্বরে বলে।

হাসল অরিজিৎ— কেন বলছি তা আমি জানি না। কিন্তু মনে হয়েছিল কাউকে বলা দরকার। না বললে মরে যাবো। বহুদূর থেকে ছুটতে ছুটতে এলাম তোর কাছে, স্টেশন থেকেই সোজা এলাম, যা কখনো করি নি। কেমন অচেনা লাগছিল এই শহর, কেমন অচেনা লাগছিল তোকেও, প্রথমে তাই বলতে পারলাম না, কথা আছে বলে টেনে নিয়ে গেলাম ময়দানে।

একটা নিঃশ্বাস ফেলে জগন্নাথ বলল—চুপ কর।

জ্বা কঁচকে অরিজিৎ তাকাল জগন্নাথের দিকে—তুই শুনতে চাস না?

—কি হবে শুনে? আমি তোর অনেক ব্যাপার বুঝি না।

—বুঝিস না?

—না।

কি বলতে গিয়েও বলল না অরিজিৎ। দরজায় অস্পষ্ট বনলতাকে

দেখা গেল। হাসি মুখে ঢুকল সে— ভেড়ি, আসুন।

তবু অরিজিৎ খানিকক্ষণ স্থির হয়ে রইল। তারপর হঠাৎ অনির্দিষ্ট গলায় প্রশ্ন করল—এখন কটা বাজে?

দুই

—কেমন দেখলেন আমাদের ঘর-সংসার, বললেন না তো?

—বেশ। রুক-স্যাকের স্ট্র্যাপ বুকো এঁটে নিয়ে স্নান হাসল অরিজিৎ— তবে বাইরে থেকে তো সব বোঝা যায় না।

বনলতা একটু গভীর হয়ে পরমুহূর্তে হেসে বলল—তা হলে তো বুঝতে গেলে আড়ি পাততে হয়।

—ঠিক। অরিজিৎ হাসল না। সে চলে যাওয়ার জন্য উঠে দাঁড়িয়েছিল, অন্যমনস্কভাবে একবার বনলতার মুখ দেখে নিয়ে আস্তে আস্তে বলল— জগন্নাথ প্রায় ফুটপাতের জীবন থেকে উঠে এসেছে এতদূর। বলেনি আপনাকে? ওর ধৈর্য আছে, আত্মবিশ্বাস আছে। হয়ত আরো ওপরে উঠবে ও। বলতে বলতে খামল অরিজিৎ, মাথা নেড়ে প্রায় ফিস্ ফিস্ করে বলল—কিন্তু বৃথা। সত্যবতঃ ঈশ্বরেরও মৃত্যু আছে।

জগন্নাথ বনলতার দিকে চেয়ে চোখের ইশারা করল, তারপর কোমল একখানা হাত রাখল অরিজিৎের পিঠে—যাবি না? রাত হয়ে যাচ্ছে।

—চলি। বনলতার দিকে চেয়ে বলে অরিজিৎ। হাত জোড় করে।

দুজনে নিঃশব্দে পাশাপাশি হাঁটছিল, নিঃশুম শহরতলীর ভিতরে ধ্বনিত প্রতিধ্বনিত হচ্ছিল ওদের জুতোব মৃদু শব্দ। অরিজিৎ মুখ নামিয়ে হাঁটছিল, হঠাৎ বলল—তুই আবার এগিয়ে দিতে এলি কেন?

—ক্ষতি কি? বলল জগন্নাথ—তা ছাড়া একটা কথাও ছিল।

চকিতে একবার তাকিয়ে চোখ সরিয়ে নেয় অরিজিৎ—কি?

—যা দেখতে এসেছিলি তা দেখা হয়েছে তোর?

আচমকা দাঁড়িয়ে পড়ে অরিজিৎ—কি?

জগন্নাথ হাসল—আমাকে।

—মানে।

জগন্নাথ দীর্ঘশ্বাস ফেলে বলল—চল। রাত হয়ে যাচ্ছে।

লম্বা হাত বাড়িয়ে জগন্নাথের একটা হাত ধরল অরিজিৎ—কি বলছিস

বুঝিয়ে বল।

—বললে তুই খুশী হবি না। জগন্নাথ বীর গলায় বলে—এসব না বললেই ভাল ছিল।

—তবে শুরু করলি কেন ?

আবার পাশাপাশি হাঁটছিল দু'জন। হাঁটতে হাঁটতে জগন্নাথ নরম গলায় বলল—প্রতিবার ফিরে এসে তুই আমাকে দেখতে আসিস। কেন ?

—তুই-ই বল। অরিজিৎ গম্ভীর হয়ে বলল।

—বলব। জগন্নাথ অন্ধকারে ম্লান হাসে।—ছেলেবেলা থেকেই তুই আমাকে ঘেমা করিস বলে।

অরিজিৎ উত্তর দেবার জন্য মুখ ফেরালে হাত ভুলে জগন্নাথ চুপ থাকতে ইশারা করল। বলল—ফুটপাতের জীবন থেকে উঠে এসেছি আমি, তুই বললি, ঠিক কথা। খুব নীচু তলা থেকে আমি আস্তে আস্তে ওপরে ওঠবার চেষ্টা করেছি। আমার ধৈর্য ছিল, সাধ ছিল, চেষ্টা ছিল। আর তোর সব ছিল, তবু তুই সব ছেড়ে ছুড়ে বাউঙুলে হয়ে গেলি। কিন্তু তুই ভাবিস ঐখানে তোর জিৎ, তোর অহঙ্কার। তুই হাফ সন্ন্যাসী, আমার মতো ছোটোখাটো চাওয়া নেই তোর, তোর অগ্নে সুখম্ নাস্তি, ভূমৈব সুখম্।

অরিজিৎ দাঁড়াল হঠাৎ, হাসল—স্নায়বিকারের সেই হাসি, বলল—বলে যা।

—বলছি। জগন্নাথ হাসল না—আমার এই বড় হওয়ার চেষ্টা, বেঁচে থাকার চেষ্টাকে তুই ঘেমা করিস, তোর অনুকম্পা হয় সংসারী প্রতিটি মানুষকে। যতবার আসিস ততবার আমাকে টেনে নিয়ে বেড়াস সারা কলকাতায়। কত অচেনা গলিযুঁজি তুই আমাকে চিনিয়েছিস, নিয়ে গেছিস কত অচেনা পরিবেশে। সত্যিই তোর মতো করে আমিও দেখিনি এই শহর। এইটুকু জেনে তোর তৃপ্তি যে আমরা এখানে থেকেও নেই, অথচ না থেকেও তুই আছিস।

জগন্নাথ চুপ করে রইল কিছুক্ষণ। ওরা বড় রাস্তায় এসে পড়েছিল। রাত এগারোটায় রাস্তা ফাঁকা। বাস স্টপে এসে দাঁড়াল ওরা। বাস এসে থামল, চলে গেল, অরিজিৎ ফিরেও তাকাল না সে দিকে। জগন্নাথ হাসল—তোর কথা বলতাকে বলেছি, বন্ধুবান্ধবদের বলেছি, তোকে

নিয়ে অহঙ্কার ছিল আমার। তোকে না দেখেও তাই অনেকে তোকে শ্রদ্ধা করে। কেননা তুই কিছুই গ্রহণ করিস না, তুই পৈতৃক সম্পত্তি ছড়িয়ে ছিটিয়ে গেছিস, তুই বয়সের ভার মানলি না, তুই ধার্মিক না হয়েও সন্ন্যাসী। আমিও চোখ বুজলে তোর একটা চেহারা দেখতে পাই—কাঁধে রুক-স্যাঙ্ক, পায়ে ময়লা হাফিং বুট, নোংরা জামা-কাপড়, গালে দাড়ি—তুই চলেছিস। শুধু স্মৃতির মতো পরিষ্কার তোর দুই চোখ—কেননা তোর চোখে কোনো ছোটখাটো কামনা-বাসনার বাস নেই, তোর চোখে পাহাড় অরণ্য ও সমুদ্রের বাস করে। তাই না ? আমি সে-কথাই বলে বেড়াই লোককে। কি একটা জায়গায় সন্দেহ থেকে গিয়েছিল। তুই বার বার ফিরে আসিস আর বার বার ঘুরে ফিরে আমাকে দেখে যাস। কেন ?

—কেন ? প্রায় হিংস্র গলায় অরিজিৎ প্রশ্ন করে।

—নিজেকে মনে পড়িয়ে দিতে। জগন্নাথ হাসল—যাতে তোকে ভুলে না যাই, যাতে তোর কথা আর কেউ না ভুলে যায়। তুই না থেকেও থাকতে চাস। তুই তোর বাউঙুলে চেহারাটা একবার আমাদের চোখের সামনে তুলে ধরেই সরে পড়িস, যাতে আমরা নিজের জন্য দুঃখিত হয়ে পড়ি। মাথা নাড়ে জগন্নাথ—তোকে বলছি বাস্তবিক যতবার তোর সঙ্গে দেখা হয়েছে ততবার আমি নিজের জন্য দুঃখিত হয়ে পড়েছি। বললতার কাছে তোর গল্প করতে করতে কতবার ঘৃণা মনে হয়েছে নিজেকে। মনে হয়েছে সুখভোগের কণামাত্র অধিকার আমার নেই, তোর আছে—কেননা—কেননা তুই সব ছেড়েছিস।

অরিজিৎ আস্তে আস্তে বলল—তুই আমাকে ঘেমা করিস ?

জগন্নাথ সে কথার উত্তর দিল না। আস্তে আস্তে বলল—এই বয়সেও তোর চেহারাটা চমৎকার, শক্তিমানের চেহারা! তোর শরীরে কোনো অসুখ আছে—বিশ্বাস হয় না। তবু তুই আজ দুপুরে ট্রামে ওঠার আগে যখন আমার হাত ধরেছিলি তখন তোর হাত কাঁপছিল। আমি চমকে উঠেছিলাম। সেই মুহূর্তে কেন জানি না আমার হঠাৎ মনে হয়েছিল তুই পুরোনো হয়ে গেছিস। যখন ময়দানে গিয়ে দাঁড়িয়েছিলাম তোর সঙ্গে, তুই বলছিলি তোর বয়স হয়ে যাচ্ছে, তখন হঠাৎ মনে হয়েছিল তোর বাউঙুলে স্বভাব আর নেই, এখন তুই কেবল বাউঙুলে সেজে

আছিস—তোর দৌড় সাজঘর থেকে স্টেজ পর্যন্ত। তাকে আর ‘আইডল’ না ভাবলেও চলে। একটু আগে তুই মৃত্যুভয়ের কথা বলছিলি, কথার ছলে এরকম কথা তুই আগেও বলেছিস। কিন্তু আজ আমার মনে হল তোর এই ভয় বড় ‘জৈনুইন’। জগন্নাথ দুঃস্বিতচিত্তে মাথা নাড়ল।

অরিজিৎ কথা বলল না। ল্যাম্পপোস্টের আলোয় তার ব্রোঞ্জ রঙের মুখে শুধু কয়েকটা সর্পিল রেখা ফুটে রইল।

জগন্নাথ বলল—রাগ করিস না।

—না। অরিজিৎ আবেগহীন শব্দ করল।

—তোর আর অধিকার নেই। জগন্নাথ বলল।

—কিসের ?

—নিশ্চিন্ত সুখের জীবনের। জগন্নাথ হাসে—আমার ঘরের দিকে বনলতার দিকে তুই ভিথিরির মতো চেয়েছিলি! কিন্তু আমি জানি তোর ভিতরে এখনো সেই অহংকার রয়ে গেছে। তুই নিজেই মেরেছিস নিজেকে। জগন্নাথ একটু চূপ করে থাকে—তুই বলছিলি বেরিয়ে পড়বি। সেই ভাল, থেকে গেলে তুই বুড়ে হয়ে যাবি। তুই বরং বেরিয়ে পড়।

—যাব। বড় অনামনস্ক দেখাল অরিজিৎকে।

—তোর মৃত্যুভয়, ধ্বংসের ভয় কিন্তু আমার ভিতরে সঞ্চারিত হল না। হাসে জগন্নাথ—আজ তোর হার হল।

হঠাৎ তীব্র গতিতে ঘুরে দাঁড়াল অরিজিৎ—কিন্তু—!

—কি ? ঠাণ্ডা গলায় বলে জগন্নাথ।

আস্তে আস্তে আবার স্তিমিত হয় অরিজিৎ, নীচু গলায় বলে—ভালবাসাই আমাদের দুঃখের কারণ, কেননা সব ভালবাসার জিনিসেরই মৃত্যু আছে।

—এত ঘুরে বেড়িয়ে তুই এইটুকু শিখলি ? এ তো পুরোনো কথা। আমি জানি। মৃত্যুভয় আমার নেই। আকাশ বাতাস মাটি আমি নিয়েছি অনেক, সেটা শোধ করতে হবে।

জ্ঞান হাসল অরিজিৎ—তোর মতো কথা বলতে পারি না আমি। একটু শ্বাস ফেলে বলল—তুই ফিরে যা। রাত বাড়ছে।

—আর একটু থাকি। বাস আসুক।

অরিজিৎ লম্বা হাত বাড়ি জগন্নাথের কাঁধ নেড়ে দেয়—না। তুই যা। তুই যতক্ষণ আছিস ততক্ষণ আমার দম বন্ধ হয়ে আসছে। আজ

তোর জিৎ।

ওর হাত ধরল জগন্নাথ—দুঃখিত অরিজিৎ। খুব দুঃখিত।

মাতালের মত হাসল অরিজিৎ—না। তুই যা, চলে যা, ঘরে যা।

—যাচ্ছি। তুই দাঁড়াবি তো বাসের জন্য ?

মাথা নাড়ে অরিজিৎ—ঠিক নেই। হাত তুলে আকাশ দেখায় জগন্নাথকে—দেখ।

—কি ?

হাসে অরিজিৎ—একটা মাঠ খুঁজে নেবো হয়ত। আমার জন্য পৃথিবী পড়ে আছে।

—সে হয় না অরিজিৎ—

—প্লীজ!

ফিরে আসতে আসতে জগন্নাথ একবার মুখ ফিরিয়ে দেখল বাস স্টপে দাঁড়িয়ে আছে অরিজিৎ—দু হাত সামনের দিকে বুকের ওপর জড়ো করা, আকাশের দিকে নিবন্ধ মুখ। দীর্ঘ জীর্ণ শরীর অন্ধকারে নিম্পত্র গাছের মতে দেখাচ্ছে।

তিন

যদিও অনেকক্ষণ হল সকাল হয়েছে তবুও আলস্যবশতঃ বিছানা ছাড়েনি জগন্নাথ। বালিশে কনুই রেখে আধশোয়া হয়ে খবরের কাগজ পড়ছিল। পড়তে পড়তেই হঠাৎ মুখ ফিরিয়ে ডাকল—শোনো বনলতা।

দিনের মধ্যে একশবার ডাকে জগন্নাথ—বনলতা। বনলতা তখন ট্রাঙ্ক খুলে মেঝের ওপর হাঁটু গেড়ে বসে একগাদা জামাকাপড় নামিয়ে আবার গুছিয়ে তুলছে। মুখ না ফিরিয়ে নিম্পূহ গলায় বলল—কি হল ?

—দেখনা, এদিক এসো।

—উঃ, যা বলবার ওখান থেকে বল, কাজ করছি। এই বলে বনলতা জগন্নাথের সদ্য খোয়া পাঞ্জাবিটা তুলে নিয়ে দেখল তাতে একটাও বোতাম আস্ত রাখেনি অসভ্য ধোপাটা। জগন্নাথের দিকে মনোযোগ না দিয়ে সে উঠে পুরোনো একটা পাউজারের কৌটো খুলে ছুঁচ সুতো খুঁজতে যাচ্ছিল। এক হাতে জগন্নাথের পাটভাঙা পাঞ্জাবিটা ধরা—বোতাম বসাবে।

কাগজে মুখ আড়াল করে জগন্নাথ বলল—ব্যাপারটা কিন্তু সিরিয়াস।

—কি এমন!

একটু দীর্ঘশ্বাস ফেলে জগন্নাথ বলল—সেই ইঞ্জিনীয়ার ভদ্রলোক যার সঙ্গে তোমার বিয়ের ঠিকঠাক হয়ে গিয়েছিল, এখন মনের দুঃখে তিনি চললেন। কাগজে ছবি বেরিয়েছে—গোয়িং অ্যাণ্ড ফর হায়ার স্টাডিজ।

পাউডারের কৌটোর ভিতর আপনিই থেকে গেল বনলতার আঙুল। কেমন একটু থমকে গেল সে। সঙ্গে সঙ্গেই হেসে বলল—মনের দুঃখে যাবে কেন, দুঃখ কিসের! পড়তে যাচ্ছে তো!

—দুঃখ নয়! জগন্নাথ বিচ্ছুর মতো হেসে মুখ ফেরাল—ভালবাসায় ভুলিয়ে নিলাম তোমাকে। দুঃখ তোমারও হওয়া উচিত। ছবিটা দেখ, খবরের কাগজের ছবি ভাল ছাপা হয় না, তবু বোঝা যায় কী হ্যান্ডসাম!

পাউডারের কৌটোর হুঁচ খুঁজে পেল না বনলতা। নতুন সংসার—এখনো সব গোছানো হয়নি। কোন জায়গায় কী রেখেছে তা ভুল হয়ে যায়। একটু বিরক্ত হয়ে বলল—বক্ বক্ করো না।

—ছবিটা অন্ততঃ একবার দেখ।

এবার বনলতা হাসল—দেখব, কিন্তু তাতে কি? সুন্দর চেহারা বা ইঞ্জিনীয়ার দেখলেই ঢলে পড়তে হবে নাকি? তা ছাড়া তুমি কি কিছু কম?

—কম? বিশ্বয়ের ভান করে জগন্নাথ বলে—কম কেন হবো? আমার বয়স বত্রিশ আর ভদ্রলোকের আটাশ। বয়সেই তো মেরে দিয়েছ!

—কী যে বাজে বাজে কথা সব, মাথা মুণ্ডু নেই। বনলতা পাউডারের কৌটো ফেলে দিল টেবিলের ওপর। জ্ব বুককে বলল, ওঠো না।

একটু হাসি তখনো লেগেছিল জগন্নাথের মুখে, কাগজটা ফেলে দিয়ে সে চিৎ হয়ে শুয়ে পড়ল। বলল—এত রাগ! এখনই পুরোনো হয়ে যাইনি তো!

—পুরোনোই তো! পুরোনো, বুড়ে, বাজে। রাগ করে হাতের পাঞ্জাবিটা জগন্নাথের দিকে ছুঁড়ে দিয়ে চলে যাচ্ছিল বনলতা। পাঞ্জাবিটা জগন্নাথের মুখ চোখের ওপর পড়ল। জগন্নাথ হেসে উঠল। পর মুহূর্তেই চোঁটয়ে বলল—এক কাপ চা দিও, আর দেশলাইটা—

—কাঁচকলা। বনলতার জবাব পাওয়া গেল।

মুখের ওপর থেকে পাঞ্জাবিটা সরানি জগন্নাথ, কাপড়ের সাদা মিহি

বুনোটের ভিতর দিয়ে চেয়ে ছিল। সিলিং, দেয়াল, বইয়ের র্যাক, টেবিল, বুকের কাছেই হাঁ করে থাকা জানালা এইসব দেখছিল। শরতের সাদা মেঘ জানালা জুড়ে আছে। চকিতে সব কিছু স্বপ্নের মতো মনে হয়—অচেনা, চেয়ে থেকে আধমুমে পেল জগন্নাথকে।

এখনো কিছুই গুছিয়ে তোলা হয়নি। ঘরের দিকে তাকালেই বোঝা যায়—অনভাস্ত হাত গুছিয়ে রাখার চেষ্টায় জিনিষপত্র সব এলোমেলো হয়ে আছে। একটু আগে ট্রাক খুলেছিল বনলতা, আধখোলা সেই ট্রাক ঘরের মাঝখানেই পড়ে আছে, বন্ধ করা যায় নি। প্রায়ই কাজের জিনিষ খুঁজে পায় না বনলতা। রাগ করে। অনভ্যাস জগন্নাথেরও। এত নতুনের মধ্যে তারা এসে পড়েছে হঠাৎ যে হাঁফ ধরে যায়। তবু এরই ভিতরে কোথাও রয়েছে বোকার মতো এক রকমের সুখ যা জগন্নাথ আগে কখনো উপভোগ করেনি। খুব নির্বোধের মতো, বুদ্ধিহীনের মতো এই তৃপ্তিদায়ক সুখ গ্রহণ করতে হয়। অমৌজিক। অলস, আধোঘুম চোখে পাঞ্জাবির মিহি বুনোটের ভিতর দিয়ে চেয়ে ছিল জগন্নাথ। চায়ের কাপ হাতে বনলতার ভারসাম্য রক্ষাকারী ছায়া ছায়া ছবির মতো অবয়ব দেখা গেল দরজার কাছে। চৌকাঠে পা দিয়েই চোঁটয়ে বলল—এই কি হচ্ছে। মুখ থেকে ওটা সরাতো কিছুত কোথাকার।

জগন্নাথ নড়ল না, তেমনিই শুয়ে রইল। সাদা, মিহি বুনোটের মসলিন ঘেরাটোপের ভিতরে সে বনলতার অসম্ভব মুখ দেখছিল। আবছা বলে আরো ক্রটিহীন সেই মুখ। চায়ের কাপ এক হাতে, অন্য হাতে মস্ত খোঁপাটা সামলাতে সামলাতে কাছে আসছিল বনলতা, ডাকছিল—এই, ওগো—

তারপর ধীর হাতে পাঞ্জাবিটা মুখ থেকে তুলে নিয়ে নরম গলায় বলল—অসময়ে ঘুমোবার ভাল, না?

জগন্নাথের মুখে তখনো সেই হাসি, যা অর্থহীন সুখের। উঠে বসে বলল—ভয় পেয়েছিলে?

—কিসের ভয়? বলে বিছানার ওপরেই চায়ের কাপ রাখা বনলতা, পর মুহূর্তেই জিব কেটে কাপ তুলে নেয়—কাগজটা পাতো না, কাপটা রাখব।

হাত বাড়িয়ে চা নেয় জগন্নাথ, বলে—রান্নাঘরে কি করছে?

—কি আবার! রান্নাঘরে যা করতে হয় তাই। আবার ভ্রু কোঁচকায় বনলতা।

—একটু বোসো না।

—বড় জ্বালাও তুমি। বলতে বলতে বসল বনলতা। বসতে না বসতেই বালিশে মাথা রেখে চিংপাত হয়ে শুয়ে পড়ে ঝোলানো পা দোলাতে লাগল। নিশ্চিন্ত গলায় বলল—তোমার না বারোটায় ক্লাস। এখন এগারোটা বাজে কিন্তু।

—হবে। পত্রিকাটা আবার খুলবার চেষ্টা করে জগন্নাথ।

—ওটা রাখো না! বসতে বললে কেন তবে?

—তুমি তো এম্ফুনি পালাবে রান্নাঘরে।

—ততক্ষণ অন্ততঃ রাখো।

জগন্নাথ কাগজটা ফেলে বড় বড় কয়েকটা চুমুকে গলা পুড়িয়ে চা গিলে ফেলে বনলতার পাশে গড়িয়ে পড়ে।

বনলতা—কী হচ্ছে?

জগন্নাথ সে কথার উত্তর না দিয়ে প্রশ্ন করে—বললে না তো ঘরে ঢুকে আমার মুখ ঢাকা দেখে ভয় পেয়েছিলে কি না!

—জানি না।

—তুমি ভীত এক নম্বরের। জগন্নাথ হাসে।

—বাঃ, ভয় কিসের! বনলতা নিস্পৃহ গলায় বলে।

—তবে বলব কিসের ভয়! মানুষের মুখ কখন ঢেকে দেওয়া হয় জানো?

ডেউয়ের মতো বনলতা জগন্নাথের ওপর পড়ল। বালিশ, খবরের কাগজ, বিছানার চাদর, বনলতা ও জগন্নাথ একসঙ্গে জড়িয়ে পড়েছিল। বালিশ, স্বাসরোধকারী আলিঙ্গনে জগন্নাথের স্টোঁট থেকে স্টোঁট সরিয়ে নিয়ে বনলতা আচমকা বলে—তুমিও তো চলে যাবে।

—কোথায়?

—বিলেতে।

—ওঃ! জগন্নাথ হাসল—হয়তো যাব; কে জানে যাবই কিনা!

শিথিল হয়ে এসেছিল জগন্নাথের হাত, বনলতা উঠে বসে ঝোঁপা ঠিকঠাক করে নিচ্ছিল। বলল—এবার ওঠো।

—তোলো দেখি টেনে। হেসে হাতদুটো বাড়িয়ে দেয় জগন্নাথ।
হাসে বনলতা—আমি কি পারি?

—চেষ্টা করে দেখ।

—দাঁড়াও। বলে কোমরে শাড়ির আঁচল জড়িয়ে জগন্নাথের হাত ধরে সে টেনে তুলতে গিয়ে টের পায় তাকেই বিছানায় টেনে নিচ্ছে জগন্নাথ। হেসে বলে—এরকম কথা ছিল না তো!

—উঠতে ইচ্ছে করছে না। বলে জগন্নাথ হাই তোলে।

—বিছানার পোকা। এ ফ্লাগটা আজ পর্যন্ত তুমি বোধ হয় সবটা ঘুরে দেখনি, ছাদে যাওনি।

—না হয় নাই গেলাম।

জগন্নাথের মাথার চুলে কাকের বাসা। বনলতা ওর ঝুঁটি ধরে নেড়ে দিয়ে বলল—এ পাড়ায় আমাদের একমাস থাকা হয়ে গেল, কিন্তু এখনকার একজন লোকও তোমায় চেনে না।

—আস্তে আস্তে চিনলে সেই চেনা অনেকদিন থাকে। সহজে ভুল চোখে পড়ে না।

—কুনো কোথাকার! আজ বাজারটাও করোনি। ঠিকে ঝি একগাদা শাকপাতা কিনে এনে ফেলে গেছে।

জগন্নাথ উঠে হাই তুলে আড়মোড়া ভাঙে। অতিরিক্ত শুয়ে থেকে থেকে শরীরে এক ধরনের জ্বর জ্বর ভাব। আড়মোড়া ভাঙতে গিয়ে হাড়ের শব্দ ওঠে খটখট। হাই তুললে শরীর আরো শিথিল হয়ে আসে।

—এখন সাড়ে এগারোটা কিন্তু! বনলতা সতর্ক করে বলে—আজ আর হল তোমার কলেজে যাওয়া!

—আঁ! বোকার মতো নির্বোধ চোখে একটু চেয়ে থাকে জগন্নাথ, তার স্বয়ংক্রিয় হাত টেবিলের ওপর থেকে হাতঘড়ি তুলে নেয়। ঘড়ির কাঁটা দুটোর সঠিক সংস্থান বুঝতে একটু সময় লাগে তার। পরমহুর্তাই ঘড়ি টেবিলের ওপর রেখে দিয়ে বলে—ইচ্ছেও করছিল না যেতে। আজ একটা মোটে ক্লাস।

—বসে থেকে থেকে তোমার ভুঁড়ি বেড়ে যাচ্ছে!

—কলেজে যাব না বলে তুমি খুশী হলে না বনলতা?

বিয়ের পর আর কদিন কলেজ করেছে তুমি! কেবল কামাই, দেবে চাকরি থেকে নট করে। বলতে বলতে বনলতা উড়ে গেল লম্বুপায়ে,

চড়াই পাখীর মতো। জগন্নাথ একা দাঁড়িয়ে থাকে খানিকক্ষণ, কোনোই কাজ নেই হাতে। র্যাকে অগোছালো বই পড়ে আছে, অনেকদিন হাত দেওয়া হয়নি। পাতলা খুলোর সাদা আস্তরণ পড়েছে। বইয়ের থাকের পিছন থেকে উঁকি দিচ্ছে তার ছাতার বাঁকানো বাঁট। ওয়াটার প্রফ দিয়ে সমস্তে ঢাকা আছে শেলাইয়ের মেশিন। বনলতার অগোছালো স্বভাব। চারদিকটা দেখে সে জ্র কুঁচকে রইল। তারপর চৌঁচিয়ে ডাকল— এই, শুনে যাও।

কোনো সাড়া পাওয়া গেল না।

সকালে দাঁত মাজেনি, মুখ বিস্বাদ হয়ে আছে! স্নান না করলে জ্বরভাব কাটবে না। বাথরুমে যাওয়ার সময়ে দেখল বইয়ের র্যাকের পিছনে নেম প্লেটটা পড়ে আছে। এসপ্ল্যান্ড থেকে সস্তায় কালোর ওপর সাদা প্লাস্টিকের অক্ষর লাগিয়ে তৈরী করা নেম প্লেটটা কিনেছিল— লাগানো হয়নি। সেটা তুলে একটু দেখে নিয়ে আবার যেখানে ছিল সেখানেই ফেলে রেখে দিল। থাক্গে। বারান্দায় এসে একটু দাঁড়ায় জগন্নাথ। একতলার বারান্দা, তারপর একফালি ঘাসজমি, তারপরই চওড়া ফুটপাথ, বড় রাস্তা। এদিকটা নতুন হয়েছে। পাড়াটা খুব ছিমছাম, লোকজন বড় একটা দেখা যায় না, মাঝে মাঝে হুশ করে মোটর গাড়ি চলে যায়।

আবার ঘরের মধ্যে ফিরে আসে জগন্নাথ। কী করবে ভেবে পায় না। কলেজে গেল না, অটেল সময় হাতে। রান্নাঘরে বনলতা আছে, সেদিকে পা বাড়িয়ে আবার ফিরে এল। এখনো অনভ্যাস রয়ে গেছে, বারবার বনলতার কাছে যেতে লজ্জা করে, কয়েকদিন আগেও বনলতার সামনে হুঁ করে গায়ের গেঞ্জীটা খুলতে তার বাধো বাধো ঠেকতো।

নেমপ্লেটটা তুলে জগন্নাথ প্লাস্টিকের ওপর লেখাটুকু পড়ে—প্রফেসর, জে. বোস, এম-এ-ডি ফিল। একই সঙ্গে একধরনের গ্লানি ও অহঙ্কার অনুভব করে সে। বইগুলোর ওপর অনামনস্কভাবে কয়েকটি আঙুল রাখে। কিছুই করার নেই আর। এক এক সময়ে নিজেকে তৃপ্ত এবং কামনা বাসনা রহিত মনে হয়। অথচ ঠিক তা নয়—সে জানে। একটু কুঁজো হয়ে সে নিজের পেটটা টিপে দেখে। একটু চর্বি বোধ হয় বসেছে ঠিকই। ভাবল এখন তার খুব কাজ করা দরকার। খুব ব্যস্ত থাকা দরকার। নইলে শরীরে মেদ নামবে। ক্রমশঃ উচ্চশাগুলি হ্রাস পেয়ে যাচ্ছে।

কলঘরে জল পড়ে ভেসে যাওয়ার শব্দ আসছে। রান্না ঘরের দিকে

কোনো শব্দ নেই। কে জানে কোথায় গেল বনলতা! একটু অনামনস্ক জগন্নাথ নেমপ্লেটটা হাতে নিয়ে ঘরে ঘুরে ঘুরে পেরেক খুঁজতে লাগল। তবলা ঠোকার একটি হাতুড়ি পাওয়া গেল পুরোনো খবরের কাগজের স্তূপের নীচে, বনলতার জিনিষপত্রের সঙ্গে কি করে এসে গেছে, পেরেক পাওয়া গেল না। খুঁজতে খুঁজতে রান্নাঘরে আসে জগন্নাথ। বনলতা নেই, উনুনের ওপর এক হাঁড়ি জল চাপানো আছে— কে জানে কোন কাজে বা অকাজে লাগবে। ভরসা ছিল না, তবু রান্নাঘরের ময়লা তাকে কয়েকটা জংঘরা পেরেক পেয়ে গেল জগন্নাথ। ছোট হাতুড়িটা সেই তাকে ফেলে রেখে শিল-নোড়ার নোড়াটা তুলে নিয়ে সদরে আসে জগন্নাথ। পেরেক ঠুকে ঠুকে নেমপ্লেটটা লাগাতে থাকে দরজায়, কলঘরে জলের শব্দ বন্ধ হয়ে যায়। বনলতার ক্ষীণ গলা ভেসে আসে— এই কী হচ্ছে! বাড়ি ঘর ভেঙে ফেলছ নাকি?

—তুমি কোথায় লুকিয়ে আছো?

—আমার জায়গা আছে বলব কেন?

হাসে জগন্নাথ— তবে কলঘরে কে?

একটু চুপচাপ। কিছুক্ষণ পরে ভিন্ন জায়গা থেকে বনলতার গলা আসে— কলঘরে খুঁজে দেখনা কে! কিন্তু কী হচ্ছে শুনি!

—এসে দেখে যাও।

—আমার বয়ে গেছে। বাড়িওয়ালার শব্দ শুনেছে ঠিক, সেই আসবে দেখতে।

কাজ হয়ে গেলে জগন্নাথ দরজায় নিজের নামের ফলকের দিকে চেয়ে থাকে কিছুক্ষণ। হঠাৎ সম্পূর্ণ অচেনা মনে হয় প্রফেসর জে. বোস এম-এ-ডি-ফিল।

ঘরে এসে নোড়াটা টেবিলের ওপর রাখতে যাচ্ছিল, তখন ভিতরের দরজা দিয়ে বনলতা ঘরে ঢোকে। ভেজা শরীর, পরনের শাড়ি খানিকটা কোমরে জড়ানো, বাদবাকীটা কাঁধের ওপর জড়ো করা, ভাল করে পরেনি এখনো। শায়ার লেশ বেরিয়ে আছে, চুলে জড়ানো গামছা নিংড়ে জল ফেলতে ফেলতে ঘরে ঢুকল। সাবানের স্নিগ্ধ গন্ধের সঙ্গে জলভেজা শরীরের গন্ধ, ঘরটা ভরে যায়। শ্বাস টেনে জগন্নাথ বলে—ইস্ বনলতা খুব জল ঢেলেছো, তোমার স্টেট ফ্যাকাশে হয়ে গেছে।

—আমার স্টেট নিয়ে ভাবতে হবে না। হোকগে ফ্যাকাসে। বলে

পরমুহূর্তে জগন্নাথের হাতের দিকে চেয়ে চোঁচিয়ে বলে— ইস্ আমার নোড়া! ওটা তুমি কোথেকে পেলে?

—যেখানে ছিল, রান্নাঘরে।

—তোমাকে নিয়ে পারি না, কি হচ্ছিল ওটা নিয়ে শুনি।

—বলেছিলে পাড়ার লোকে চেনে না আমাকে, তাই নেমপ্লেটটা লাগিয়ে দিলাম—এবারে চিনবে!

—ছাই চিনবে। বনলতা হাত বাড়িয়ে বলল—নোড়াটা দাও তো। পেরেক ঠোকে কেউ ওটা দিয়ে! ইস্, যদি ভেঙে যেত।

জগন্নাথ দেখে বনলতাকে অসম্ভব সুন্দর দেখাচ্ছে, রগড়ে রগড়ে গা মুছেছে বোধহয়—এখনো গাল, কানের লতি, চিবুক আর নাকের ডগা লাল হয়ে আছে, অবশ্য লালটা নতুন গামছার কাঁচা রঙটাও হতে পারে। ভেজা চুল মাথায় বসে যাওয়ায় ওর নিখুঁত গোল মাথার আকার বোঝা যায়। বনলতার সৌন্দর্য প্রায় ক্রটিহীন।

নোড়াটা বাড়িয়ে জগন্নাথ বলে—নিয়ে যাও তোমার মূল্যবান নোড়া।

হাত বাড়িয়েও জগন্নাথের চোখে চোখ রেখে পিছিয়ে যায় বনলতা— না বাবা, কাছে গেলেই হুট করে একটা অসভ্যতা করে বসবে।

ভীষণ শব্দ করে নোড়াটা মেঝের ওপর পড়ল, চকিত বুঁকে লাইফ দিয়ে এগোলো জগন্নাথ কিন্তু ধরা গেল না। অসম্ভব দ্রুত লঘু পায়ে চরকির মতো বোঁ করে ঘুরে ঘরের বাইরে চলে গেল বনলতা। চোঁচিয়ে বলল— ছুঁয়ো না আমাকে, তুমি এখনো চান করোনি।

বাতাসে শূন্যতা আঁকড়ে জগন্নাথ ফিরে বলে— তাতে কি?

—ছুঁতে নেই, এখন আমি ঠাকুরকে জল দেবো। একটু দূরে দাঁড়িয়ে নিশ্চিন্ত মনে চুল থেকে লতানো গামছা আস্তে আস্তে খুলল বনলতা, নিম্পৃহ গলায় বলল— এত হৈ-টচ করো তুমি আশে পাশের লোক টের পেয়ে যাবে।

—তোমার ভিতরে এখনো হাজারটা গোলমাল রয়ে গেছে।

—কিসের গোলমাল?

—নানা রকমের। ছোঁয়া-ছুঁয়ি ফ্রীনেসের অভাব, লোকভয়—এই সব আর কি!

—আহা, থাকবে কেন?

জগন্নাথ বালিশের পাশ থেকে সিগারেটের প্যাকেট নিয়ে দেশলাই

খুঁজতে খুঁজতে বলে—তোমার তো ভাত মেরে দিয়েছি বামুনের মেয়ে। বনলতা স্নান একটু হাসল—খুব ক্রেডিট, না?

—নয়? তু তুলে কপালে ভাঁজ ফেলে জগন্নাথ।

—ছাই। আমি রাজি না হলে তোমার সাধি ছিল?

ঠোটে সিগারেট লাগিয়ে অসহায়ভাবে জগন্নাথ বলে— দেশলাইটা? লঘু পায়ে কাছে এসে ঠোট থেকে সিগারেটটা কেড়ে নিয়ে ছুঁড়ে দেয় বনলতা, পরমুহূর্তেই তার ভেজা ঠোট জগন্নাথের ঠোটের সঙ্গে লিপ্ত হয়। দুটি ভেজা ঠাণ্ডা হাত জড়িয়ে ধরে জগন্নাথের গলা।

যেমন ধরেছিল, তেমনি হঠাৎ ছেড়ে দিয়ে দ্রুত শ্বাসের সঙ্গে বনলতা বলে—হয়েছে তো! এবার যাও চান করতে।

চার

নেয়ে খেয়ে দুপুরবেলা আবার বিছানা নিয়েছে জগন্নাথ। খাওয়ার পর রান্নাঘর ধুয়েছে বনলতা। আরো দু'একটা কাজ সেরেছে ঘুরঘুর করে। তারপর এসে মেঝেতে আসন-পিড়ি হয়ে বসেছে এখন—সামনে খোলা খবরের কাগজ। বুঁকে কি পড়ছিল, মুখ না তুলেই প্রশ্ন করে—এই তুমি কখনো 'মার্শকম' খেয়েছ? হোটেলের বিজ্ঞাপনে রয়েছে!

জগন্নাথ কাৎ করে গুয়ে ওর ঘন চুলের ভিতর সাদা সিঁথি দেখছিল, মস্ত এলোখোঁপা ভেঙে পড়ছে সাদা ঘাড়ের ওপর। অন্যমনস্কভাবে বলে—কী সেটা?

—জানো না?

—উহু।

—তবে কিসের বিছান তুমি?

জগন্নাথের ঘুম পাচ্ছিল, কিন্তু ঘুমোতে পারছিল না। অলস ঘুম চোখে বনলতার দিকে চেয়ে থেকে তার সময় কেটে যাচ্ছিল। বড় বেশী সুন্দর বনলতা। এত সুন্দর যে মাঝে মাঝে এক ধরনের অস্বস্তি হয় জগন্নাথের। ছিপের মতো তেজী লঘু শরীর, অথচ হাত ছোঁয়ালে মনে হয় অল্প উত্তাপেই গলে যাবে। বনলতার মুখশ্রী এক এক সময়ে এক এক রকম। মুখোমুখী এবং পাশ থেকে দেখলে তাকে ভিন্ন ভিন্ন বলে মনে হয় জগন্নাথের। বেদিক থেকেই দেখা যাক বনলতার মুখ একই রকম আকর্ষণ করে।

—বললে না! বনলতা মুখ তুলে তাকায়। এক পলকেই সে জগন্নাথের

চোখ বুজে ফেলে লজ্জায় চোখ নামিয়ে নেয়। প্রায় ফিস্-ফিস্ করে বলে—থনাগজ কোথাকার?

বিস্মিত জগন্নাথ প্রশ্ন করে—মানে!

—ও একটা গালাগাল। মুখ নীচু করে হাসে বনলতা।

—কী রকম গাল! কখনো শুনিনি তো!

মুখে আঁচল চেপে মেঝের ওপর খামোখা গড়িয়ে পড়ে বনলতা, বলে—তোমার নামটা উন্টে বললাম, সোজা তো মুখে আনতে নেই!—আঁ।

বনলতা হাসতেই থাকে—যা বিচ্ছিরি নাম! মুখে আনতে হলে মরে যেতুম। কয়েক মুহূর্ত ভেবে নিয়ে একটু হেসে জগন্নাথ বলে—কৌশিক ব্যানার্জি নামটা কেমন?

হাসি খামল বনলতার। হাতের ওপর মাথা রেখে সে মেঝের ওপর কাত হল, বলল—মন্দ কি! তোমার চেয়ে ভাল।

—শুধু নাম! আর চেহারটা? ছবিটা দেখ না সিক্সথ পেজে রয়েছে;

—দেখেছি। ভালই তো।

হতাশ ভঙ্গীতে হাত ওপ্টাল জগন্নাথ—কী কল-কৌশল ইঞ্জিনিয়ার সাহেবের। অভদুর থেকে ও এখানকার একজনের হৃদয়ের কলকজা নেড়ে দিচ্ছে।

বনলতা উত্তর দিল না। চোখ বুজে এলিয়ে থাকল। মুখে মৃদু একটা হাসি—সুখ ও তৃপ্তির ডাকটিকিটের মতো লেগে আছে।

জগন্নাথ চিৎ হয়ে শুয়ে সাদা সিলিং দেখল। দেখল, বাইরের শরতের গভীর নীল আকাশ, বহুদূরে বিস্তৃত রয়েছে জগৎ ও নক্ষত্রমণ্ডলী। তাদের দুজনের সঙ্গে যোগসূত্র ও পারস্পর্যহীন যা কিছু আছে তার আর আপাতত কোনো অর্থ নেই জগন্নাথের কাছে। অস্ফুট ভাবে কাকে যেন ধন্যবাদ দিল। কেননা এক গভীর স্বপ্নময় সুখবোধ তাকে আচ্ছন্ন করছিল। সে চোখ বুজে থাকল।

আস্তে আস্তে কড়া নাড়ার শব্দ হচ্ছিল। আচ্ছন্নভাবে ভিতরে থেকে প্রথমটা খেয়াল করেনি। আবার শব্দ হতেই ঘাড় তুলে জগন্নাথ দেখল, বনলতা ঘুম ভেঙে চেয়ে আছে। অসময়ে কে আসবে! মাথাটা বালিশে ফেলে দিয়ে জগন্নাথ বলল, দেখ তো কে এলো!

দরজা খুলে বনলতা দেখে দরজা ঘিরে চার পাঁচজন অল্পবয়সী ছেলে,

কুড়ি-বাইশ বছরের। প্রথম যার ওপর চোখ পড়ল সে মুখোমুখি দাঁড়িয়ে ছিল, —বনলতা দরজা খোলার পর সে ধীরে সুস্থে চোখ থেকে গগলস্ নামাল। চেহারটা কর্কশ, মুখে বখাটে একটু হাসি। খুব অল্প সময়েই বনলতা টের পেল ছেলোটোর তাকানোর ভঙ্গিটা ভাল নয়। প্রায় ভূ কুঁচকেই বনলতা জিজ্ঞেস করল—কাকে চাই?

—উষ্ণ বোস বাড়িতে আছেন?

বনলতা সরতে পারলে বাঁচে, মাথা নেড়ে বলল—দাঁড়ান, ডেকে দিচ্ছি।

ততক্ষণে উঠে পড়েছে জগন্নাথ। কোমরে ধুতিটা ঠিকমতো জড়িয়ে নিয়ে এগিয়ে গিয়ে বলল—কি ব্যাপার?

সেই ছেলেটা একটু হেসে বলল—আপনার কাছেই এসেছিলাম স্যার।

জগন্নাথের মনে পড়ল না এরা তার ছাত্র কিনা, বস্তুত ছাত্রদের মুখ খেয়াল থাকে না তার। জিজ্ঞেস করল—তোমরা আমার ছাত্র?

—না স্যার, আমরা কারুরই ছাত্র নই; ছেলেটা খুব উত্তাপহীন গলায় বলল। সঙ্গে সঙ্গে একটু চাপা হাসির শব্দ হয় তার দল থেকে।

একটু থমকে গিয়েই আবার সামলে নেয় জগন্নাথ, হাসিমুখে বলে—ও ভুল হয়েছিল, কি চাই, তাই আপনাদের?

—আপনার চাঁদটা স্যার—হিপ পকেট থেকে বিল বই বের করতে করতে বলল—গাঢ়া পুজো!

—ওঃ, একধরনের স্বস্তি পেল জগন্নাথ, কেন তা বুঝল না। বলল, এক মিনিট দাঁড়ান দিচ্ছি।

ঘরে এসে ব্র্যাকেটে ঝোলানো পাঞ্জাবির পকেটে সে দেখে। বনলতা চুল আঁচড়াচ্ছে। জগন্নাথের দিকে চেয়ে চাপা গলায় বলে—কি চান?

—চাঁদা।

—কি অভদ্র চোখ দেখেছ! বনলতা বিরক্তির সঙ্গে বলল দাঁত ফিতে কামড়ে।

—আস্তে! জগন্নাথ সতর্ক করে দিয়ে হাসল, বলে—ওদের দোষ দেওয়া যায় না। যা রূপ!

দুটাকার নোটটা নিয়ে আবার দরজার কাছে এসে দেখে ছেলেটা মুখ নীচু করে রসিদ লিখছে। লেখা হলে রসিদটা হাত বাড়িয়ে দিল

ছেলেটা। জগন্নাথ রসিদটা আর দেখল না, কারণ ভয় হল দেখলে বিচ্ছিরি রকমের ভুল বানান চোখে পড়তে পারে।

ছেলেটা কিন্তু টাকা নিতে হাত বাড়িয়েই হাত টেনে নিল, ক্র কুঁচকে বলল— এ কী! দুটাকা!

কথার ধরনটা ভাল লাগল না জগন্নাথের। স্পষ্ট বিরক্তির ভাব। তবু হাসিটুকু লেগেই ছিল জগন্নাথের মুখে, সে বলল— কেন, এই তো যথেষ্ট!

—যথেষ্ট! ছেলেটা অল্পক্ষণ স্থির চোখে জগন্নাথকে দেখে নিয়ে বলল— রসিদটা দেখুন, আপনারা নামে দশটাকা লেখা হয়েছে।

—দশটাকা! জগন্নাথ একটু চোখ বড় করে বলে—কেন?

—ওরকমই সকলে দেয় এখানে। শাস্ত জবাব পাওয়া গেল।

পেছনে যারা ছিল তাদের একজন, যার রং ফর্সা এবং মুখশ্রী শাস্ত, সে একটু হেসে বলল— আপনারা যদি একটু বেশী না দেন তাহলে—

তার কথা শেষ হওয়ার আগেই সামনের ছেলেটা ফিরে তার দিকে একটু তাকাল। কর্তৃত্বের ভঙ্গী। ছেলেটা চুপ করে গেল। সামনের ছেলেটির মুকবিওয়ানা যেন বড় বেশী। জগন্নাথের ভিতরে একটা ছোট্ট রাগ তৈরী হচ্ছিল। তবু শাস্ত ভদ্র গলায় সে বলল— আমাকে কতটুকু জানেন আপনারা? দুটাকার বেশি দেওয়ার ক্ষমতা আমার নাও থাকতে পারে!

অন্য কেউ কোন কথা বলল না, সামনের ছেলেটি আবার শাস্তভাবে অতিরিক্ত আত্মবিশ্বাসের সঙ্গে প্রায় চুর গলায় বলে— চাঁদার রেট আমরা ঠিক করিনি। সকলের সুবিধার জন্য পাড়ার পাঁচজন ভদ্রলোক সেটা ঠিক করে দেন। আপনি এ পাড়ায় নতুন, হয়ত নিয়মটা জানেন না।

কথাগুলোর মধ্যে অর্থোক্তিতা কিছু ছিল না, কিন্তু ছেলেটি প্রায় অপমানসূচক হেলাফেলার ভঙ্গিতে বলল। জগন্নাথ যদিও এদের বয়সী ছেলেদের পড়ায়, তবু অমন কর্কশ চেহারার ছেলে কদাচিৎ দেখেছে। ক্রমশ রেগে গেলে তার মুখ থেকে হাসিটা লুপ্ত হয়েছিল, এবার একটু রাগের সঙ্গেই বলল—পাড়ার কাউকে আমি চিনি না। তা ছাড়া আমি কত চাঁদা দেবো তা তারা ঠিক করবেন কেন?

—ঠিক আছে। ছেলেটা রগওঠা, ক্রেঠো একটা লম্বা হাত জগন্নাথের দিকে বাড়িয়ে, তেমনি শাস্ত কিন্তু অন্তর্নিহিত রুঢ়তার সঙ্গে বলে— রসিদটা ফেরত দিন।

জগন্নাথ দ্রুত চিন্তা করছিল। প্রকৃতপক্ষে বিরোধিতা করার কোনো ইচ্ছে তার ছিল না। সে হয়তো টাকাটা দিয়েই দিত। কিন্তু ছেলেটা এই মাত্র যা বলল তা ইচ্ছাকৃত অপমান! বিশেষতঃ সে স্পষ্টই টের পাচ্ছিল যে বললতা ঠিক তার পেছনে দরজার আড়ালটিতে এসে দাঁড়িয়েছে। সে মৃদু পাউডারের গন্ধ পাচ্ছিল। বললতার সামনেই ঘটনাটা ঘটছে। সে তাই স্পষ্ট রাগের গলায় বলল— বেশ, এই নিন। বলে রসিদটা ছুঁড়ে দিল সামনে। হাওয়ায় কাগজের টুকরো উড়ে যাচ্ছিল।

ছেলেটা উদ্ভস্ত কাগজটাকে ধরে পলকে মুঠোয় দলা পাকিয়ে ফেলে সেটা জগন্নাথের পায়ের কাছে আক্রোশে ছুঁড়ে ফেলে চৌঁচিয়ে বলল— আর উই বেগার্স?

সেই ফেটে পড়া চিংকারটা জগন্নাথকে জোর ধাক্কা দিল একটা। ছেলেটার গলায়, মুখে ও হাতে জোঁকের মতো ফুলে উঠেছে শিরা। উপশিরা! তার কাঁধে হাত দিয়ে ফর্সা ছেলেটি মৃদুস্বরে কি বলে তাকে সামলানোর চেষ্টা করছিল, কোনো কথাই জগন্নাথের কানে গেল না। সে বুঝতে পারল না ওর এত রাগ কেন। ভিতরের যাবতীয় তীব্রতা চোখে এনে ছেলেটা তার দিকেই তখনো চেয়ে ছিল, দাঁতে দাঁত চেপে বলল— বলুন এম. এ. ডি-ফিল, আমরা ভিক্ষে চাইতে এসেছিলাম?

যা আগে কখনো হয়নি জগন্নাথের আজ তাই হচ্ছিল। সম্ভাব্য, দমকা একটা রাগ ঘূণীঝড়ের মতো উঠে আসছে শরীরের গভীর থেকে! সে প্রাণপণে বুদ্ধি স্থির রাখার চেষ্টা করেছে বলল— ইতরের মতো চোঁচাবেন না। যা বলছেন তা চৌঁচিয়ে বলার মতো কথা নয়। ইডিয়েট!

দু একটা দরজা জানালা আশেপাশে খুলে যাচ্ছে। সিঁড়ি বেয়ে নেমে আসছে পায়ের শব্দ। ছেলেটাকে তখনো তার বন্ধুরা সামলানোর চেষ্টা করছে, তেমনি জেদী কুকুরের মতো দাঁড়িয়ে এক হাতে দরজার ওপর জোর চাপড় মেরে ছেলেটা চৌঁচিয়ে বলল— ইডিয়েট! আপনি এ পাড়ায় লোকদের চেনেন না, কিন্তু এ পাড়ায় আপনার চেয়ে ভদ্র লোকজন কিছু কম নেই এম. এ. ডি-ফিল। তাদের চিনে নেবেন।

—তুমি তো ভদ্রলোক নও। চাপা গলায় হিংস্র জগন্নাথ বলে।

ছেলেটা পলকে সামনে ঝুঁক বলে— কী বললেন? তার মুখে লাল হয়ে ছিল কদর্য বাঁকা স্টোঁট, সমস্ত শরীরে সাপের মতো হিল্‌হিলে ডেউ খেলে যাচ্ছে। সে আবার বলল— কী বললেন?

বনলতার নরম হাত সেই মুহূর্তেই জগন্নাথের কনুই চেপে ধরল—
এই কী হচ্ছে? চলে এসো।

সেই স্পর্শে সমস্ত শরীর দাউ দাউ করে উঠল হঠাৎ। বৃকের ভিতরে
সুপ্ত এক দামামা বেজে উঠল। সে আঙুল ছেলেটার বৃকের দিকে তুলে
চিৎকার করে বলল— তুমি তো ভদ্রলোক নও, স্বাউভেল, তুমি তো
ভদ্রলোক নও।

ছেলেটা পিচ্ছিল গতিতে এগিয়ে আসছিল, পেশাদারদের মতোই সহজ
শীতল ভঙ্গিতে। জগন্নাথ মার ঠেকানোর জন্য হাতও তুলেছিল। কিন্তু
বন্ধুরা ঠিক সময়ে ধরে ফেলল ছেলেটাকে। পেটে বৃকে কয়েকটা হাত
বাড়িয়ে ধরে ওকে টেনে নিয়ে যাচ্ছিল। সে মুখ ফিরিয়ে জগন্নাথকে
বলল— জুতিয়ে তোমার মুখ ভেঙে দেবো। আজকের ব্যাপারটা মনে
রেখো।

জগন্নাথ এক লাফ দিয়ে এগোলো। ধরবে ছেলেটাকে। ছেড়ে দেবে
না। লোক জমে গিয়েছিল বাইরে, বারান্দার নীচে, ফুটপাথেও। সকলের
চোখের সামনেই দৌড়ে বেরিয়ে এসে পথ আটকাল বনলতা—ভিতরে
চল।

—সরে যাও। জগন্নাথ চোঁচায়।

—ভিতরে চলো তো আগে। শাস্ত গলায় বনলতা বলে। তার দুচোখে
চিক্ চিক্ করছে জল। কান্নাটা গলার কাছে ফুলে ফুলে উঠছে। আশ্চর্য
সুন্দর দেখাচ্ছিল বনলতাকে, বাইরের সবাই দেখল, জগন্নাথ দেখল না।
দু হাতে হঠাৎ তীব্র আক্রমণে, সঙ্গমে বাধাপ্রাপ্ত সাপের মতো হিংস্রতায়,
আত্মবিশৃঙ্খলিত বনলতাকে চুল টেনে ধরে সে বলল— ইউ বীচু! পরমুহূর্তেই
ছেড়ে দিল।

বনলতা তবু সরে গেল না। দরজার ভিতরে ঠেলে আনল জগন্নাথকে।
দরজা বন্ধ করে খিল তুলে দিয়ে বলল—ওদের সঙ্গে তুমি কি পারো?

দুহাতে মুখ খামচে বিছানায় বসে পড়ল জগন্নাথ; কিছু করবার নেই
তার। বাস্তবিক কিছুই করবার নেই। তার সমস্ত শরীর থর থর করে
কাঁপছিল, যেন জ্বর আসছে ভয়ঙ্কর। বোধ ও চিন্তার শক্তি ধোঁয়াটে
হয়ে গেছে। উষ্ণ রক্তশোত ছলাৎ ছল্ করে আছড়ে পড়ছে মাথায়,
চোখে কানে, বৃকে, সে অসুস্থ বোধ করে। শ্বাসকষ্ট টের পায়।

বনলতা নিঃশব্দে ভিতরের দরজা দিয়ে ঘর ছেড়ে গেল— বোধ

হয় রান্নাঘরে। কেউ কোনো কথা বলল না।

চূপ করে বসে ছিল জগন্নাথ কিন্তু গভীর জ্বর বিকারের মত তার
মাথার ভিতরে এলোমেলো কথা আসছিল। অসহায়ের মতো সে টের
পেল তার ঠোঁট নড়ছে, কিছু একটা বলছে, কিন্তু কী বলছে তা তার
নিজের কাছেও অস্পষ্ট। অল্লীল গালাগাল, সাঙ্ঘাতিক অপমানের কথা,
কিংবা ঐরকম কিছু হাত মুঠো পাকিয়ে যাচ্ছে আপনা থেকেই। আর
শরীর জুড়ে অবসাদ।

বনলতা অনেকক্ষণ এ ঘরে এল না।

ক্রমশঃ জগন্নাথ অনুভব করছিল শরীরের ভাঁটার টানের মতো একটা
টান, রক্তের অস্বাভাবিক উত্তাপ মেমে যাচ্ছে আস্তে আস্তে। অবসাদ
ভেঙে আনছে তাকে। বোজা চোখ খুলে সে ঘরের দিকে তাকাল!—অচেনা
ঘর। শরতের বেলা শেষ হয়ে ঘরে পাতলা অন্ধকার জমেছে, অথচ
আলো স্বালেনি কেউ। এই ভাল! অন্ধকারে জগন্নাথ চেয়ে রইল—ঘরের
সব আসবাব, জীবনধারণের সব উপকরণকেই হঠাৎ অপ্রয়োজনীয় মনে
হয়। সে এতকাল কতগুলো স্বভাবকে পুষেছে—সে ঘরকুনো, অতিরিক্ত
প্রেমিক, বাইরের জগৎ সম্পর্কে উদাসীন, ঘর তার বরাবর প্রিয়, বাইরেটা
অচেনা রেখে সে তৃপ্তই ছিল, কিন্তু ভুল হয়ে গেছে। সে বুঝতে পারছে
শুধু প্রাণধারণ করে থাকার মধ্যে, শুধু সুখে থাকার মধ্যে কিছু নেই।
সুখের ঘর বারংবার আক্রান্ত হয়। এই ঘর-সংসারের প্রতি তার একটা
অনিচ্ছা জেগে উঠতে থাকে। সে কেন আর বনলতার চুম্বন গ্রহণ করবে!
সর্বাঙ্গ রি রি করে ওঠে ঘৃণায়। গার্হস্থ্য ও সহবাস অকস্মাৎ অশুচি
বলে মনে হয়। সমস্ত ঘরখানা, এই সংসার যেন বনলতার গলায় নিঃশব্দ
এক চিৎকারে বলতে থাকে— ছুঁয়ো না ছুঁয়ো না আমাকে। তুমি এখনো
চান করোনি।

ভীষণ অস্থিরতা বোধ করে সে। উঠে দাঁড়িয়ে একটু পায়চারি করতে
গিয়ে তার অনিচ্ছার সঙ্গে বসে পড়ে আবার। এই ঘর, গত মাসখানেক
এই ঘরে বসবাসকালের মধ্যে কত তুচ্ছ ঘটনা ঘটেছে যেগুলির এক
একটা সুন্দর অর্থ ছিল তার কাছে। মনে পড়ল কিছুদিন আগেও এই
ঘরে তার শিক্ষিত ও বিজ্ঞ বন্ধুদের সমাবেশ ঘটেছিল, যারা সুন্দর কথা
সুন্দরভাবে গুছিয়ে বলতে পারে। তারা বনলতার প্রশংসা করেছিল,
জগন্নাথেরও। তারা ফ্ল্যাটটার প্রশংসা করেছিল, পাড়টারও। এই ঘরে

এসে গেছে বাড়িগুলো অরিজিৎ, যাকে অপমান করেই প্রায় বিদায় দিয়েছে জগন্নাথ।

চিন্তা করলে এতকাল কেবল সহৃদয় এবং সুন্দর পরিবেশই খুঁজে এসেছে জগন্নাথ। সহৃদয় বন্ধু, বাড়িওলা, ট্রামে বাসে সহৃদয় কন্ডাক্টর, বাজারে সহৃদয় বিক্রোতা, কলেজে সহৃদয় ছাত্র ও সহকর্মী। সুন্দরী স্ত্রী, ছিমছাম বড় লোকদের পাড়ায় সুন্দর ফ্ল্যাট—এতকাল এসবই কি চায়নি জগন্নাথ! কে না চায়? কিন্তু এখন তীব্র ও রহস্যময় এক অনিচ্ছার ভিতর দিয়ে সে অনুভব করে যে, এ সবকিছুর তার কাছে প্রয়োজন-শূন্য হয়ে গেছে হঠাৎ। সে জানে এবং বোঝে আজকের বিকেলের এই ঘটনাটুকুও তার আয়ুষ্কালের তুলনায় অতি তুচ্ছ। একদিন সব কিছু ভুল পড়ে যাবে। তবু এর মধ্যেই কোথাও আবহমানকালের চেহারা তার কাছে ধরা পড়েছিল।

অনেকক্ষণ আচ্ছন্নতার ভিতরে রইল সে। এক একবার চোখ বুজেই টের পেল বনলতা ঘরে এল, টুকটাক করে কী যেন করল, আবার চলে গেল। লজ্জায় চোখ খুলল না জগন্নাথ, শুধু বনলতার শরীর থেকে ছড়িয়ে পড়া প্রসাধনের সৌরভ তার কাছে অস্বস্তিকর লাগছিল।

অবশেষে রাত্রিবেলা বনলতা খেতে ডাকলে কিছুক্ষণের জন্য বাস্তুবতার মধ্যে ফিরে আসে সে। নিঃশব্দে খেতে বসল। খেল সামান্যই এবং বনলতা সেজন্য অনুযোগও করল না! হয়তো তার প্রতি একধরনের সাময়িক ঘৃণা এসেছে বনলতারও। ভেবে ভারী খুশী হল জগন্নাথ। বনলতার ঘৃণা যে এত উপাদেয় হতে পারে তা কখনো কল্পনা করেনি সে।

রাত্রি গভীর হলে বনলতার অসহনীয় নৈকট্যে শুয়েছিল জগন্নাথ। চোখ বুজে সে ঘোর-ঘোর দৃষ্টিতে দেখছিল ভীষণ অ্যাভালেন্স নামছে, দূরস্ত তুষার ঝড় দুর্গিরীক্ষ পাহাড়ের চূড়া— তবু কুরা যেন চলেছে। নীচে নিরাপদ পৃথিবী গৃহ ও শ্রিয়জনের সঙ্গে যোগসূত্রহীন তাদের যাত্রা। সে দেখল প্রচণ্ড ঝড়ে সমুদ্রে চলেছে নৌকা, অর্ধনগ্ন কয়েকজন মানুষ মরণগণ চেপে ধরে আছে হাল, কুলকিনারাহীন সমুদ্রের শেষ দেখবে তারা। পৃথিবী জুড়ে চলেছে মানুষের লড়াই, সেইসব লড়িয়ে মানুষদের কর্কশ কণ্ঠস্বর তার ঘুমের মধ্যে ভেসে আসছে, তারা তার নেমপ্লেটে থুথু ছিটিয়ে দিচ্ছে, তার সুন্দরী স্ত্রীর প্রতি ইঙ্গিত করে পরস্পর হাসছে,

তারা তার মেদবহুল চেহারার দিকে হুঁড়ে দিচ্ছে 'দুয়ো', গভীর ডিলিরিয়ামের ভিতরে থেকে নিজের উন্নত রক্তশোতের ভিতর সে উচ্চারিত হতে শুনল—যেনয়োর্তয়ৈর্মধ্যে রথং স্থাপয় মেহচ্চাত।

বনলতার একটা হাত কোমলভাবে তার বুকের ওপর এসে রইল—কী বলছ, এই! প্রশ্ন করে বনলতা।

আবার তীব্র অনিচ্ছা বোধ করে জগন্নাথ, বনলতার হাত সরিয়ে দিতেও তার প্রবৃত্তি হয় না।

বনলতা আস্তে বলল,—দেখ, আজকের ঘটনাটা তো এখানেই শেষ হোল না। ছেলেগুলো ভাল নয়, তার চেয়ে আমরা অন্য কোথাও চলে যাই।

কিছুই উত্তর দিল না জগন্নাথ। সে নিজের গলায় অস্পষ্ট স্বর শুনতে পেল—যাবদেতামিগ্নীক্ষেহহং যদু কামানবস্থিতাম। পরমুহূর্তেই সে সজাগ হয়ে উঠে চোখে হাত চাপা দিল। কোথাও আলো ছিল না, শুধু বুকের কাছে হাঁ করে থাকা জানালা দিয়ে মশারির বাধা ভেদ করে আসছে আবহমানকালের নক্ষত্রমণ্ডলীর আলো। সে সহ্য করতে পারল না। এবার স্বেচ্ছায় সে উচ্চারণ করল—কৈর্ম্যাসহ বোধব্যম্ অস্মিনরগসমুদ্যমে।

পাঁচ

কৌশিক বন্দ্যোপাধ্যায়কে তেমন করে মনে নেই বনলতার। শুধু মনে আছে মাথায় বড় লম্বা ছিলেন ভদ্রলোক, বড় বেশী চওড়া ছিল কাঁধ। শুনেছিল ভাল স্পোর্টসম্যান। দেখেছিল একবার, যখন কনে দেখতে এসেছিলেন কৌশিক। সে সময়ে ভাল করে দেখবার ইচ্ছেও ছিল না বনলতার, কারণ সে জানত এ বিয়ে হবে না। শক্ত ঘাড়ে মাথা নামিয়ে বসেছিল বনলতা—কোনো উত্তেজনা, হৃৎকম্প কিছুই ছিল না তার এবং ভাবতে আশ্চর্য লাগে লজ্জাও কিছুমাত্র বোধ করেনি সে। কৌতূহলবশতঃ একবার চোখ তুলেছিল—বিশাল দুই চোখ নজরে পড়েছিল। আর কিছু মনে নেই।

সকালেই বেরিয়ে গেছে জগন্নাথ। বলে গেল কাজে বেরোচ্ছে, সেখান থেকেই সোজা কলেজে যাবে, আজ খাবে না বাড়ীতে। খুব অন্যমনস্ক আর বিপর্যস্ত দেখাচ্ছিল তাকে যখন সে বেরিয়ে যায়। দাড়ি কামায়নি,

ভাল করে স্নান করেনি আজ। ভাল করে কথা বলছিল না কাল রাত থেকেই—কোথাও কিছু ঘটে থাকবে যা বনলতা জানে না। বিয়ের একমাসের মধ্যেই বিরক্তি ধরল কি জগন্নাথের। বনলতা বোঝে না।

জগন্নাথ বেরিয়ে গেলে কাজকর্মে অবসাদ আসে তার। নিজের জন্য কিছুই করতে ইচ্ছে করে না—স্নান খাওয়াটাকে বাহ্যিক বলে মনে হয়। ঘুরে ঘুরে সে তাই একমাসের চেনা ফ্ল্যাটটাকেই দেখছিল। দরজায় নেমপ্লেট বসিয়েছে— প্রফেসর জে.বোস, এম.এ.ডি-ফিল। সে ফলকটার ওপর কয়েকটা আঙুল রাখল কিছুক্ষণের জন্য। একটু অহঙ্কারের হাসি মুখে ফুটে উঠল তার। কে বিশ্বাস করবে যে, সদর দরজা এঁটে দিলে ঘরের মধ্যে জগন্নাথ অতটা বিচ্ছু। বাইরে, তেমন স্মার্ট নয় জগন্নাথ, কথাবার্তায় পটু নয় তেমন, একটু গভীর প্রকৃতির বলে মনে হয়; আসলে ঘরকুনো, অলস, আর বড় বেশী শান্তিপ্ৰিয়। বাইরে গাভীর্য দিয়ে এই স্বভাব ঢেকে রাখে সে।

সদর দরজা বন্ধ করে ঘরে আসে বনলতা। সমস্ত শরীর অলস, ছেড়ে দেওয়া ভাব। গতকালের খবরের কাগজে কৌশিকের ছবি বেরিয়েছে— বিলেত চলে গেল। জগন্নাথ বলেছিল মনের দুঃখে ভদ্রলোক চললেন ইংলন্ডে। ছবিটা একবার দেখতে ইচ্ছে করছিল, কিন্তু লজ্জায় জগন্নাথের সামনে দেখেনি বনলতা—কাগজটা নিয়েও হেলাফেলার ভাব দেখিয়েছে। এখন কাগজটা খুঁজে দেখল পুরোনো খবরের কাগজের থাকে। নেই। বইয়ের র্যাক, র্যাকের পিছনে, কোণায় কোথাও নেই। মনে পড়ল ঠিকে ঝি উনুন ধরতে কাগজ নিয়ে যায়, রান্নাঘরে কয়লার বুড়ির ওপর জমানো আছে কাগজ! সেখানেও খুঁজে দেখল বনলতা নেই। জ্বা কুঁচকে অন্যমনস্ক বনলতা রান্না ঘরেই দাঁড়িয়ে ছিল। কোথায় গেল কাগজটা! মঙ্গলা পুড়িয়ে ফেলে থাকবে হয়তো। একটু হতাশ বোধ করে সে।

শ্বাস ফেলে আবার শোবার ঘরে আসে। রান্না-বান্না করবে না আজ। একার জন্য কে আর অতটা করে! কিছু একটা পড়লে সময় কেটে যেত, কিন্তু র্যাকের তাক ভরা জগন্নাথের ইংরিজি বই। কিছুদিন ফরাসী ভাষা শিখেছিল জগন্নাথ—সেই সম্পূর্ণ অচেনা ভাষারও কয়েকখানা বই রয়েছে। বাংলা বই যে কখানা আছে তার সব কটা বনলতার অনেকবার করে পড়া।

র্যাক থেকে একটা ফরাসী বই-ই টেনে নিল সে। একটা বালিশ মেঝেতে ফেলে গড়িয়ে পড়ল। উণ্ড হয়ে বইটা খুলে জ্বা কৌচকায় সে—এমন ভাষায় ফরাসীরাও বা কি করে কথা বলে! উল্টে পাল্টে সে বইটা দেখছিল— কয়েকটা ছবি রয়েছে, ফরাসী দেশের নিসর্গ ও নগরের দৃশ্য। অচেনা দেশ, ঘরবাড়ী, অচেনা মানুষ পথ দিয়ে হাঁটছে। দেখতে দেখতে দূরে চলে যাচ্ছিল তার চেতনা, কত দূরে দূরেও রয়েছে মানুষ যাদের সঙ্গে তার কোন যোগসূত্র নেই। বনলতা নামে কেউ যে রয়েছে এখানে, কলকাতায়—কেউ কি জানে? ছোট ফ্ল্যাট, ছোট সংসার—সে জানে অল্প, চায় অল্প, খোঁজে অল্প। এত অল্পের মধ্যে রয়েছে অচেনা বনলতা—কেউ জানেও না। মৃদু হাসি লেগেছিল তার ঠোঁটে। বই পাশে রেখে দিয়ে কাৎ হয়ে শুয়ে থাকে সে। ও সব কিছুই মানুষের অমোঘ নিয়তি থেকে যায়।

কৌশিক চলল বিলেতে। এতক্ষণে হয়তো তার উড়োজাহাজ পৌঁছে গেছে। মাত্র একদিনের দেখা সেই লোকটার জন্য হঠাৎ বুকের মধ্যে হু হু করে ওঠে বনলতার। সে জানে জগন্নাথ স্কলারশিপ খুঁজছে, সুযোগ করার জন্য ঘুরে বেড়াচ্ছে। একদিন সেও রওনা দেবে। কেন যায় অতদূরে মানুষ? তার মন খারাপ হয়ে যায় এমন বিচ্ছিরি আবেশ প্রবণতায়! ছেলেবেলায় স্টেশন থেকে গাড়ী ছেড়ে যেতে দেখলে কান্না পেতো, খুব বড় ফাঁকা মাঠ দেখলে, মেঘশূন্য প্রকাণ্ড আকাশ দেখলে, শবানুগমনের হরিধ্বনি শুনলে মন খারাপ হয়ে যায় আজো। ঠিক সেই রকম মন খারাপ হয়ে যায় দূর বিদেশে কেউ চলে যাচ্ছে শুনলে।

শুয়ে থেকে সে দেখতে পেল খাটের তলায় এলোমেলো হয়ে পড়ে আছে খবরের কাগজ। জগন্নাথের কাণ্ড। সারাদিন যতক্ষণ থাকে বিছানায় হুলস্থূল করে। দেয়াল আর খাটের ফাঁক দিয়ে কাগজটা পড়েছিল মেঝেতে—তাই বনলতা খুঁজে পায়নি। এটাই কিনা কে জানে! তবুও কৌতূহলবশতঃ উঠে হামাগুড়ি দিয়ে ভিতরে ঢুকে কাগজটার জন্য হাত বাড়াল। দেখতে পেল প্রায় অন্ধকার পায়ার কাছ থেকে একটা ইঁদুর তার দিকে চেয়ে আছে। বনলতা তার চোখে চোখ পড়তেই বলল—“টু—কি!” ইঁদুরটা লাফিয়ে পালায়। মুখে মৃদু হাসি, কাগজটা টেনে নিয়ে মেঝের উপর সেটার ধুলো ময়লা ঝেড়ে ফেলে দুয়ের পাতটা খোলে সে। খবরের কাগজ থেকে কৌশিক বনলতার দিকে চেয়ে হেসে

আছে। বনলতা ছবির দিকে চেয়ে রইল। বয়স সাতাশ-আটাশের বেশী নয়, ছবিতে আরো ছেলেমানুষ দেখাচ্ছে। গলায় টাই বাঁধা পরনে সুট—বাঙালী বলে চেনাই যায় না। শব্দ কাঠামোর ওপর প্রাণসার চেহারা—চোখের চাউনিতে হাসিটা ছড়িয়ে রয়েছে, তবু বোঝা যায় সহজে পোষ মানে না, যা চায় তা সহজে ছেড়ে দেয় না। ঠিক তার বাবার মতো। বাবার কথা মনে হলে সে একবার জ্ব কোচকালো, পর মুহূর্তেই ছবির দিকে চেয়ে মৃদু একটু হেসে বনলতা ফিস্ ফিস্ করে বলল—‘হাউ-ডু-ইউ-ডু?’

তারপর হেসে গড়িয়ে পড়ল বালিশে। একরাশ এলোচুল ছড়িয়ে পড়ল চারধারে। বুকের ওপর খোলা খবরের কাগজ মৃদু হাওয়ায় পাশ ফিরছে। হাঁদুর কাগজ কাটছে কোথাও—কুঁকুট শব্দ। সেই হাঁদুরটাই কি, যে বনলতাকে দেখছিল খবরের কাগজ তুলে নিতে? আর কোন শব্দ নেই, শহরতলীর ভিতরে ক্রমশ প্রবেশ করছে রিম্‌বিম্‌ দুপুর। স্নান করেনি বনলতা, খায়নি কিছু দুপুরে। সেই অবস্থাতেই ঘুম পাচ্ছিল। মেঝের নীচে ম্যাটিতে গভীর থেকে উঠে আসছে শীতলতা, ঘুম পাড়িয়ে দিচ্ছে। সে নিজের মাথার ভিতরে এক বিষন্ন উড়োজাহাজের শব্দ শুনতে পায়। কে যেন কেবল দূরে যাচ্ছে, সরে যাচ্ছে তাকে একা রেখে। মনের ভিতরে মাথার ভিতরে কোথায় যেন আড় হয়ে বসে আছে ছোট্ট একটি কাঁটা। কখনো কখনো তুলে সে স্পর্শ করে কাঁটাটিকে। চিন্তার ভিতরে, কাজ ও অবসরের ভিতরে, ঘুমের ভিতরেও তাই হঠাৎ কেঁপে ওঠে বনলতা।

জগন্নাথ কখন আসবে কে জানে। কলেজে বাঁধাধরা ছুটির সময় নেই, কখনো ছুট করে চলে আসে, কখনো দেবী হয়। আজ হয়তো দেবী হবে। কলেজ থেকেই যে সোজা ফিরবে জগন্নাথ এমন কোনো কথা নেই। কাল থেকে দেখছে, জগন্নাথ বড় অনামনস্ক, দূর্শ্চিন্তাশ্রান্ত! ওই ইতর ছেলেগুলোর সঙ্গে কেন যে ও ঝগড়া করতে গেল! কয়েকবার ‘কী হয়েছে,’ জিজ্ঞেস করে ‘কিছু না’ গোছের এড়িয়ে যাওয়া উত্তর পাওয়া গেছে। বেশী জানতে চাইতে লজ্জা করে তার। একমাস পুরো হয়নি, তাদের দু তারিখে কলেজে যেতে বই খাতা নিয়ে বেরিয়ে বিয়ে করতে গেল বনলতা, বুড়ো দাদুর মতো ম্যারেজ রেজিস্ট্রারের সামনে দাঁড়িয়ে দুজন গড় গড় করে সরকারী মন্ত্র পড়ল। স্নায়বিক উত্তেজনায়

জগন্নাথের গলা কাঁপছিল, মুখচোখ কি সিরিয়াস দেখাচ্ছিল তার! ভাবতে হাসি পায় এখন। বিয়ে হয়ে গেলে নার্ডাস জগন্নাথ খামোখা হেঁটে হয়ে রেজিস্ট্রারের পায়ের ধুলো নিল, দেখাদেখি বনলতাও। কিন্তু সেই মুহূর্তে সে যে কেন হেসে ওঠেনি তা আজও বোঝে না। পাশাপাশি হেঁটে বেরিয়ে আসবার সময়ে‘সে ফিস্ ফিস্ করে জগন্নাথকে বলল—এটা বিয়ে নাকি! এটা কি বিয়ে? পিছনে ও সামনে সাক্ষ্যদানকারী বন্ধু ও বান্ধবীরা ছিল, তাই লজ্জিত জগন্নাথ তার প্রায় সাদা টোঁট নেড়ে আস্তে আস্তে জবাব দিল—আমারও ভাল লাগছে না। সেই থেকেই জগন্নাথকে খুব কাছে থেকে দেখছে—কখনো বিষন্ন, কখনো অতিরিক্ত প্রেমিক, কখনো দূর্শ্চিন্তার কাঁটা হয়ে আছে। এখনো অনভ্যাস রয়ে গেছে বনলতার—এত কাছ থেকে চেনা ছিল না তো জগন্নাথকে। নতুন পাড়া, নতুন ফ্ল্যাট, অচেনা লোকজন। এ কোথায় এল সে! ভাবতে ভাবতে উঠে বসে বনলতা। বুঝতে পারে ঘুম আর হবে না আজ। এলো চুল মুঠোয় ধরে শূন্য চোখে চেয়ে থাকে। বুকের কাছেই রয়েছে অদেখা বিদেশ, আর বিদেশের ভয়।

একটু চা করবে কিনা ভাবতে ভাবতে উঠে এলোমেলো পায়ের ঘরটার চারধারে কিছুক্ষণ ঘুরঘুর করল সে। অচেনা ছায়া পড়ে থাকে ঘরের আনাচে কানাচে। বই থেকে মুখ তুলে, কিংবা আয়নায় নিজের মুখের পিছনে হঠাৎ তাকিয়ে, কিংবা রাতে ঘুম ভেঙে জলের গ্লাসের জন্য হাত বাড়িয়ে খুঁজতে গিয়ে কতবার চমকে ওঠে সে, অচেনা লম্বাটে ছায়া ধর্মনষ্টকারী পুরুষের মত দাঁড়িয়ে আছে আলনার পিছনে, দরজার কপাটের সঙ্গে গা মিলিয়ে, টেবিলের তলায় নীচু হয়ে ঢুকে চেয়ে আছে তার দিকে। কেউ জিজ্ঞেস করলে বনলতা এ সব অনুভূতির কথা ঠিক বুঝিয়ে বলতে পারবে না: শুধু নিজেকেই অথৈ রহস্যের মতো মনে হয় তার। এমন হ’ত না যতদিন বাবার কাছে ছিল।

আপন মনে হাসতে থাকে সে। দাঁড়িয়ে ঠিকঠাক করে এলো খোঁপা বেঁধে নেয়। রান্নাঘরে যাবে বলে ভিতরের দরজার চৌকাঠের কাছে এসেছিল সে। খুব জোরে কড়া নড়ে উঠল হঠাৎ। চমকে ওঠে বনলতা, জগন্নাথ নয়, এত জোরে সে কখনো শব্দ করে না। মুহূর্তেই জড়তার ভাব কেটে গেলে সে তাড়াতাড়ি শাড়িটা গুছিয়ে নিচ্ছিল। কড়া নাড়তেই থাকে, বনলতা সাড়া দিল—হাই।

দরজা খুলে দেখে সন্দেশের বাজ্ঞ আর একগাল সরল হাসি নিয়ে
বিশু দাঁড়িয়ে আছে।

—ওমা! বনলতা চোখ কপালে তোলে—তুই!

—আমিই! হেসে সামনের দিকে ঝুঁকে পড়ে বলে—একটা প্রণাম
করব?

তরিতে পিছু সরে গিয়ে বনলতা চেঁচাল—এই, ভাগ!

ঘন নীল টেরিলিনের শার্ট গায়ে, পরনে চাপা সাদা জিন-এর প্যাণ্ট,
বুকের বোতাম খোলা—সেই বে-পরোয়া বিশু। বিশুর মুখ থেকে কখনো
হাসি যায় না। মাথা নেড়ে বলল—যা দেখালি কাণ্ডকারখানা একটু পায়ের
খুলো নিয়ে রাখা ভাল।

দরজা ছেড়ে দিয়ে মুখ টিপে হাসে বনলতা—ভেতরে আয়।

কতদিন আসেনি বিশু, খোঁজ নেয় নি তার। হঠাৎ কানায় কানায়
ভরে উঠল বনলতার মন। বিশু ভেতরে এলে সদরে খিল দেয় বনলতা,
সন্দেশের বাজ্ঞ দেখিয়ে বলে—এ সব আবার কবে শেখা হল শুনি!

—শিখছি। হাতের বাজ্ঞটা বাড়িয়ে দেয় বিশু—নিয়ে নাও হে এই
বেলা।

জু কুঁচকে তাকাতে গিয়ে হেসে ফেলে বনলতা—টিকটিকি কোথাকার,
এখানকার ঠিকানা পেলি কোথায়! বলতে বলতে হাত বাড়িয়ে সন্দেশের
বাজ্ঞটা নেয়।

—পাই নি তো কোথাও! বিশু অবাক-গলায় বলে—রাস্তা দিয়ে
যাচ্ছি, এ বাড়ির সদরে দেখি জমকালো নেমপ্লেট লাগানো। চেনা মানুষ
ভেবে ঢুকে পড়েছি।

—বদমাশ! বনলতা হাসে—বোস না ঐ বিছানায়! এখনো সব
গোছানো হয় নি রে, কিছু মনে করিস না।

কোথাও জড়তা নেই বিশুর হাব-ভাবে। জগন্নাথের ছেড়ে-ফেলা খুতি
গোঞ্জি বিছানার ওপর পড়ে ছিল। বিশু সেগুলো ছুঁড়ে বিছানার অন্যধারে
পাঠিয়ে বসল। দেয়ালে ঠেস দিয়ে বলল—কি খাওয়াবি শুনি!

বনলতা স্টেট ওলটায়—রান্নাই হয় নি আজ।

—কোনদিন হয়?

—মানে!

বিশু একটা বালিশ টেনে নিয়ে কাত হয়ে পড়ে বলল—মানে একটা

ধরে নে না যা সাজিয়ে গুছিয়ে আছি...।

—এই তো বেশ। বনলতা হাসে—বললি না কি করে খোঁজ পেলি?
আমরা ত পালিয়ে আছি।

—লোক লাগিয়েছিলাম। সে তোর হাজব্যান্ডকে কলেজ থেকে ফলো
করেছিল বাসা পর্যন্ত।

—ওমা! বনলতা চমকে উঠে আবার হাসতে থাকে, মুখে আঁচল
চাপা দেয়। পরমুহূর্তেই গভীর হয়ে বলে—এতটা করতে গেলি কেন?
আর তো কেউ খোঁজ নেয় না। তুই কেন এলি!

—তাই তো ভাবছি, কেন এলাম! বিশুকে গভীর দেখায়। বনলতা
বোঝে ভিতরে ভিতরে ও হাসছে। বিশু ঐ রকম, বাইরে থেকে কিছুই
বোঝা যায় না তার। এমন কিছু বয়স নয়, চব্বিশ পাঁচশ হবে। এই
বয়সেই রাণাঘাটের কাছে কোথায় যেন পোলাট্টি করেছে। হাঁস মুগী
নিয়েই মেতে আছে যে তা নয়, এটা ওর এক্সপেরিমেন্ট। ভাল না
লাগলে আবার ছেড়ে ছুঁড়ে দেবে। কত কিছুই শুরু করল বিশু, শেষ
করল না।

—কেমন আছিস! বড় উদাস শোনাল বিশুর গলা!

—ভাল লাগে বুঝি! বনলতা এলোমেলো হাঁটতে হাঁটতে বলল—সব
ছেড়ে ছুড়ে দিয়ে এলাম, প্রায় এক বস্ত্রে!

বিশু হাসল, শব্দহীন হাসি। উদাস দেখাল তাকে।

—নাটক হয়ে গেল না রে? বনলতা হাঁটতে হাঁটতে ভিতরের দরজার
কাছে গিয়ে প্রশ্ন করে।

—একটু।

—তা হোক, বে করেছি। অস্থিরভাবে সে আবার টেবিলের কাছে
আসে, জগন্নাথের টুথব্রাশটা খামোখা তুলে নিয়ে আবার শব্দ করে ফেলে
দেয়, পর মুহূর্তে একটু লাজুক হেসে প্রায় ফিস ফিস করে বলে—একটা
কথা জিজ্ঞেস করি!

—বল না।

—সত্যি করে বলবি কে পাঠিয়েছে তোকে?

বিশু আবার হাসে—যা ভাবছিস তা নয়।

—কি ভাবছি?

—যার কথা ভাবছিস সে পাঠায়নি আমাকে। বিশু মাথা নাড়ে—হি

ইজ্ এ ঢাক গাই।

—কার কথা ভাবছি কি করে বুঝি ?

—বোঝা যায়। বিশু বলে, একজনের কথাই তুই ভাবতে পারিস।

বনলতা থমকে গেল। ক্রমশঃ মুখচোখ কোমল হয়ে এল। তার চোখের পাতা ভারী হয়ে নামল। প্রায় স্থলিত কণ্ঠে বলল—আমার আর কেউ নেই সে তুমি জানো।

অন্যসময়ে হলে বনলতার এ কথা হাস্যকর শোনাতে বিশুর কাছে। বলে ফেলেই বনলতার ডয় করছিল। কিন্তু বিশু হাসল না, স্বাভাবিক চপল গলাতে বলল—এখন আর একজন তো হয়েছে তোরে। প্রফেসর জে. বোস., এম. এ. ডি-ফিল!

—হয়েছেই তো! বনলতা গলা চড়াল।

—আরো হবে। আপনজন মানুষের বেড়েই যায়।

—থাক্। বনলতা বলল—একটু বোস, চা তৈরী করি।

—আমার জন্য কষ্ট করতে হবে না। চা ছেড়ে দিয়েছি, প্রায় দুধ খাই এখন—খাঁটি গরম দুধ।

—বনলতা ঠোঁট ওল্টাল—তোমার জন্যে চা করছি না, নিজের জন্যই করতে যাচ্ছিলাম। আর দুধটুকু চেও না, ওসব কলকাতার ফ্যাশান নয়।

বনলতা চলে যাচ্ছিল। বিশুই ডাকল আবার—এই, শুনে যা!

—কি! ভিতরের দরজার চৌকাঠ থেকে মুখ ফেরাল বনলতা।

—কাছে আয়!

বনলতা আস্তে আস্তে ফিরে এসে ঘরের মাঝখানে দাঁড়ায়। তার বুক কাঁপছিল এবার, বিশুর গলা শুনে। প্রায় ফিস ফিস করে বলল—কি বলছিস!

—যার কথা ভাবছিস তার কথাই বলছিলাম। হঠাৎ গান্ধীর্ষ বেড়ে ফেলল বিশু, হাসিমুখেই বলল—তোর বাবার কথা। আজ সকালে এসে দেখা করতে গেলাম। দেখি বারান্দায় মোড়া পেতে বসে ব্রেডে নখ কাটছেন। স্বাস্থ্য তেমন সাপ্তাহিক আছে, রঙ ফেটে পড়ছে গায়ে।

—ওঃ। একটু বিবর্ণ দেখাল বনলতাকে।

বিশু আঙুলে মাথার চুল জড়াচ্ছিল, বলল—কই খুশী হলি না তো শুনে!

—ভালই তো। ভাল আছে যখন, চিন্তা কি? বনলতা বলল—দাঁড়া,

আসছি।

—আর একটু দাঁড়া! হাসিমুখে বলল বিশু, বলছিলি সব ছেড়ে ছুড়ে একবস্ত্রে চলে এসেছিস। কিন্তু মনে হচ্ছে কিছুই ছাড়তে পারিসনি।

—কিই বা ছাড়ার আছে। জ্ব কঁচকে বলল বনলতা, এখন বুঝতে পারছি ছেড়েই দিল সবাই।

বিশু তেমনিই হাসে, আঙুলে চুল জড়ায়। বলে—ঠিক।

—না। বিশ্বাস কর—তাড়াছড়ো করে বলল বনলতা—আমি চাই না আমার জন্য আর কেউ ভাবুক।

—ডক্টর বোসও নয়?

বনলতা হেসে ফেলল—এত বোকা তুই যে সেই একটা নামই করলি?

বিশু এবারে হাসল—তোর বাবার কথা এখনো শেষ হয়নি। যতদূর জানি তুই চলে আসতে তিনি বিচলিত হননি, তোরে বিয়ের পরদিনও অফিসে গেছেন।

বিরক্ত হয় বনলতা—তাতে কি হ'ল! আমারই বা কি বয়ে গেছে!

বিশু সহজ সুরে বলল—কিন্তু শুনলাম দিন কুড়ি আগে তোরে বাবার একটা স্টোক হয়—থ্রসিস। বিচ্ছিরি অবস্থা হয়েছিল।

বনলতা উত্তর দিল না! যেখানে দাঁড়িয়েছিল সেখানেই হঠাৎ হিম হয়ে জমে গেল তার পা। বিশু তাড়াতাড়ি উঠে যাচ্ছিল, কি ভেবে আবার রসে পড়ল, বলল—ঘাবড়াসনি, এখন ঠিক আছে। তবে আমার মনে হয় তোরা একটু খোঁজখবর করলেও পারতিস্। একেবারে ছেড়ে এলি কেন বুড়ো লোকটাকে?

বনলতা আস্তে আস্তে চোখের জল মুছল আঁচলে। বলল—তাতে লাভ ছিল না কিছুই; মেনে নিত না বাবা।

—মানবে না কেন? বোস খারাপ পাত্র নয়—আমিও খোঁজ নিয়েছি।

—সেটা আমি কম জানি না। কিন্তু বাবা মাত্র এইটুকুই সহ্য করতে পারে না যে জীবনে আমি একবারও জেদ রেখেছি, অবাধ্য হয়েছি তাঁর। পাত্র বড় কথা নয়। কৌশিক ব্যানার্জিকে বাবার পছন্দ হয়েছিল, অথচ আমি জানি ওরকম একটা ছেলেকেও যদি আমি নিজের ইচ্ছেয় বেছে নিতুম, বাবা খুশী হ'ত না। বাবা ঐ রকম।

—যেখানেই হোক, যার কাছেই হোক সেই পোষ মানতেই তো হয়!

বোধ হয় চোখের জল গোপন করার জন্যই বনলতা বিশুর দিকে পিঠ রেখে দাঁড়াল। ধরা গলায় বলল—কেন মানবো?

হঠাৎ শ্বাস ফেলে বিশু বলল—বুঝলাম।

—কি বুঝলি! বনলতা ম্লান হেসে মুখ ফেরায়—তোর তো চালচুলো নেই, আপনজন বলতে কেউ নেই। তুই কি করে বুঝবি?

বিশু একরকম হাসে—তা হলে বোধ হয় ঠিক বুঝিনি।

—মাঝে মাঝে মনে হয় একমাত্র সন্তান হওয়া ভাল নয়। তার ওপর মা মাসী পিসি গোছের কাউকে দেখিনি কখনো। সন্দেহ হয় আমার ভিতরে কিছু পুরুষাঙ্গী স্বভাব রয়েছে। তুই হয়তো ভাবছিস... বনলতা কথা শেষ করে না।

—কি ভাবছিস?

তেমনি ম্লান হাসিটুকু মুখে মেখে বনলতা বলে—কি জানি! হয়তো ভাবছিস আমি হৃদয়হীন, বাবার স্ট্যাক হয়েছিল শুনেও কেমন আছি!

—না তো! তোকে স্বাভাবিক দেখাচ্ছে না। বিশু আস্তে করে বলে।

—কিন্তু আমি বেশ আছি। ভাল আছি। তুই বাবাকে বলিস। বনলতা প্রায় ক্রুদ্ধ গলায় বলে।

বিশু উত্তেজনাহীন হাসি হাসল—উনি তোমার খবরের জন্য ব্যস্ত নন। আমি বরং আজ জিজ্ঞেস করলাম তোমার কথা, উনি শুধু বললেন যে, কোনো খবর রাখেন না। খুব স্বাভাবিক ভাবে বললেন। দীর্ঘশ্বাসও ফেললেন না, গম্ভীর হয়ে গেলেন না।

হঠাৎ ফুঁপিয়ে উঠল বনলতা, আঁচলে মুখ চেপে রুদ্ধশ্বাসে বলল—তবে তুই কেন এলি?

একটু চুপ করে থেকে বিশু বলল—কাঁদছিস কেন? যা করেছিস তা ভালই! অন্যায তো কিছু নয়।

—বলছিস তুই? বনলতা তখনো কাঁদছিল—কিন্তু তুই বললে কি আসে যায়। তুই আমার কে?

—কেউ না। বিশু হাসল।

—ছেলেবেলায় জানতুম তুই আমার ভাই। বড় হয়ে ভুল ভাঙল, দেখি তুই আমার কেউ না, রক্তের সম্পর্ক নেই। ও রকম ভুল কেন শেখানো হয়েছিল তবে?

বিশু হাসে—কি সব বলছিস! অনেক সময় ভাল হবে ভেবেই

লোকে ভুল শেখায়।

—হবে। বনলতা দুই লাল ছলছলে চোখ বিশুর চোখে রাখল, ধীর গলায় বলল—কে জানে আরো কত কি ভুল শিখে বসে আছি! একদিন হয়তো জানব যাকে বাবা বলে জানি, কিংবা যাকে স্বামী বলে জানি তারা কেউই আমার কিছু নয়! দুম করে বোমা ফাটিয়ে কানের কাছে এসব কথা বলে যাবে কেউ।

বিশু হঠাৎ মাথা নামিয়ে ভিন্ন সুরে বলল—হ্যাঁরে, তোমার কর্তা সিগারেট খায় না? আমার ভীষণ সিগারেট খেতে ইচ্ছে করছে। থাকে তো দে না। এই বইটি www.boiRboi.blogspot.com থেকে ডাউনলোডকৃত।

বনলতা নিঃশ্বাস ফেলে চুপ করে দাঁড়িয়ে থাকে। বিশু বলে—চা করলি না। মাথা ধরে গেছে কিন্তু।

বনলতা হাসল, হঠাৎ তার দুই চোখ স্নেহে লেহন করল বিশুকে। ধরা গলায় বলল—তবু কেন যে তোকে এত ভালবাসি বুঝি না।

বিশু দুই হাত তুলে বলল—থাম্। স্পষ্টতই অস্থির দেখাল বিশুকে। গম্ভীর হয়ে বলল—তোমার হয়তো মনে নেই, কিন্তু আমার আছে। ছেলেবেলায় যখন আমাদের প্রথম দেখা হয় তখন একবার তুই আমাকে বিয়ে করতে চেয়েছিলি। আমি তোমার বাবাকে বলে দেব বলে ভয় দেখিয়েছিলাম তোকে।

—যাঃ! থিল্ থিল্ করে হেসে ওঠে বনলতা, হাসতে হাসতে কোমর ভেঙে উপুড় হয়ে কাঁপতে থাকে। চোঁচিয়ে বলে—কে বলল মনে নেই!

তারপর সামলে নিয়ে আবার দাঁড়ায় বনলতা, মুখে হাতচাপা দিয়ে স্মিত গলায় বলল—সে তখন বিয়ের মানে বুঝতুম না বলে।

—এখন বুঝিস? বিশু স্নিগ্ধ গলায় বলে!

বনলতা কথা না ব'লে মাথা নাড়ল। হ্যাঁ।

—ছাই বুঝিস। বিশু উদাস গলায় বলে।

—মানে?

—মানে বললে তুই খুশী হবি না।

বনলতা জ্র কোঁচকায়—যেন কত খুশী হওয়ার মতো কথাবার্তা বলছে আজ।

—বলব? বিশু হেসে বলল—তুই বরাবর নাটক করতে ভালবাসিস। বোসকে বিয়ে করার জন্য ততটা নয়, যতটা নাটক করার জন্যই তুই

হঠাৎ বিয়েটা করলি। নইলে একটা নেগোশিয়েট করার সুযোগ ছিল।

—ছাই। বনলতা থমথমে মুখে বলে— বাজে কথা বলিস না।

—হয়তো আমারই ভুল। বলে বিশ্ব—এবারে একটু চা কর, বনা!

কি বলবে বলে একটু ইতস্তত করল বনলতা। তারপর ফিক্ করে হেসে বলল—একটা কিছুত তুই। পর মুহূর্তেই গম্ভীর হয়ে গেল।

—তোর কথা কিছুই শোনা হল না। কিছু বলছিস না কেন, এই! বিশ্বর হাতে চায়ের কাপ দিয়ে বলল বনলতা। তারপর বসল খাটের ওপর— পাশাপাশি—হেসে বলল—কোথায় যেন কি সব ছাইভস্ম করছিস! একদিন তো নিয়েও গেলি না দেখাতে।

বিশ্ব বেদম জোরে চুমুক দেয় চায়ে। উত্তর দেয় না। বনলতা ওর চুলের মুঠি ধরে নেড়ে দিল—এই!

—কি বলব? বিশ্বর গলা উদাস।

—তোর কথা বল। কেমন আছিস ওখানে?

—ভাল। চমৎকার!

—দু চোখের বিষ। বনলতা স্নিগ্ধ হাসে—মন কেমন করে না তোরা!

—কেন করবে! হঠাৎ বিশ্বর গলা খুব নরম শোনাল!

বিশ্বর চোখ টানা টানা নয়, তবু বনলতা দেখল কয়েক পলকের জন্য। সেই চোখ স্বপ্নাতুর হয়ে গেছে। আস্তে আস্তে দূর গলায় বলল বিশ্ব—জানিস, আমি একটা পুকুর কেটে মাছ ছেড়েছিলাম। এখন সেগুলো বড় হচ্ছে। আমাকে চিনছে ওরা, হাত থেকে খাবার ঠুকরে খেয়ে যায়, পায় না। আমার মুরগীগুলো কাঁধে এসে বসে, মাথায় ঠুকরে দিয়ে চেঁচায়! হাঁসগুলোও এমন চিনেছে, আমার সাজা পেলে জল থেকেও ছুটে আসবে।

কথা বলতে বলতে থেমে তেমনি চেয়ে ছিল বিশ্ব। হাতের চা জুড়িয়ে যাচ্ছে খেয়াল ছিল না ওর। সামনের দেয়ালের দিকে চোখ, অথচ দেয়ালেও নয়, কোথাও নয়। একটু অস্থির বোধ করে বনলতা—সেই অধিকার, সেই ভালবাসার কথা এখানেও। বিশ্ব হঠাৎ হাসে, মুখ ফিরিয়ে বলে—যাবি একদিন? চল না!

—যাব। বনলতা বলল—কিন্তু তোরা মাছগুলো কি আমার হাত থেকে খাবে! ভয় পাবে না!

বিশ্ব ঠক্ করে চায়ের কাপ রেখে দিল। বলল—আজ ফিরে যাব।

ট্রেন একটা রয়েছে এখন। হাত বাড়িয়ে বনলতার একটা হাত টেনে নিল—বেস্ট অব্ লাক্, বনা। চলি।

চোখে জল টলমল করছিল বনলতার, বলল—আবার কবে আসবি? ছেড়ে দিবি না বল।

—দূর পাগল। প্রায়ই আসব। বিশ্ব হাসে—আচ্ছা, বনা। হাত তুলল।

দরজা খুলে বারান্দায় নামল বিশ্ব। তারপর রাস্তায়। ঘুরে তাকিয়ে হাসল। বনলতা দরজার কাছ থেকে হাত তুলল, ফিস্ ফিস্ করে বলল—আচ্ছা, বিশ্ব।

অনেকক্ষণ দাঁড়িয়ে রইল দরজায়!

দরজা বন্ধ করতেই গাল বেয়ে চোখের জলে বুক ভাসল বনলতার। অকারণ। আগে লক্ষ্য করেনি, কিন্তু এখন বুঝতে পারছে সমস্ত ঘর জুড়ে আছে শূন্যতা। সে যেন কুল কিনারা পায় না। বনলতা হঠাৎ হাত জোড় করে বুক রাখে। অনুভব করে বহু যোজন বিস্তৃত এক শূন্যতা রয়েছে চারিদিকে, যার হাতগুলি পড়ে আছে সারা পৃথিবীময়। কোথায় পালাবে বনলতা! বড় অসহায় সে আর তার হৃদয়। শুধু বোঝে। তাকে একবার স্পর্শ করবে বলে—সে যে-দিকেই পা বাড়াক—সে-দিকেই শূন্যতার সেই হাত অঞ্জলি পেতে আছে।

হয়

শিয়ালদায় এসে বিশ্ব দেখল তার ট্রেনটা মিনিট দুই আগে ছেড়ে গেছে। পরের ট্রেন ঘণ্টা দেড়েক পর। এটা তার অন্যমনস্কতার দোষ। বনলতার কাছ থেকে চলে আসবার পথেই আস্তে আস্তে সে বিষন্ন অন্যমনস্ক হয়ে যাচ্ছিল। বাস স্টপের খুব কাছে এসে সে দেখতে পেল, একটা বাস এসে থামল। দৌড়ালে বা জোর কদমে হাঁটলে ধরা যেত বাসটা। কিন্তু সে তো করেনি। বাসটা যে ধরা দরকার, নইলে ট্রেন পাওয়া যাবে না—এত কথা খেয়ালই হয়নি তার।

বারান্দা থেকে নেমে সে একবার ঘাড় ঘুরিয়ে হাতটা তুলে বলেছিল,— আচ্ছা, বনা, চলি। দেখেছিল এত বড় বড় দুই চোখ ভরে জল টস্ টস্ করছে বনলতার। হাত তুলে ফিস্ ফিস্ করে বনলতা বলল— আচ্ছা, বিশ্ব। অমনি টপ্ করে জল ঝরে পড়ল চোখ থেকে। কিন্তু আর ফিরে তাকায়নি। জানে বনলতা এখন কাঁদবে।

আজ বনলতার ঘর-সংসার দেখে এল বিশু। আর বনলতাকেও। খুব বেশী প্রশ্ন করেনি বিশু, খুব বেশী জানতে চায়নি। বরং চূপ করে থেকেছে, বনলতাকেই কথা বলতে দিয়েছে বেশী। ভাল করে লক্ষ্য করেছে, ঘরদোর আর সাজানো-গোছানো সামান্য আসবাবপত্র। দেখার বেশী কিছু ছিল না, মাত্র একমাসের পুরোনো ওদের সংসার। তবু বিশু কিছু একটা অনুভব করতে চাইছিল। চোখ কান দিয়ে যা বোঝা যায় তা নয়। তার চেয়ে কিছু বেশী। ঠাট্টা করে বিশু বলেছিল, কি খাওয়াবি বল! ঠোঁট উল্টে বনলতা বলল—রান্নাই হয়নি আজ। মনে মনে একটু চমকে গিয়েছিল বিশু। কোনদিন একবেলা না খেয়ে থেকেছে—বনলতা—এমনটা মনে পড়ে না। মা নেই বনলতার ছেলেবেলা থেকেই। ওদের বাপ-বোটার সংসারে তাই লক্ষী পূজা, শিবরাত্রি বা ব্রত-উপোস বলে কিছু ছিল না। সরস্বতী পূজার অঞ্জলির দেবী হলে, কেঁদেছে সে অনেকবার। তাছাড়া বিশু জানে বনলতার সবচেয়ে প্রিয় খাবার ভাত। দিনে তিন চারবার সে ভাত খেতো। তাই রান্না হয়নি শুনে চমকে গিয়েছিল বিশু। তবু কোনো প্রশ্ন করেনি। যেন বনলতা না ভাবে যে বিশু গোয়েন্দাগিরি করছে। সে লক্ষ্য করল, বনলতার পরনে নোংরা বিস্ত্রী একটা শাড়ী খুব এলোমেলো করে পরা, চুল রুক্ষ—বোঝা যায় যে আজ চান করেনি! মেঝেতে একটা বালিশ আর খবরের কাগজ পড়ে ছিল। এখন গরমের সময় নয় যে মেঝেতে শুতে হবে। এই সবগুলো মনে মনে যোগ করল বিশু। বনলতার জন্য বড় কষ্ট হচ্ছিল তার। যখন চা করতে গেল বনলতা তখন সামান্য কৌতূহলবশত মেঝে থেকে খবরের কাগজটা তুলে নিয়েছিল বিশু। একদিনের পুরোনো কাগজ। বিশু জানে, কালকের কাগজে কৌশিক ব্যানার্জীর একটা ছবি ছাপা হয়েছে। কৌশিক বিলেত চলে গেল এই খবরটা ছবিসহ ছাপা হয়েছে। বিশু দেখল, খোলা পাতায় কৌশিকের ছবিটাই রয়েছে। বনলতা এতক্ষণ এইটি দেখছিল।

না কৌশিকের সঙ্গে পরিচয় ছিল না বনলতার। শুধু একবার দেখা হয়েছিল যখন বনলতাকে দেখতে এসেছিল কৌশিক। কিন্তু সে সম্বন্ধ বনলতাই ভেঙে দিয়েছিল। তারপর মাসখানেক আগে সে জগন্নাথকে বিয়ে করল গোপনে, কাগজে সই করে। তারপর পালিয়ে এল। জগন্নাথকে কি করে ভালবাসল বনলতা তা বিশু জানেই না। সে দেখেওনি ভদ্রলোককে।

শুনেছে জগন্নাথ বোস অধ্যাপক, এম-এ. ডি-ফিল।

তবে এখন দুপুরের নির্জন ঘরে পুরোনো খবরের কাগজ খুলে কৌশিকের ছবি কেন দেখছে বনলতা? সামান্য দ্রু কুঁচকে কথটা ভাবতে ভাবতে বিশু আবার যেনম ছিল তেমনিভাবেই মেঝেতে রেখে দিল কাগজটা।

বনলতার ভালবাসার খবর বিশু রাখত না। সে জানে সহজে কাউকে ভালবাসার মেয়ে নয় বনলতা। সে শুনেছে জগন্নাথের সঙ্গে বনলতার পরিচয়ও খুব বেশী দিনের ছিল না। এত সহজে কি করে বিয়ে হয়ে গেল ভেবে পেল না বিশু। অনেক খুঁজে খুঁজে সে তাই ওদের ঠিকানা যোগাড় করেছিল। সময় বুঝে দুপুরবেলাতেই গিয়েছিল যাতে বনলতাকে একা পাওয়া যায় আর সারাক্ষণ চোখ-কান এবং চোখ-কানের অতীত একটা অনুভূতিকে সজাগ রেখে, বাইরে একটা হেলাফেলার লোকদেখানো ভঙ্গী করে বসেছিল। খুব বেশীক্ষণ থাকেও নি সে কিন্তু এখন দুপুরের প্রায় ফাঁকা শিয়ালদার প্লাটফর্মে দাঁড়িয়ে সিগারেট ধরাতে ধরাতে তার মন বলছিল কোথাও কিছু একটা গোলমাল হয়ে গেছে! বিশুকে দেখে এমন আকুল কোনোদিন হয়নি বনলতা। ঠাট্টায় গাঁট্টায় তাদের সম্পর্ক ছিল। অথচ আজ চলে আসার আগে বনলতা তার দুই হাত ধরে বলল, ‘আবার কবে আসবি? ছেড়ে দিবি না বল!’ তখন থেকে কথটা মাথায় ঘুরছে বিশুর। কেবলই মনে হয়, কথটা এমনভাবে বলেছিল বনলতা, যেন তার মধ্যে একটা নিহিত অর্থ আছে! আজ বড় অস্বাভাবিক দেখাচ্ছিল বনলতাকে, বড় চঞ্চল অস্থির।

এটা সত্যিই ভালবাসা কিনা কে জানে! বিশুর সন্দেহ হয় এখন। এমন হতে পারে যে, এটা বনলতার অ্যাডভেঞ্চার। রাশভারী বাবার বিরুদ্ধে গিয়ে গোপনে অসবর্ণ বিয়ে করার মধ্যে একটু হয়তো উত্তেজনা আছে। তার বেশী কি কিছু ছিল? আজকালকার বাঙালী মেয়েরা অধিকাংশই এরকম বিয়ে করে। না বুঝে, না জেনে, কেবলমাত্র নাটকীয়তাটুকুর জন্য কখনো বা সাময়িক ভাবাবেগের জন্য; বনলতা অতটা হালকা নয়। তবু বিশুর সন্দেহ হতে থাকে। বনলতা অতিমাত্রায় সুন্দরী, ইচ্ছেমতো যাকে খুশী বিয়ে করার সুযোগ তার ছিল। কিন্তু বিয়েটা কি সত্যিই ভেবে করেছে বনলতা? সে ঠাট্টার ছলে আজ বনলতাকে বলেছে, ‘আসলে তুই নাটক করতে ভালবাসিস। বোসকে বিয়ে করার জন্য ততটা নয়, যতটা নাটক করার জন্য তুই এটা করলি। নইলে নেগোশিয়েট

করার সুযোগ ছিল।' শুনে খুশী হয়নি বনলতা।

প্ল্যাটফর্মে একটু পায়চারী করছিল বিশু। ঘড়িতে দেখল এখন সোয়া এক ঘণ্টার ওপর দেবী আছে গাড়ির। সারাটা দিন তার কলকাতায় কাটল। এ শহরের ভীড় গণ্ডগোল এখন আর তার ভাল লাগে না। রাশাঘাটের কাছে তার ছোট্ট পোলট্রিতে পোষা হাঁস মুগীগুলো তার অপেক্ষায় আছে। সে গেলেই ঝাঁপিয়ে আসবে, ঘিরে ধরে নিজেদের ভাষায় প্রশ্ন করবে তাকে— এতক্ষণ কোথায় ছিলে? দেবী করতে ইচ্ছে করছিল না তার। অস্থির লাগছিল। তবু এক সময়ে পায়চারী থামিয়ে সে প্ল্যাটফর্মের বেঞ্চিতে বসল। বনলতার জন্য তার অস্থিরতা আরো বেশী—এটা সে টের পাচ্ছিল।

অথচ ডেবে দেখতে গেলে বনলতা তার কেউ নয়। ছেলেবেলার বেশ দীর্ঘ একটা সময় সে বনলতাদের আশ্রয়ে ছিল। বনলতা জানত যে বিশু তার ভাই। বিশু জানত যে, তা নয়। বনলতার মা ছিল না, ভাইবোনও আর কেউ ছিল না, শূন্য ফাঁকা বড় বাড়িটায় একা একা তার দিন কাটত। তাই বিশুকে এনে দেওয়া হল তার ভাই বলে। বড় হয়ে উঠে বনলতার সে ভুল ভেঙেছিল। কেঁদে সারা হয়েছিল সে। তারপর বরং আরো গভীর হয়েছিল তাদের সম্পর্ক। বনলতা জানে, বিশু তার ভাইয়ের চেয়েও কিছু বেশী। বিশু জানে বনলতা তার বোনের চেয়েও কিছু বেশী। কিন্তু ঠিক সে কী তা কেউই জানে না। কিশোরী বয়সে একবার না বুঝে বনলতা বিশুকে জিজ্ঞেস করেছিল, 'বিশু আমাকে বিয়ে করবি?' সে কথা মনে পড়লে আজও হাসি পায় বিশুর। না, বনলতাকে কোনদিনই বিয়ে করার কথা ভাবতে পারেনি বিশু। সে ছিল বনলতার খেলার পুতুল। বনলতা তাকে বিনুকে করে দুধ খাওয়ানোর নকল খেলা খেলেছে, ঘুম পাড়িয়েছে, কখনো বা পুতুলের মতো সাজিয়েছে তাকে। বনলতার সেই আদর মনে পড়লে আজো মাঝে মাঝে মন উদাস হয় বিশুর। সে জানে যে, সে প্রায় কুড়িয়ে পাওয়া ছেলের মতোই নিরাশ্রয় ছিল, দেশভাগের পর সেই ভীষণ গণ্ডগোল, অনিশ্চয়তায় দিশেহারা তার শিশুমনটি বনলতার সুখের সংসার ধনে জনে ভরে উঠবে তখন সে বনলতার কাছে গিয়ে বুড়ো বয়সে বলবে, 'বনা, একদিন আমি তোমার ভাই ছিলুম, ছিলুম খেলার পুতুল, আজ তুই আমাকে তোমার ছেলে করে নে। আমি তোমার বুড়ো ছেলে বনা।' এসব কথা কখনো

বনলতাকে বলেনি বিশু। শুনলে তেড়ে মারতে আসবে বনলতা। বনলতার বাইশ চলছে, আর তার সাতাশ।

তবু নিজের কাছে স্বীকার করতে বাধ্য নেই বিশুর যে সে বনলতাকে ঠিক অতটা ভালবাসে। সে জানে, অস্তুর থেকে জানে যে, বোন বলেই হোক, মা বলেই হোক—বনলতার সঙ্গে আমৃত্যু তার একটা সম্পর্ক থাকবেই। পৃথিবীতে তার সবচেয়ে প্রিয়গুলির মধ্যে একটি হচ্ছে বনলতা।

প্ল্যাটফর্মের বেঞ্চে একা বসে থেকে অনেকক্ষণ কেবল সিগারেট খেয়ে গেল বিশু। তার মন ভার লাগছিল। বড় অসুখী লাগছিল নিজেকে। বিয়েটা করার আগে বনলতা যদি একবারও মনে করে তাকে ডাকত! বিশু বনলতাকে কোনো ভুল করতে দিত না। অবশ্য বনলতা ভুল করেছে কিনা তা বিশু এখনো জানে না। জগন্নাথকে বিশু এখনো দেখেনি।

ভাবতে ভাবতে হঠাৎ সোজা হয়ে বসল বিশু। তাই তো! ইচ্ছে করলে জগন্নাথকে সে দেখে যেতেই পারে। দোষ কী? লেখাপড়া বেশী শেখেনি বিশু, পণ্ডিত মানুষদের তাই সে এড়িয়ে চলে। তবু এখন সে-সব সন্ধ্যা বড় একটা ডাবাল না বিশুকে। সিগারেটটা ছুঁড়ে দিয়ে সে উঠে পড়ল। গেট-এর টিকিট চেকারের বাড়ানো হাতখানা ঠেলে সরিয়ে সে তড়িৎগতিতে বেরিয়ে এল। জগন্নাথের কলেজ খুব বেশী দূর নয়। ইচ্ছে করলে সে পরের ট্রেনটায় যেতে পারে কিংবা রাতের যে কোনো ট্রেনে।

বড় রাস্তায় এসে বিশু ট্রাম ধরল। জগন্নাথের কাছে নিজের কী পরিচয় দেবে সেটাই একটু ভাবছিল সে। যদি বলে যে, সে ওদের আশ্রিত ছিল, তবে হয়তো জগন্নাথ তাকে পান্ডাই দেবে না। তাছাড়া বনলতার সঙ্গে তার যে সরল একটা সম্পর্ক রয়েছে, সেটাও বাঁকাভাবে বুঝতে কতক্ষণ। তাছাড়া জগন্নাথের কাছে গিয়ে কীই বা জানবে বিশু। চেহারা দেখে আর দু-চারটে কথা বলে আর কতটুকু জানা যায়? আর যদি সত্যিই দেখে জগন্নাথ বনলতার ঠিক স্বামী নয়, যদি দেখে জোড় মেলেনি, তবে বিশুর আর কী করার থাকবে? চিরকালের জন্য বনলতাকে অসুখী জেনে ফিরে আসবে কি সে?

তবু তাও ভাল। রহস্য পরিষ্কার হয়ে যাক। তারপর না হয় সে তার পোলট্রি হাঁস-মুরগীর কাছেই পালিয়ে যাবে, আর আসবে না কখনো

কলকাতায় কিংবা বনলতার মুখোমুখী হবে না কোনোদিন।

একসময়ে তার এও মনে হল যে, সে অকারণ বাড়াবাড়ি করছে। আসলে পালিয়ে বিয়ে করার পর মনের অবস্থা এরকমই হয়। হয়তো বাবা বা বিশুর কাছ ছাড়া হয়ে থাকার প্রথম ধাক্কাটা লেগেছে বনলতার। আবার সামলে উঠবে। হয়ত জগন্নাথের সঙ্গে একটু মান অভিমান চলছে তার। ঠিক হয়ে যাবে।

কিন্তু আপনমনেই আবার মাথা নাড়ে বিশু। তা নয়। বনলতার নাড়ী-নক্ষত্র তার জানা।

হু হু করে বয়ে যাচ্ছে ট্রাম গাড়ি। রড ধরে দাঁড়িয়ে একটু কুঁজো হয়ে বিশু তার স্টপ এল কিনা লক্ষ্য করছিল। ঘড়ি দেখল। তিনটে বেজে সাত মিনিট। এখনো জগন্নাথ কলেজে আছে কিনা কে জানে! যদি না থাকে, তবে বিশুকে আর একদিন আসতে হবে।

কলেজেই ছিল জগন্নাথ। ক্লাসে। একটু বসতে হল বিশুকে কমনরুমে। সে একটা সিগারেট ধরাল তারপর একটু ভেবেচিন্তে সেটা নিভিয়ে আবার পকেটে রেখে দিল। সামান্য স্নায়বিক উত্তেজনা বোধ করছিল সে। বনলতা আর জগন্নাথের ব্যাপারের মধ্যে সে একটু অদ্ভুতভাবে জড়িয়ে যাচ্ছে। এতটা না করলেই বোধহয় ভাল হত। আবার পিছিয়ে যেতেও তার অনিচ্ছা। সে বার বার ঘড়ি দেখছিল। ক্লাস শেষ হতে এখনো মিনিট কুড়ি বাকী। সে খোঁজ নিয়ে জেনেছে যে এটাই জগন্নাথের শেষ ক্লাস। এরপর সে চলে যাবে। অল্পের জন্য সে জগন্নাথকে পেয়ে গেছে।

বসে বসে বনলতার কথা ভাবছিল বিশু। কতভাবে জীবনকে এই অল্পবয়সেই দেখেছে বিশু। বনলতা দেখেনি। সে ছিল পুরুতের ছেলে। দেশভাগের পর এখানে এসে সে ফুটপাতে শুয়েছে, রাস্তায় কাগজ কুড়িয়েছে, চায়ের দোকানে বয়ের কাজ করেছে, কতরকমভাবে মার খেয়েছে লোকের কাছে। মাত্র সাত বছর বয়সেই তার বুড়োদের মতো পাকা মাথা তৈরী হয়ে গিয়েছিল প্রায়। সে জানে ক্রমে সে চোর-পকেটমারদের দলেও চলে যেতে পারত। অন্তত ঐ রকম উচ্চাশা ছিল তার। বনলতা কিছুই দেখেনি। আহা বনলতার জন্য তাই বড় মায়া বিশুর। এ জীবনের নোংরা বিস্তী দিকটা সে কোনদিন না দেখুক। কখনো সখনো বনলতার কাছে সে তার সাত বছরের অভিজ্ঞতার কথা বলেছে। বনলতা কাঁদতো, মেয়েলী স্বভাববশতঃ তাকে আরো বেশী

ভালবাসতো। বড় হয়ে বিশু আর বলত না। থাক বনলতা সুন্দর আর সুকুমার থাক। অত বুঝে তার কাজ নেই।

ভাবতে ভাবতে হঠাৎ চোখে জল আসছিল বিশুর। জাত-ধর্ম বনলতা বোঝে না। তাকে কেউ কখনো শেখায়নি। বিশু পুরুতের ছেলে। সে অনুলোম প্রতিলোম বোঝে। কিছুতেই তার সে সংস্কার যায় না। বোধ হয় যাবেও না কোনদিন। বামুনের মেয়ে হয়েও বনলতা জগন্নাথ বোসকে বিয়ে করেছে। প্রতিলোম। প্রতিলোম-জাত সন্তানেরা বর্ণশঙ্কর, সমাজের ক্ষতিকারক। এই বিয়ে বিশ্বাসঘাতকদের জন্ম দেয়। বনলতা এইসব জানেও না। বুদ্ধি দিয়ে বিচার করলে বিশুও মানে না। আজ যে কথাটা হঠাৎ মনে পড়ল, তার কারণ বোধ হয় বনলতার এই অসহায় ভাব আর অস্থিরতা। কি জানি, প্রতিলোম বলেই বনলতা সুখী হচ্ছে না! খুব উত্তেজিত হয়ে বিশু ভাবছিল ভবিষ্যতে সে সম্ভব হলে প্রতিলোম বিয়ে বন্ধ করারই চেষ্টা করবে।

ঘণ্টা পড়তেই বিশু উঠে দাঁড়াল। লোকের কাছে শুনে যে জগন্নাথের আবছা একটা চেহারা মনে মনে ঠিক করে রেখেছিল সে কমনরুমের বাইরে এসে দাঁড়াল।

জনা দুয়েক বয়স্ক প্রফেসর ঘরে ঢুকে গেল। তৃতীয়জন লম্বা ফর্সা, চোখে কালো ফ্রেমের ভারী চশমা। সুন্দর কিন্তু একটু মেয়েলী কোমল মুখশ্রী। এই জগন্নাথ—বিশু চিনে নিল। তারপরই এক-পা এগিয়ে পথ আটকাল—আপনিই প্রফেসর বোস?

ভীষণ চমকে গেল জগন্নাথ। যতটা চমকাবার কথা তার চেয়ে বেশী। তাকে বিবর্ণ এবং খুব বিচলিত দেখাচ্ছিল। গভীর কালো কিন্তু দুর্বল এবং অস্থির দুটি চোখে বিশুকে দেখে অল্প মাথা বাঁকাল জগন্নাথ, হ্যাঁ আমিই—কিন্তু—

বিশু বুঝতে পারল জগন্নাথ শব্দ ধরনের পুরুষ নয়। এভাবে তার হঠাৎ পথ আটকানো ঠিক হয়নি। লজ্জা পেল বিশু। হাতজোড় করে বলল—আমাকে আপনি ঠিক চিনবেন না। আমি বিশু। আমি বনলতার ভাই।

তবু কিছুক্ষণ বুঝতে পারল না জগন্নাথ। বোকার মতো অসহায়ভাবে তার দিকে চেয়ে রইল। তারপর হঠাৎ তার মুখে বর্ণের পরিবর্তন দেখা দিল। সামান্য লাল হয়ে গেল তার মুখ। হাসল, ওঃ হোঃ বিশু আরে,

আপনি তো আমার মস্ত কুটুম।

সামান্য ভড়কে গিয়েছিল বিশু প্রথমটায়। এখন জগন্নাথের ঠাট্টা শুনে হাঁক ছেড়ে হাসল। বলল— বনার সঙ্গে দেখা করেই আসছি। আমি তো আর বিয়ের খবর পাইনি!

জগন্নাথ হঠাৎ চোখের একটু ইশারা করে বলল—বাইরে সব কথা হবে। ইঙ্গিতে কমনরুমটা দেখিয়ে বলল— এখনো সবাই ঠিক জানে না।

রেজিস্টার খাতা দুটো কমনরুমের টেবিলে ফেলে দিয়ে বেরিয়ে এল জগন্নাথ। বলল—চলুন।

পাশাপাশি হেঁটে বেরিয়ে এল দুজনে। অনেকক্ষণ কথা বলল না জগন্নাথ। কলেজের এলাকা ছেড়ে যখন অনেকটা চলে এল দুজনে, যখন আর রাস্তায় ছাত্রদের দেখা যাচ্ছিল না, তখন থেমে একটা-সিগারেট ধরাল জগন্নাথ। প্যাকেটটা বাড়িয়ে দিয়ে বলল—বলুন এবার।

বিশু বলল, আপনার সঙ্গে পরিচয় করতে এলাম।

—বর্শ করেছেন। রাণাঘাটে আপনার পোলট্রির কথা আমি শুনেছি। একদিন যাওয়ার ইচ্ছে আছে। তারপর একটু হেসে জগন্নাথ বলল—বনলতা অতিথি সংকার ঠিকমতো করেছে তো।

বিশু হেসে মাথা নাড়ে—আমি আপনার অতিথি। বনার নই। আপনি থাকলে ঠিক ঠিক সংকার হতে পারত।

এসব কথা বলার জন্যই বলছিল বিশু। কিন্তু সব সময়ে সে চোখের কোণ দিয়ে লক্ষ্য করছিল জগন্নাথকে। তার হাঁটার ভঙ্গী, কথা বলার সময়ে তার ঠোঁট নড়াচড়া তার চোখ। ঠিক কী সে দেখতে চায় বা কী খুঁজছে সে তো নিজেও জানে না! সে অপেক্ষা করছিল। আরো একটু সময় লাগবে। সহজ ভদ্রতার কথাবার্তা বা লঘু ঠাট্টার ভিতর থেকে কিছুই বোঝা যাবে না। মানুষকে দেখতে হয় তার ঘটনার ভিতরে। ঘটনার প্রতিক্রিয়াই মানুষের চরিত্র ধরিয়ে দেয়। সে যখন প্রথম আটকাল তখন কেবল এইটুকু বুঝতে পেরেছিল, যে লোকটা শক্ত স্নায়ুর লোক নয়। অকারণ দুশ্চিন্তায় ভোগে। এবার আরো একটু জানতে হবে তাকে।

বিশু বলল—চলুন কোথাও বসি!

একটু সঙ্কুচিত হল জগন্নাথ—কোথায়!

—যে কোনো রেস্টুরেন্টে।

অপ্রতিভভাবে জগন্নাথ হাসল একটু—এ-সব রেস্টুরেন্টগুলোতে আমার ছাত্ররা থাকে। ওদের সামনে—

বিশু হাসল—ছাত্রদের ভয় করলে চলবে কেন! ওরা যখন প্রফেসরদের ভয় পায় না, তখন আপনার মাথাব্যথা কিসের? চলুন—

সামনেই একটা চায়ের দোকান। বিশু জগন্নাথের হাতে একটু চাপ দিয়ে তাকে নিয়ে ভিতরে ঢুকল। মুখোমুখি বসল দুজনে। বিশু অনেক সহজ বোধ করছিল এখন, কিন্তু জগন্নাথের ওপর এক ধূরনের কর্তৃত্ব খুঁজে পাচ্ছে। বিশু একটু বেঁটে, মজবুত অ্যাথলীট ধরনের চেহারা, নিজের শরীরকে যেদিকে খুশী বাঁকাতে হেলাতে পারে বিশু, পরিশ্রম করার ক্ষমতাও তার প্রচুর। জগন্নাথ অনেকটা লম্বা। ঠিকমত তৈরী হয়নি বলে অত লম্বা হওয়া সত্ত্বেও জগন্নাথের চেহারাটা মেদবহুল আর দুর্বল। শরীরের পরিশ্রম বোধহয় একেবারেই করে না জগন্নাথ। যখন রাস্তায় হাঁটছিল তখন বিশু দেখেছে জগন্নাথের পাঞ্জাবির তলা থেকে পেটের চর্বি সামান্য ফুলে আছে।

এই লোকটাকে বনলতা ভালবাসে। ভাবতেই কেমন আশ্চর্য লাগছিল বিশুর। জগন্নাথের পাণ্ডিত্য কিংবা রুচি সব স্বীকার করে নিয়েও তার মনে কোথাও যেন বাধো-বাধো ঠেকছিল। নিজের সঙ্গে অকারণেই সে জগন্নাথকে মিলিয়ে দেখছিল। বনলতার বাবা, তার কাকাবাবুর কথাও ভেবে দেখল বিশু। এখনো এই বয়সেও সাঙ্ঘাতিক স্বাস্থ্য, রঙ পড়ছে গায়ের, গমকী গলার স্বর। বাপের মতোই মুখশ্রী পেয়েছে বনলতা, সে রকমই রঙ। পিতৃমুখী মেয়ে বনলতার সুশ্রী হওয়ারই কথা ছিল। তার বাপকে দেখেছে বনলতা, বিশুকেও। স্বাভাবিক নিয়মে সে তার স্বামীর ভিতরেও তার বাবা কিংবা বিশুর মতোই কাউকে খুঁজতে পারত। কিন্তু তা হয়নি। হতাশভাবে বিশু দেখে। ভাল করে চোখে চোখ রেখে তাকাতো পারে না, স্বর মিহি সুন্দর আর হাবেভাবে নিজের সম্পর্কে সিদ্ধান্তের বড় অভাব। এ লোককে বনলতা কি করে ভালবাসে? হঠাৎ তার কৌশিক ব্যানার্জির কথা মনে পড়ল। ভাল স্পোর্টসম্যান ছিলেন কৌশিক। গতকালের কাগজে তার ছবি বেরিয়েছে, বনলতা সেই ছবিই দেখছিল দুপুরে। একা একা। আস্তে আস্তে শরীরের লোম দাঁড়িয়ে যাচ্ছিল বিশুর। বনলতা কেন কৌশিকের ছবি দেখছিল? কেন?

জগন্নাথ সামান্য অস্বস্তির হাসি হেসে বলল—ব্যাপারটা খুব হঠাৎ

হয়ে গেল, না ?

অন্যমনস্ক বিশু জিজ্ঞেস করল—কোন ব্যাপার ?

লাজুক মুখে জগন্নাথ বলে—বিয়েটা ?

—বিয়ে! বলে সর্কৌতুকে একটু চেয়ে রইল বিশু। লোকটাকে নিয়ে একটু খেলা করতেই ইচ্ছে করছিল তার। দুর্বল লোক দেখলে অপেক্ষাকৃত শক্তিমানদের যে মনোভাব হয় সেরকমই। নিজেই ভিতর সামান্য একটু নিষ্ঠুরতাও অনুভব করছিল সে। বলল— হ্যাঁ। বড় হঠাৎ হয়ে গেল। আমরা টেরই পেলাম না। আমাদের ইচ্ছে ছিল বনার বিয়েটা খুব ঘট করে দিই।

মাথা নাড়ল জগন্নাথ—জানি আপনাদের খুব আদরের ছিল।

হাসল বিশু—এখনো আছে।

আস্তে আস্তে জগন্নাথ বলল—শুনেছি ওর বাবা এখনো খুব রেগে আছেন। মেয়ের সঙ্গে সম্পর্ক মানছেন না।

টেবিলের ওপর ঝুঁকে ডান হাতখানা বাঁড়িয়ে বিশু জগন্নাথের কাঁধ স্পর্শ করেই আবার হাতটা টেনে নিল, বলল—ওটা নিয়ে ভাববেন না। আপনারা সত্যিকারের সুখী হলে তিনিও একদিন মেনে নেবেন। এরকম তো আজকাল কতো হচ্ছে। তবে আমার মনে হয় আপনারা একবার গিয়ে তাঁর মুখোমুখি দাঁড়াতে পারতেন। তাতে ভাল হত।

—কি হত ?

—তিনি একটু বুঝতে পারতেন যে তাঁকে একেবারে অস্বীকার করা যাচ্ছে না।

হাসল জগন্নাথ—ওটা তো ফর্মালিটি। আপনার কি মনে হয় যে তিনি অনুমতি দিতেন এ বিয়ের ?

—না। মাথা নাড়ল বিশু।

—তবে ? বলল জগন্নাথ, তিনি রাগ করতে পারেন, কিন্তু আমরা যা করেছি তা ঠিকই করেছি।

বিশু কিছুক্ষণ চুপ করে রইল, তারপর বলল—বনলতা আমাকে জানাতে পারত। আমি নেগোশিয়েট করার চেষ্টা করতাম।

—আপনাকে! বলে একটু দ্বিধায় পড়ে গেল জগন্নাথ। তার মুখভঙ্গী নিঃশব্দ বলে উঠল—আপনি কে? আপনাকে জানাবে কেন বনলতা! তার পরেই সামলে গেল জগন্নাথ—বলল, আপনাকে জানানো যেতো।

কিন্তু সময় ছিল না।

সময় ছিল না! এত তাড়াছড়ো। মনে মনে একটু উত্তাপ, একটু উন্মাদ টের পাচ্ছিল বিশু। তবু চুপ করে রইল।

নিজেই আবার কথা বলল জগন্নাথ—তা ছাড়া ঝামেলার দরকার কী? এই তো বেশ সহজ সরলভাবে সমস্যার সমাধান হয়ে গেছে। একটু চুপ করে থেকে অনাবশ্যকভাবে যোগ করল—আমরা সুখী।

বিশু হাসল। সে জানে এটুকুই হয়তো জগন্নাথের দুর্বলতা। সে বিশুকে জানাতে চায় যে তারা সুখী। নিছক কথা বলা তার উদ্দেশ্য ছিল না। তার চোখ জগন্নাথের ওপর ঘুরছিল। সে সজাগ রেখেছে কান, আর চোখ কানের অতীত আর একটা অনুভূতি।

জগন্নাথকে সামান্য উত্তেজিত করে দিতে ইচ্ছে করছিল বিশুর। ঠাণ্ডা কথাবার্তা বলে গেলে কোন লাভ নেই। তাই সে হঠাৎ হেসে দুম করে বলে ফেলল—দেখুন, বনলতা যদি আজ আর কারো সঙ্গে পালিয়ে যায় এবং গিয়ে আপনাকে জানায় যে তারা সুখী, তাহলে আপনার কেমন লাগবে ?

কিছুটা হতভম্ব হয়ে গেল জগন্নাথ। তার ফর্সা মুখ অল্প অল্প করে টকটকে লাল হয়ে উঠল। প্রথমে উত্তর দিতেই পারল না জগন্নাথ। তারপর হঠাৎ পিছনে হেলান দিয়ে হাসল, বলল—সেরকম সম্ভাবনা আছে নাকি ?

এটা উত্তর নয়। বিশু দেখল যথেষ্ট উত্তেজিত হয়েছে জগন্নাথ। কিন্তু অসহায়ও বোধ করছে বড়। কিন্তু বলল—আপনারা যদি সুখী হয়েই থাকেন তাহলে সে সম্ভাবনা অবশ্যই নেই। কিন্তু যদি এরকম ঘটতই তাহলে আপনার অধিকারবোধে আঘাত লাগত না ?

উত্তেজিত জগন্নাথ মাথা নেড়ে বলল—বোধ হয়।

হাসল বিশু—বনলতার বাবার কয়েকদিন আগে একটা স্ট্রোক হয়। থ্রাম্বসিস। বিচ্ছিরি অবস্থা হয়েছিল।

জগন্নাথ নিরুত্তাপভাবে শুনল!

তাদের দুজনেরই চা জুড়িয়ে এসেছিল। এখন জগন্নাথ সেই ঠাণ্ডা চায়ে লম্বা চুমুক দিয়ে মুখ তুলল, একটু ভেবে বলল—কিন্তু আমি ওর কাছে যেতে পারব না। ক্ষমা টমার কথাও বলতে পারবো না। তবে বনলতাকে বলতে পারি যে সে যেন একবার তার বাবার কাছে

যায়।

—তার দরকার নেই। বলে শব্দ করে হাসল বিশু, আর একটা কথা। বনলতাকে মেয়ে হিসেবে তিনি অস্বীকার করেন না, কিন্তু জামাই হিসেবে আপনাকে করেন।

জগন্নাথের চোঁট কাঁপছিল খরখর করে। তীব্র হয়ে উঠেছিল চোখের দৃষ্টি। প্রায় কাঁপা বিকৃত গলায় সে বলল—তাতে কিছু যায় আসে না। আই কেয়ার এ ফিগ ফর—

কথাটা জগন্নাথকে শেষ করতে দিল না বিশু। দু হাত তুলে বলল—আমাকে ভুল বুঝবেন না। আমি আপনার স্বশুরের সঙ্গে আপনাদের মিলন ঘটাতে আসিনি।

কথা বলছিল না জগন্নাথ, কিন্তু তার দুই তীব্র চোখ বিশুকে নানা প্রশ্ন করছিল!

বিশু আস্তে আস্তে যেন বা জগন্নাথের ব্যথা বেদনার জায়গায় হাত বুলিয়ে দেওয়ার মতো নরম ভঙ্গীতে বলল—বরং আমি আপনাদের প্রেমের গল্পটাই শুনতে এসেছিলাম।

জগন্নাথ হাসল। কথা বলল না। বিশু বোঝে যে জগন্নাথ তাকে বিশ্বাস করছে না। সে তেমনি আস্তে করে বলল—বনলতার জন্য অনেক ভাল ছেলে পাওয়া গিয়েছিল। বনা কাউকে পছন্দ করেনি। আপনার মধ্যে বনলতা নিশ্চয়ই এমন কিছু পেয়েছে যা আর কারো ছিল না। আমি সেটাও দেখতে এসেছিলাম।

শুনে খুশী হল না জগন্নাথ বরং বিরস মুখে চোঁট উল্টে বলল—কি জানি! আপনাদের বনাকেই জিজ্ঞেস করবেন।

বলতে বলতেই উঠে দাঁড়াল জগন্নাথ। বিশু বোঝার আগেই কাউন্টারে গিয়ে চায়ের দাম দিয়ে দিল।

দুজনেই বেরিয়ে এল রাস্তায়। অন্ধকার হয়ে এসেছে।

অনেকটা পথ চুপচাপ হাঁটল জগন্নাথ বিশুর পাশে পাশে। তারপর হঠাৎ এক সময়ে বলল—দেখুন আমি কষ্ট করে মানুষ হয়েছি। আমার ডিগ্রী বা চাকরি অন্যের কাছে যত তুচ্ছই মনে হোক, এগুলোর জন্য কিন্তু আমাকে অনেক কষ্ট করতে হয়েছে। পাটিশানের পর আমাদের আর কিছুই ছিল না, তারপর থেকে এক নাগাড়ে স্টাগল। তাই নিজের কাছে বা নিজের পরিবারের কাছে আমিই বড়, এতটা হওয়ারও কথা

ছিল না আমার। কিন্তু বিয়ের পর থেকেই শুনছি আমি পাত্র হিসাবে ভাল না, আমি সুন্দরী বনলতার উপযুক্ত নই। আমার বাড়ি থেকেও অসবর্ণ প্রতিবেশী না কি যেন ইত্যাদি আপত্তি করা হয়েছে। আলাদা ফ্ল্যাটবাড়িতে আছি বনলতার জন্যই, নইলে এভাবে থাকার ক্ষমতা আমার নেই। বাড়িতে বুড়ো মা-বাবা, ছোটো ভাইবোনকেও আমার দেখতে হয়! খরচ বেড়ে গেছে, আরো ষাটাই, তবু কেবল নিজের মধ্যে ক্ষোভ বাড়ছে। মনে হচ্ছে কেউই সুখী হচ্ছে না। না বনলতা, না আমার পরিবার, না বনলতার পরিবার, না আমি। একটু চুপ থেকে আবার জগন্নাথ বলল—উপায় থাকলে আমি বলতাম আপনাদের সুন্দরী বনলতাকে নিয়ে যান। যার সঙ্গে খুশী বিয়ে দিন। আমার কিছু বলার নেই আর।

বিশু ভয়ঙ্কর চমকে উঠল। এত সহজে কথাটা বলবে জগন্নাথ তা সে ভাবেনি। দেখল জগন্নাথ রুমাল বের করে মুখ মুছবার ভান করে চশমার ফাঁকে চোখের কোল দুটিও মুছে নিল। বৃকের ভিতরটা এলোপাথাড়ি কেঁপে উঠল বিশুর। একই সঙ্গে তীব্র একটা দুঃখ এবং সুখকেও টের পেল। সে মৃদু স্বরে বলল—কী সব বলছেন!

একটু ভারী গলায় জগন্নাথ উত্তর দিল—ঠিকই বলছি। আমি ভীষণ টায়ার্ড।

—একমাসের মধ্যেই!

—একমাস! জগন্নাথ যেন থমকে গেল, আমার তো মনে হচ্ছে দশ বছর কেটে গেল।

বিশু শান্ত গলায় বলার চেষ্টা করল—আপনার মন আজ ভাল নেই। মাথা নাড়ল জগন্নাথ—মন ঠিক আছে। আমি ভেবেই বলছি।

রাস্তার মোড়ের কাছে এসে বিশু দাঁড়াল, বলল—আমি শিয়ালদার দিকে যাবো।

রাস্তা হাসি হাসল জগন্নাথ—আচ্ছা। আবার দেখা হবে।

তারপর আর ফিরেও তাকাল না।

একা হতেই নিজের কাছে ধরা পড়ল বিশু। স্পষ্টই সে বুঝতে পারল তার মন ভারমুক্ত, সে সুখ বোধ করছে। হয়তো বা এই সুখ অবৈধ। পরশ্রীকাতরতা থেকেই এরকম সুখ আসে।

আবার একটু দুঃখও বোধ করছিল বিশু জগন্নাথের জন্য। কিন্তু সে

দুঃখটুকু তার মনের ভদ্রতাবোধ। তার বেশী কিছু নয়।

অন্য মনে শিয়ালদায় এসে রাণাঘাটের ট্রেন ধরল সে।

রাত্রে মস্ত চাঁদ উঠেছিল। মেঠো গ্রাম্য পথ দিয়ে হেঁটে যাচ্ছিল বিশু। একটা ছোট ঝিল-এর ধার দিয়ে রাস্তা বেঁকে গেছে। একটু দাঁড়িয়ে বিশু সিগারেটে আগুন ধরিয়ে নিচ্ছিল। জলে টিক টিক করে কাঁপছে জ্যোৎস্না। জলের ওধারে একটা খুঁটি, হঠাৎ দেখলে মনে হয় একটা মানুষ বুক জলে নিজের ছায়া দেখছে। বিশ্বর মন বলছিল জগন্নাথের সঙ্গে বনলতার এ বিয়ে টিকবে না। ভাবতেই বুকের মধ্য দিয়ে তীব্র আনন্দের স্রোত বয়ে গেল, তারপর কী হবে ভাবলই না।

গুন্ গুন্ করে গান গাইতে গাইতে সে পোলট্রির পোষা হাঁস-মুগী আর জলার মাছগুলির কাছে ফিরে যাচ্ছিল।

সাত

আসলে নিজেকে বন্দিবীর মতোই লাগে বনলতার। যদিও তার এ বিয়ে ভালবাসার, স্নেহের, তবু ডেবে দেখল সঠিক স্বয়ম্বর্যও তো সে হয়নি। জগন্নাথ তাকে ক্ষমাপার মতো ভালবেসেছিল, আর সেই ভালবাসাই বনলতার বিচার-বুদ্ধিকে ভাসিয়ে নিয়ে গেল। তার বয়স কম, কারো পরামর্শ নেওয়ার কথা তার মনেই হয়নি। দু একজন বান্ধবীকে বলেছিল তার ভালবাসার কথা, তারা খুব উৎসাহ দিয়ে 'ইস, কী ভালো হবে' বলে তাকে উস্কে দিল। ওদেরও দোষ নেই, ওরাও বয়সের বুদ্ধিতে চলে। কিন্তু বিয়ের মাত্র কয়েক মাসের মধ্যেই বনলতা এখন টের পাচ্ছে—ভুল হয়ে গেছে।

সারাদিন একা একা শহরতলীর এই ছোট ফ্ল্যাটটাকে তার প্রকাণ্ড বলে মনে হয়। সে ঘুর ঘুর করে ঘুরে বেড়ায়, একা। বিষয় বোধগুলি তার অল্প বয়সকে আন্তে আন্তে বাড়িয়ে দেয়। অথচ কোথায় ভুল হল তার সঠিক কারণটাকে সে কিছুতেই ছুঁতে পারে না! কিন্তু কেবল মনে হয়—ভুল, বড় বেশী ভুল হয়ে গেছে বাবা, সারা পৃথিবীতে তার আত্মীয় বলতে একমাত্র বাবা, তাঁকে না জানিয়ে পালিয়ে বিয়ের জন্য যত কাণ্ড সে করল, সেই সব কাণ্ডকে এখন বড় হাস্যকর ছেলেমানুষী বলে মনে হয়। ছেলেবেলা থেকেই বিয়ে বলতে সে বোঝে শানাইয়ের আওয়াজ, সিঁথিমৌর, বেনারসী, ম্যারাপ, আলো, স্ত্রী আচার। তার বিয়েতে

কিছুই হ'ল না, কাগজে সই করা আর হোটেলের পার্টিতে কিছু বন্ধুবান্ধবীর আগমন। কেউ জানলই না। অথচ অনুষ্ঠানহীন ভাবে সে জগন্নাথের বৌ হয়ে গেল। হয়ে গেল? নাকি হয়েছে হল না।

হ্যাঁ বাইরে থেকে দেখলে সে জগন্নাথের বৌ। কিন্তু ভিতরে, মনের মধ্যে সে একা বনলতা। জেদী একগুঁয়ে, আদুরে বনলতা। সেখানে স্বামী বলে জগন্নাথকে মানে না।

জগন্নাথ লোক খারাপ নয়। বরং ভালোই। বয়সে বনলতার চেয়ে বছর আটেকের বড়, ভাল কলেজের অধ্যাপক, এম.এ.ডি-ফিল। বিয়ের পর চেহারাটা চর্বি জমে একটু ভারতরাত হয়েছিল। ভালই দেখায় জগন্নাথকে, যখন সে ঘি রঙের সিন্ধের পাঞ্জাবী পরে কলেজে যায়। ঘীর স্থির লোক, একটু অন্যান্দনস্ক, কুনো আর খুবই ভাবপ্রবণ। মেয়েরা এমন ছেলেকে সহজেই দখল করতে চায়। এমন কি বনলতার একজন প্রতিদ্বন্দ্বীও ছিল। নীতা। মুখে তেমন কিছু বলত না জগন্নাথ, কিন্তু কখনো বিরক্তির সঙ্গে নীতার হ্যাংলাপনার উল্লেখ করে বলত—মেয়েটা যাচ্ছেতাই! দেখ আবার চিঠি দিয়েছে। বলে চিঠি দেখাতো বনলতাকে। বনলতা কৌতূহল নিয়ে পড়ত। খুব খারাপ কথা অনায়াসে লিখত নীতা, আর বার বার জগন্নাথের মহানুভবতা, উদারতা ইত্যাদির উল্লেখ করে তাকে গ্রহণ করতে সাধাসাধি করত। সরল জগন্নাথ আত্মরক্ষার জন্য বনলতার কাছে জমা দিত চিঠি। বলত—তুমিই উত্তর দিয়ে দিও।

উত্তর দেয়নি বনলতা, তবে তার রেজিস্ট্রেশনের পর দিন মেয়েটিকে এক লাইনে খবরটা জানিয়ে দিয়েছিল। ব্যাপারটা খুবই নিষ্ঠুর হয়েছিল। খবরটা দেওয়ার সময়ে নিজের ভিতরে বনলতা সেই নিষ্ঠুরতার আনন্দকে টের পেয়েছিল। নীতা নামে সেই অচেনা মেয়েটিকে এখনো মাঝে মাঝে ভাববার চেষ্টা করে সে! জগন্নাথ বলেছিল, নীতা দেখতে সুন্দর নয়, তার রঙ কালো, সামনের দাঁত সামান্য বড়, স্বাস্থ্য ভাল—সব মিলিয়ে খুবই সাধারণ মেয়ে। তবে নীতার চোখ নাকি সুন্দর। বনলতা জানত তার আগুন চেহারার কাছে অস্বস্তি বোধ করেছে—নীতার চোখ—সে কি খুবই সুন্দর? বাজে মেয়েদের ভাল চোখ থাকলেই কি।

মাঝে মাঝে নীতা জগন্নাথের কলেজের সামনে রাস্তায় দাঁড়িয়ে অপেক্ষা করে পাকড়াও করত জগন্নাথকে। বড় বিপদে পড়ত জগন্নাথ। বনলতার কাছে এসে বলত, বড় ভয় করে। মেয়েটা বেহেড হয়ে যদি একদিন

হাতফাত ধরে চোঁটেমিটি শুরু করে! আজকেও বাড়িতে নিয়ে যেতে চাইছিল। কখনো কখনো সিনেমার টিকিট নিয়ে আসে, রেস্টুরেন্টে নিয়ে যেতে চায়। কী যে কাণ্ড করে! ও বোধহয় ক্ষেপে গেছে। এ সব শুনে বনলতার ভিতরটা দপ করে জ্বলে উঠতো। নীতা নামে সেই অচেনা মেয়েটিই পরোক্ষভাবে জগন্নাথের প্রতি যুক্তিহীন আকর্ষণ তৈরী করছিল। জগন্নাথকে কে একটি মেয়ে পাওয়ার জন্য ক্ষেপে গেছে—এই চিন্তাই তাকে অস্থির রাখত। তার ভিতরে রেয়ারেবির ভাব এনে দিত। নইলে সাদা চোখে জগন্নাথকে বিচার করে দেখতে পারত বনলতা। না, জগন্নাথের মধ্যে বিমুখ হওয়ার মতো কিছু নেই, তবু বনলতা জানে যে বিমুখ না হওয়াই ভালবাসা নয়। অচেনা নীতার সঙ্গে পাল্লা না দিলে সে বুঝতে পারত নিজের অন্তরকে। আর একটু অপেক্ষা করতে পারত।

নীতা হেরেই গেছে। কিন্তু সেই হারিয়ে দেওয়ার আনন্দটা বড় ক্ষণস্থায়ী হয়েছে বনলতার মনে। এখন নীতার কথা মনে হলে আর তেমন মন্থাপাটে উত্তেজনা বোধ হয় করে না সে। বরং মনে হয়—আহা নীতা হয়তো কেঁদেছিল। নিষ্ফল আক্রোশে হয়তো কত অভিশাপ দিয়েছে তাকে। সেই সব অভিশাপ ফলে যাচ্ছে কিনা কে জানে। কৈ, এতকাণ্ড করে সে যার বৌ হল, তাকে পেয়ে খুব একটা কিছু পেয়েছে বলে তার মনে হচ্ছে না তো। বরং মনে হচ্ছে জগন্নাথ অন্য কারো স্বামী হলে তার দুঃখের কিছুই থাকতো না। নীতা কি এখনো জগন্নাথের কথা ভাবে? কে জানে!

বিশু এসেছিল কয়েকদিন আগে। সেই আত্মীয়হীন বিশু, যে তাদের বাড়িতে তার ডাইয়ের মতোই বেড়ে উঠেছিল। বেপরোয়া সাহসী, সদা হাস্যময় বিশু খুঁজে খুঁজে কোথা থেকে তার ঠিকানা বের করেছিল। জিজ্ঞাসা করায় বলেছিল—লোক লাগিয়েছিলুম। সে তোর হাজব্যাণ্ডকে কলেজ থেকে বাসা পর্যন্ত ফলো করেছিল। শুনে চমকে উঠেছিল বনলতা—ও মা! কিন্তু সে জানে যে বিশু সব পারে। হাসিমুখে কথা বলল বিশু, বাবার কথা, বাসার কথা, বলে গেল বনলতা জগন্নাথকে বিয়ে করে ঠিকই করেছে। কিন্তু বিশুর চোখ সে কথা বলছিল না। বনলতা বুঝেছিল বিশু খুশী হয়নি। ও ঠিক খুঁজে খুঁজে জগন্নাথের কাছেও যাবে। আলাপ জমাবে। বিশুর মান অপমান বোধ নেই। অহংকারী জগন্নাথ বিশুকে পছন্দ করবে কি না কে জানে! জগন্নাথ অচেনা লোক

দেখলে কখনো খুব খুশী হয় না। আত্মমগ্ন থাকতেই সে ভালবাসে।

বিশুর কথা, বাবার কথা মনে পড়ছিল বনলতার। বিশু রাণাঘাটের কাছে পোলট্রি করেছে, হাঁস মুগী নিয়ে মেতে থাকে। বলল একদিন নিয়ে যাবে। কিন্তু কোনদিনই বোধ হয় সেই নিয়ে যাওয়াটা আর হবে না বিশুর। বাবার স্টোক হয়েছিল। বনলতার বিয়ের কয়েকদিন পরেই। ওইরকম সুন্দর স্বাস্থ্য বাবার, আর ওইরকম স্থির শক্ত লোক। বনলতা শুনেছে সে পালিয়ে আসার পরদিনও বাবা অফিসে গেছে। বাইরে একটুও চঞ্চল দেখায় নি তাকে। কিন্তু তার কয়েকদিন পরেই তার স্টোক হয়। হয়তো এই বয়সে শোক-দুঃখ চেপে রাখতে নেই। রাখা যায়ও না। কিন্তু বাবার সঙ্গে কোনো মিটমাটই আর হবে না কোনদিন।

বনলতা জানে বাবা কেমন। মরে গেলেও দুর্বল হয় না লোকটা। কিন্তু বনলতা মনে মনে মরে যাচ্ছে বাবার জন্য। এক একবার ইচ্ছে হয় পালিয়ে গিয়ে বাবাকে দেখে আসে, কিংবা টেলিফোন করে গলার স্বর একবার শুনে নেয়। কিন্তু সাহস হয় না। ভালবাসা—হয় এক সন্দেহজনক ভালবাসার জন্য তার সর্ব্ব্ব চলে গেছে। বাবা ছিল একরকমের সঙ্গী, জগন্নাথ আর একরকমের। বাবা কথা বলত কম, কিন্তু হাবে ভাবে ফুটে উঠত মায়, কোমলতা। কাছে গিয়ে বসলে বরাবর মনে হয়েছে যেন সে এক বিশাল গাছের ছায়ায় দাঁড়িয়ে আছে। কুটিন বাঁধা চলাফেরা বাবার কখনো বেচাল হয় না। পুরুষমানুষ কেমন হয় তা সে বাবাকে দেখে চিনেছে। জগন্নাথ অন্যরকমের সঙ্গী। কিন্তু তবু বনলতার মনে হয় বাবার মতো কিছু কিছু গুণ জগন্নাথের থাকলে বড় ভাল হত। কখনো জগন্নাথকে তার নিজের চেয়ে বড়, শ্রেষ্ঠ বা উচ্চতর কিছু বলে মনে হয় না। বরং মনে হয় জগন্নাথ তার সমান সমান। এই সমান হওয়ার ভাবটা বনলতার কখনো ভাল লাগে না। কোনো মেয়ের লাগে কিনা কে জানে?

দুপুরে রান্নাঘরে বসে একা একা ভাত খাচ্ছিল বনলতা। সকালের রাঁধা ভাত, জগন্নাথ খেয়ে গেছে, সেই ভাত সারাদিনে ঠাণ্ডা হয়ে গেছে। গলা দিয়ে নামছিল না। কয়েক গ্রাস খেয়ে থালা সরিয়ে রাখল। শুধু শুধু মাছ খেল একটু। ভাল লাগল না! কাঁচা লক্ষ্য কামড় দিল, নুন মুখে দিয়ে শিষ তুলতে লাগল। বেলা গড়িয়ে গেছে অনেক। বোধহয় দেড়টা। এত বেলায় সে কোনোদিন খায় না। কোনোদিন জলটাও গড়িয়ে

খায়নি বনলতা, আর এখন রান্না করতে হয়, জগন্নাথকে ভাত বেড়ে দিতে হয়। নিজে বেড়ে খেতে তার ভাল লাগে না। একা একা দুপুরে ভাতের খালার সামনে বসে তার রোজ কান্না আসে। নুন মুখে দিয়ে লক্ষা কামড়ে সে উদাসভাবে দেখল বাদামী রঙের বেড়ালটা তার মাছের বাকী অংশ মুখ দিয়েছে। খালার কানায় হাত চেঁচে নিয়ে সে চুপ করে তাকিয়ে রইল। দেওয়ালে টিকটিকি ঘুরছে, মিটসেফের তলা থেকে একটা হাঁদুর দৌড়ে বেরিয়ে উনুনের পিছনে চলে গেল। শূন্য মনে চেয়ে রইল বনলতা। বেড়ালটা সমস্ত শরীরে ঢেঁট তুলে মাছ খেতে খেতে তার দিকে চেয়ে দেখল। বনলতা হেসে বলল— খা। তারপর এলোচুল মুঠোয় ধরে উঠে পড়ল।

আঁচিয়ে ঘরে এসে রেডিও খুলল সে। কীর্তন হচ্ছে। বন্ধ করে দিল। ওপরে ফ্ল্যাটে কচি একটা বৌ থাকে। খুব পান খায় বৌটা। ঘরে পান নেই। ইচ্ছে হচ্ছিল একটা পান খেয়ে আসতে। একটু গল্প করে আসা যেত। কয়েকদিন এরকম ভাবেই আলাপ হয়েছে বৌটার সঙ্গে। বিধবা শাশুড়ির শাসনে থাকে, কাজ করে, ডবলু বি সি এস স্বামীর জন্য গর্বে বুক ফুলে থাকে তার। বনলতার ভালই লাগে।

দরজা খুলে সিঁড়ির গোড়ায় এসে বনলতা ডাকল—অনিমা, ও অনিমা। সাদা পাওয়া গেল না। হয়তো খাওয়ার পর দুপুরের ঘুমে ঢলে আছে। তাই আর ডাকল না বনলতা। আবার ঘরে এসে দরজা বন্ধ করে দিল! শরৎকাল শেষ হয়ে এসেছে। বাতাসে শীতের আমেজ। মেঝেতে মাদুর বিছিয়ে একটা বালিশ টেনে শুয়ে পড়ল বনলতা। নানারকম হিজিবিজি চিন্তায় আচ্ছন্ন হয়ে আসছিল তার মাথা। মাঝে মাঝে কৌশিক ব্যানার্জির মুখটা তার মনে পড়ে। কিছুদিন আগে কাগজে কৌশিকের ছবি বেরিয়েছিল—বিলেত যাত্রী কৌশিক। বাবার খুব পছন্দ ছিল কৌশিককে। জাতে, গোত্রে, কোষ্ঠীতে মিল, তাছাড়াও ছেলেদের ঘর উঁচু, বাবার বিচারে এইগুলোই বড়। বাবা নিজে আজো ব্রাহ্মণের মতোই আচার আচরণ মেনে চলেন। তাঁর পৈতা কখনো ময়লা হয় না। বনলতা সব রকম আচার আচরণই শিখেছিল। কাজে লাগল না। ব্রাহ্মণের ঘর থেকে সে এসেছে বোসের ঘরে। জগন্নাথ বসু তার স্বামী—এটা ভাবতে তার ভাল লাগে না। ছেলে বেলার কী একটা সংস্কারে যেন যা লাগে। এ বিয়েকে বলে প্রতিলোম। সে জানে জগন্নাথ এসব বোঝে না। সে

গোঁড়া, অবিশ্বাসী। তবু তার বাড়িতেও এ বিয়ে নিয়ে হৈ চৈ হয়েছে। বামুনের মেয়েকে ছেলের বৌ হিসেবে ঘরে তোলেননি জগন্নাথের বাবা মা। তাই তারা আলাদা হয়ে রইল। হয়তো বরাবর এরকমই থাকতে হবে।

ভাবতে ভাবতে ঘুমিয়ে পড়েছিল বনলতা। ঘুম ভেঙে দেখল বেলা ফুরিয়ে এসেছে। কড়া নেড়ে ঝি ডাকছে। উঠে দরজা খুলে দিল সে। তারপর শাড়ি গুছিয়ে এলো চুল ঝোঁপায় বেঁধে বারান্দায় এসে দাঁড়াল। শহরতলীর নির্জন রাস্তা-ঘাট, ফাঁকা জমি পড়ে রয়েছে অনেক। রাস্তার ওপাশে ছেলেরা ক্রিকেট খেলছে। দেখতে দেখতে অন্যান্যনস্ক হয়ে চেয়ে ছিল। খেয়াল করেনি বড় রাস্তা থেকে নেমে সোজা তার দিকেই হেঁটে আসছে একটি মেয়ে। কাছাকাছি এসে মেয়েটি ছোট্ট একটু কাগজে লেখা ঠিকানার সঙ্গে বাড়ির নম্বর মেলাতে তাকে জিজ্ঞেস করল—জগন্নাথ বোস কি এখানে থাকেন? মাথা নাড়ল বনলতা—এই বাড়িই। মেয়েটি হাসল—উনি বাড়িতে নেই, না? বনলতা কথা না বলে আবার মাথা নাড়ে—না। মেয়েটিকে বেশ দেখতে। কালোর ওপর ছিপছিপে শরীর। লম্বাটে মুখ, টানা সুন্দর চোখ, হয়তো ওর বোন টোন কেউ হবে। বনলতা এবার জিজ্ঞেস করল—আপনি কোথা থেকে আসছেন?

—অনেক দূর। সেই শিবপুর থেকে। আপনি বনলতা, না?

—হ্যাঁ। হাসল বনলতা, আপনি কে।

—আমি নীতা গুহ, বলে একটু চুপ করে থেকে বলল, আমার কথা আপনার মনে না থাকারই কথা। আমাকে আপনি দেখেননি।

বনলতা মনে মনে চমকে উঠলেও বাইরে স্থির ছিল। মেয়েটাকে যথেষ্ট ক্লান্ত দেখাচ্ছে। বাসে ট্রামে এসেছে নিশ্চয়ই। দু'তিনবার বদল করে আসতে হয়েছে বোধ হয়! তবু এত কষ্ট করে কেন এসেছে মেয়েটা কে জানে। নীতাকে দেখে তার মনের ভিতরটা কিন্তু শক্ত হয় না। সামান্য হিংসের ভাবও এল না মনে। সে হেসে বলল—আপনার কথা শুনেছি ওঁর কাছে। আসুন ভাই, ভিতরে আসুন।

তার এ কথায় মেয়েটির মুখ আলোময় হয়ে গেল! যেন আশা করেনি এত ভাল ব্যবহার পাবে। বনলতার পিছনে পিছনে ঘরে ঢুকতে ঢুকতে বলল...আপনি সত্যিই ভীষণ সুন্দর!

—খুব ভীষণ? হাসল বনলতা।

—খুব। যা ভেবেছিলাম তার চেয়ে বেশী।

মেয়েটিকে চৌকীর ওপর বিছানায় বসিয়ে মেঝের মাদুর-টাদুর তুলল বনলতা, বলল—নতুন সংসার তাই একটু অগোছালো।

মেয়েটির চোখ-আঠার মতো আটকে আছে তার মুখে। বসবার ভঙ্গীর মধ্যে জড়োসড়ো একটা ভয়ের ভাব, মুখে একটু অপ্রতিভ হাসির আভাস। বনলতা লক্ষ্য করে মনে মনে হাসল। কে জানে হয়তো নিজের সঙ্গে বনলতাকে মিলিয়ে দেখতে এসেছে মেয়েটা। তার মনে পড়ল আজকে একটু আগেই সে মেয়েটার কথাই ভাবছিল। চিঠি পড়ে মেয়েটাকে যেমন নির্লজ্জ বোঝা উগ্র স্বভাবের বলে মনে হয়েছিল, মুখোমুখি একেবারেই সেরকম মনে হল না। বরং লাজুক ভীক, শান্ত স্বভাবের সাধারণ একটা মেয়ে। একটা মানুষ সম্বন্ধে আর একটা মানুষ কত সময়েই কত ভুল ধারণা করে রাখে।

ঝিকে চায়ের জল চড়াতে বলে বনলতা মেয়েটির মুখোমুখি একটা মোড়া টেনে নিয়ে বসল, বলল—বলুন ভাই আপনার কথা, একটু শুনি।

বাচ্চা মেয়ের মতো লজ্জার হাসি হাসল মেয়েটি। কাঁধ থেকে স্ট্রাপে ঝোলানো ভ্যানিটি ব্যাগটা নামিয়ে রাখল বিছানায়, তারপর একটু ইতস্ততঃ করে ব্যাগটা খুলে একটা রুপোর গয়না বের করল। খোঁপায় গাঁজার কাঁটা, তাতে সুন্দর বড় একটা মিনে করা প্রজাপ্রতি, হেসে বলল—আপনার জন্য এনেছি।

—ও মা! কেন?

আবার লাজুক হাসি—কিছু একটা দিতে ইচ্ছে করছিল। গত কাল নিউমার্কেটে ঘুরে ঘুরে এটা কিনে আনলাম।

মনে মনে খুশী হল বনলতা—কেন কষ্ট করতে গেলেন ভাই!

—বাঃ, জিনিসটা খুব সুন্দর—আমি আপনার চুলে পরিয়ে দিয়ে যাব।

—বেশ। আগে চা-টা খেয়ে নিন।

মেয়েটি নীরবে ঘাড় নাড়ল। মুখে সেই লাজুক হাসিটি লেগে আছে। কিন্তু একটু উৎসাহ পেলে বোধহয় অনেক কথা বলতে পারে। বনলতার মধ্যে আপনা থেকেই একটা দিদি ভাব এল। বয়স অল্পই বোধ হয়, আঠার-উনিশ। মুখে চোখে এখনো সংসারের ছাপ পড়েনি। চোখ দেখে মনে হয় ঐ চোখে এখনো স্বপ্নের বাসা। বনলতা তার নিজের বুক

একটু দুঃখের ব্যথা টের পেল। আড়াল থেকে বড় নিষ্ঠুর প্রতিযোগিতা করছে মেয়েটির সঙ্গে। এখন মুখোমুখি তার মায়া হচ্ছে। ইচ্ছে করছে ওর থেকে কেড়ে নেওয়া জিনিস আবার ওকে ফিরিয়ে দেয়।

ঘরের চারিদিকে ডাগর চোখে চেয়ে দেখল নীতা। চাউনিতে পিপাসা ধরা পড়ে, বলল—কি সাজিয়েছেন সব। অথচ বলছিলেন সব অগোছালো।

—এখনো তো সাজান হয় নি।

নীতা প্রতিবাদ না করে মিষ্টি হাসল, বলল—আমাদের বাড়িতে এত সব জিনিস নেই।

বনলতা বুঝল সে যেটাকে অগোছালো বলছে সেটা অন্য অবস্থার মানুষের কাছে অগোছালো মনে নাও হতে পারে। বিয়ের পর জগন্নাথ টুক টাক করে অনেক জিনিস এনেছে। আয়না বসানো লোহার আলমারি, সোফা কাম বেড, কিস্তিতে কেনা ফ্রিজডেয়ার, ঘর সাজানোর জন্য প্ল্যাস্টারের তৈরী কয়েকটা ছবি, জানালা দরজায় হাল ফ্যাসানের কাঠের ফ্রেমে পর্দা। এত সব অনেকের ঘরেই থাকে না। বোধ হয় বনলতা বড় ঘরের মেয়ে বলেই তাকে খুশী করার জন্য প্রাণপাত করে এত সব করেছে জগন্নাথ। যা বলে তাই এনে দেয়। বনলতার বাড়িতে এর চেয়ে ঢের বেশী জিনিস ছিল। তাই এত সব তার চোখেও পড়ে না। কিন্তু আজ এখন নীতা বলাতে তার চোখে পড়ল সত্যিই, কিছু কম সাজানো হয়নি। সে চোখ সরিয়ে নীতাকে আবার দেখল। যথাসাধ্য সেজেছে নীতা, তবু স্পষ্ট বোঝা যায় ও গরীবের সংসার থেকে এসেছে। দু'খানা হাতে সংসারের নানা কাজের ছাপ। বনলতার মনে হল জগন্নাথকে বিয়ে করে সে উঁচু থেকে কয়েক ধাপ নিচে নেমে এসেছে। কিন্তু নীতা যদি পারত জগন্নাথকে বিয়ে করতে তবে নীতা বরং কয়েক ধাপ উঁচুতে উঠে আসতে পারতো। সেইটেই সুন্দর হত। ভাল হত।

ঝি এসে বলল—চায়ের জল হয়ে গেছে দিদিমণি।

বনলতা নীতাকে বলল—আসছি ভাই চা-টা নিয়ে।

সঙ্গে সঙ্গে উঠে দাঁড়াল নীতা—আপনি একা যাবেন কেন। চলুন আমিও যাচ্ছি।

হাসল বনলতা—আসবে? এসো। বলেই জিব্ কাটল—এ মা তুমি বলে ফেললাম।

—বেশ করেছেন। আপনি দিদি না?

—তাই বুঝি! মনে মনে খুশি হল বনলতা। তার মনে দিদি ভাব এসে গিয়েছিল, চালাক মেয়েটি সেটা বুঝে গেছে।

রান্নাঘরের এসে নীতা বলল—চা-টা আমিই করি।

—করো। বলে বনলতা চা চিনি দুখ গুলিয়ে দিয়ে বলল—সাগুর পাঁপড় আছে খাবে?

—খেতে ইচ্ছে করছে না।

—একটু খাও। ভাল খিয়ে ভেজে দেবো।

মুখোমুখি বসে বনলতা দেখছিল কত নিপুণ হাতে মেয়েটি চা করল। বনলতা নিজেই কড়াইতে যি ঢেলে পাঁপড় ভাজতে যাচ্ছিল, মেয়েটি তার হাত থেকে খুস্তি কেড়ে নিয়ে নিজেই ভাজল। বলল—আপনার যে রান্নাবান্নার অভ্যেস নেই তো আমি জানি। আমাকে বাড়িতে সব কাজ করতে হয়।

—আমার অভ্যাস নেই কি করে বুঝলে?

—আপনি যা সুন্দর!

—কাজ না করলেই বুঝি সুন্দর হয়!

—তা নয়। মেয়েটি বিপদে পড়ে বাধো বাধো গলায় বলল—আপনাকে কাজকর্মে মানায় না। এত সুন্দর মানুষ কাজ করবে কেন?

বনলতা খুব হাসল। অনেক দিন পর তার মনটা হাল্কা লাগছে আজ। বলল—দাঁড়াও, জগন্নাথকে সব বলে দেবো আজ।

মেয়েটি এক পলকে থমকে গিয়ে বলল—আপনি ওঁকে নাম ধরে বলেন?

বনলতা দেখল জগন্নাথের নামে মেয়েটির চোখে শ্রদ্ধার ভাব। এ মেয়ে বিয়ে না হলেও জীবনে জগন্নাথকে বোধ হয় নাম ধরে বলবে না। বনলতা বলল—পতি নামে গতি হয়। জানো না? আমি সামনাসামনি ওকে জগন্নাথ বলি! যা বিচ্ছিরি নাম...

নীতা মাথা নীচু করে হাসল। বনলতা লক্ষ্য করে ওর শ্যামলা রঙের মুখমণ্ডলে রঙ এসে ভীড় করল। হাতের চায়ের কাপ চলকে গেল! আহারে! মনে মনে বলল বনলতা।

চায়ের পর তার চুল নিয়ে পড়ল নীতা। চুলের গোছ হাতে ধরেই বলল—ইস্, ভগবান আপনাকে সব দিক দিয়ে দিয়েছেন। অনেক সুন্দর মেয়েরই চুল থাকে না, আপনার তাও আছে অটেল।

—নজর দিও না ভাই। বনলতা মুখটিপে হাসল।

—আমার চোখে বিষ নেই। সুন্দর দেখলে আমার বড় ভাল লাগে। বনলতা সে প্রসঙ্গে না গিয়ে বলল—ভগবান আমাকে আর কি কি দিয়েছেন বল তো!

একটু চুপ করে থেকে নীতা বলল—সবই তো দিয়েছেন! যেমন চেয়েছিলেন।

—যেমন চেয়েছিলাম? গলাটা হঠাৎ থমথমে হয়ে আসছিল। হেসে সামলে নিল বনলতা।

একটু চুপ করে থেকে বনলতা বলল—জানো তো অতি বড় সুন্দরী না পায়...

নীতা আকুল হয়ে বলল—যাঃ। আপনি শ্লোকটা বলবেন না। আপনাকে মানায় না।

—ইস্, নীতা, তুমি যে কোনোখানেই আমাকে মানাতে পারছ না!

নীতার মুখ পিছনে। বনলতা দেখতে পাচ্ছে না। শুধু অনুভব করছে তার চুলের গোড়ায় একটুও ব্যথা না দিয়ে চমৎকার চুল বাঁধছে নীতা। বেশ কিছুক্ষণ চুপ করে থেকে নীতা বলল—আপনি তো বর পেয়েছেন।

বনলতা চুপ করে রইল। একবার ইচ্ছে হচ্ছিল মাথা ঘুরিয়ে নীতার মুখখানা দেখে। কিন্তু ওর গলার স্বর একটু কেমন শোনাগ যেন। হয়তো ওর চোখে তখন জল। তাই বনলতা মুখ ঘোরাল না। নীতা যদি আড়ালে একটু কাঁদে, তবে কাঁদুক। বনলতা চুপ করে রইল।

চুল বেঁধে সেই প্রজাপতি কাঁটাখানা গুঁজে দিয়ে নীতা বলল—বাস এবার আপনি সিঁদুর পরুন।

—তুমিই পরিয়ে দাও।

—যাঃ কুমারী মেয়েরা পরায় না।

বনলতা হাসল।

আয়নার সামনে বসে সিঁদুর পরছিল বনলতা। হঠাৎ নিজের সুন্দর প্রতিবিম্বের পিছনে নীতার মুখখানা চোখে পড়ল। মগ্ন হয়ে চেয়ে আছে। খেয়ালই নেই যে আয়নায় ওর মুখ বনলতার চোখে পড়তে পারে। হাসি সামলে চোখ সরিয়ে নিল বনলতা। ভেবে দেখল—কত সুন্দর হত যদি আজ এ সময়ে এইখানে বসে একা একা নীতা এই সিঁদুর পরত! বনলতা অভ্যাসবশতঃ সিঁদুর পরে, দায় সেরে যায় মাত্র। কিন্তু

নীতা হলে কত অহংকার আর যত্ন নিয়ে পরত! কত ভালবাসায়, মায়াম, বিশ্বাসে! বনলতারই দোষ। সে জোর করে নীতার ঘরে ঢুকে বসে আছে। এ দখল করামাত্র, পাওয়া জে নয়! কিন্তু নীতা হলে হয়! নীতা হলে—

ইচ্ছে করে নীতাকে ডেকে বলে—এসো তোমাকে বৌ সাজিয়ে দিই। খুব সেজেগুজে বৌ হয়ে বসে থাকে। এ ঘর সংসার তোমাকেই মানায়, ধেহেতু ভালোবাসো। এসো, তোমাকে সাজিয়ে দিয়ে আমি বেরিয়ে পড়ি। জগন্নাথ তোমাকে দেখে চমকে যাবে, হয়তো গোলমাল করবে, তারপর আস্তে আস্তে বুঝবে তুমি ওর ঠিক বৌ...এসো নীতা।

নীতা বলল—ইস্ কী সুন্দর যে দেখাচ্ছে!

হাসল বনলতা—তোমার হাতের গুণ। যা সুন্দর খোঁপা বেঁধেছে।

—সেটাও আবার চুলের গুণ। নীতা লাজুক মুখে বলল। তারপর ঘড়ি দেখে উঠবার উপক্রম করে বলল—এবার কিন্তু আমাকে যেতে হবে।

—ওমা! ওর সঙ্গে দেখা করে যাবে না। ও তো একটু পরেই আসবে। এতক্ষণে এসে পড়বারই তো কথা! কেন যে দেৱী করছে।

নীতা মাথা নীচু করে আস্তে আস্তে বলল—আজ শুক্রবার, ওঁর বোধহয় আজ নাইট শিফটে ক্লাস আছে!

—ঠিক জে। বনলতা হাসে—আমি ভাই ওসব রুটিনটুটিন রাখতে পারি না। তুমি আর একটু বোসো না। এসে যাবে।

নীতা মৃদু গলায় বলে—আপনার সঙ্গেই দেখা করতে এসেছিলুম, উনি থাকলে আপনার সঙ্গে এমন ভালভাবে দেখা করতেই পারতুম না। তা ছাড়া, অনেক দূরে যাব। আজ আসি।

—যাবে?

—হঁ।

—যাবে কেন? থাকো না। বলেই আত্মবিশ্রুত বনলতা হঠাৎ চমকে উঠল, সামলে নিয়ে বলল—আমি একা থাকবো!

ওঁর কিরতে অনেক দেৱী হবে! বোধহয় সোয়া আর্টটায় ক্লাস শেষ হবে। ততক্ষণ থাকতে গেলে...

বনলতা হাসল। বলতে পারল না জগন্নাথ ফিরে এলেও সে একাই থাকবে। একটা অন্যরকমের একাকীত্ব। নীতা এটা বুঝবে না। এটা খুবই

স্পষ্ট যে নীতা জগন্নাথকে পাগলের মতো ভালবাসে। এই ঘর, সংসারে নীতা কখনো কোনদিনই একা বোধ করত না। নীতা কী করে বুঝবে বনলতা কেন একা।

—আচ্ছা ভাই, এসো। আবার আসতে হবে কিন্তু!

—আসবো। বলে কাঁধের ব্যাগ তুলে নিল নীতা।

সদর পর্যন্ত তাকে এগিয়ে দিল বনলতা। সামনে খোলা জমি, তারপরে বড় বড় রাস্তা। মৃদু কুয়াশা আর অন্ধকারে ঢাকা। নীতা পিছনে মুখ কিরিয়ে হাসল, তারপর সেই রহস্যময় আলো আঁধারির মধ্যে তার আবছা ছায়া মিলিয়ে গেল।

বনলতা দরজা বন্ধ করে শূন্য ঘরটার দিকে চেয়ে দেখল। এ ঘন তার নিজের ঘর নয় অন্য কার ঘরে ঢুকে সে বসে আছে।

আট

অরিজিতের বাড়িটা জগন্নাথ ভুলেই গেছে। আমহাস্ট স্ট্রীট দিয়ে উত্তর মুখো গেলে বাঁ হাতে একটা গলির মধ্যে অরিজিতের বাড়িটা। সেখানে একটা সময় জগন্নাথ অনেকবার গেছে। তখনো অরিজিং বাউণ্ডুলে হয়ে যায় নি, তখনো তাকে ডাকেনি প্রভাস। সেটা প্রায় ছেলেবেলাই বলা যায়। কৈশোর যৌবনের সন্ধিসময়। আজকের বাঁধা বাউণ্ডুলে অরিজিংকে দেখে সেই কিশোর যুবাকে কল্পনা করা কঠিন। দুটি কল্পনার চোখ ছিল তার। কবিতা লিখত, নরম নরম হাত পা, লাজুক মুখভাব। বড্ড ঘরকুনো আর মায়ের আঁচলধরা ছেলে! সে কখনো মোহনবাগানের খেলা, কাবুলিদের নাচ কিংবা দমকলের দুর্গাপূজা দেখতে যায় নি। অরিজিংদের বাড়ির ভিতরের বারান্দায় ছিল পাখীর খাঁচা সারি সারি, ছিল রঙীন 'মাছের কাচ-বাক্স, ব্যাগাটোল, ক্যারাম, গল্পের বই। অরিজিং ঘরেই থাকত। কলেজে পড়তে পড়তেই সে একটা বাজে মেয়ের প্রেমে পড়ে। কলেজের একটা ছেলেমানুষী একজিভিশন, তাতে বিজ্ঞান বিষয়ক প্রদর্শনীতে সেই মেয়েটি ভ্যানিশিং ক্রিম তৈরী করে দেখিয়েছিল। স্মার্ট মেয়ে, মুখচোখও ভাল, কিন্তু দুঃখের বিষয় মেয়েটিও তার নিজের বিষয়ে জানত। অরিজিং প্রদর্শনীতে চারদিনই সেই ভ্যানিশিং দেখতে গিয়েছিল। তারপর প্রায় পাগল হয়ে গেল মেয়েটির জন্য। সকালে মেয়েদের কলেজ, দুপুরে ছেলেদের। অরিজিং সকালে কলেজে এসে বাইরে দাঁড়িয়ে থাকত, দুপুরের

ক্লাশ ফাঁকি দিত। এইটুকু জানত জগন্নাথ। তারপর কী হয়েছিল তা শোনা কথা। তবে, খুবই সাধারণ ব্যাপার। মেয়েটার অন্য মানুষ ছিল, অরিজিংকে দুচার দিন নাচিয়ে ওর পয়সায় সিনেমা দেখা সের্তোরায় খেয়ে ওকে ছেড়ে দেয়। অরিজিং অনেকদিন ঠিক যেন বিশ্বাসই করতে পারেনি যে মেয়েটা ওকে ঠকিয়েছে। ঘর কুনো ছেলে বাইরের যা খেলে প্রথমটায় যা হয়। কলেজের শেষ ক্লাশটায় উঠে অরিজিং তীব্র বিষাদরোগে আক্রান্ত হয়। কিছুদিন মেন্টাল হোম-এ ছিল। তারপর যখন বেরিয়ে এল তখন সে এক উদাসী মানুষ। কথা কম, চিন্তা বেশী। ওর মা মারা যাওয়ার পর একা হল অরিজিং, বাধাবন্ধনের দিক থেকে স্বাধীন। জগন্নাথ যে বার এম এ পাশ করেছে তিন চারটে টিউশানী সম্বল করে, সেবারই অরিজিং তার দোতলায় তালা বুলিয়ে বেরিয়ে পড়ে। নিরুদ্দেশ যাত্রা নয়, সবাইকে জানিয়েই গিয়েছিল। মাস দুই ঘুরে ফিরে এল। বন্ধুদের সঙ্গে আজ মারল যথারীতি, সিনেমা-টিনেমাও দেখল। বলল—ট্রেনে বা বাসে ঘুরে লাভ নেই, ঘুরতে হয় তো পায়দল। এবার পায়ে হেঁটে বেরোচ্ছি, এনিবডি উইশ টু-অ্যাকম্পানী? কেউ রাজী হয়নি। জগন্নাথের তখন জীবন সংগ্রামের শেষ পর্যায়। দারিদ্র্যের তলা থেকে সদ্য-এম-এতে ফাস্ট ক্লাশ পাওয়ার সৌভাগ্যের চূড়ায় উঠেছে। আর নয়। এবার চাকরি, ভাল থাকা, দুবেলা পেটভরে খাওয়া। প্রথমে একটা স্কুলে, তিনমাস পর মফঃস্বল কলেজে, তার একবছর বাদে কলকাতার বড় কলেজে চলে এল জগন্নাথ। ততদিনে অরিজিং উত্তর দক্ষিণ পশ্চিম সব ভারতবর্ষ চষে ফেলেছে পায়ে হেঁটে। মাঝে মাঝে আসত, বলত তার রোমাঞ্চকর অভিজ্ঞতার কথা। আবার একদিন বিদায় নিয়ে চলে যেত। প্রথমটায় হয় তো ঝোঁকের বশেই বেরিয়েছিল অরিজিং, কিন্তু পরে সেটাই তার পেশা হয়ে দাঁড়ায়, ক্রমে সেটা নেশার স্তর ছেড়ে অস্তিত্বের পর্যায়ে পৌঁছে যায়। জগন্নাথ ততদিনে কয়েকটা ইনক্রিমেন্ট, একটা পার্টটাইম লেকচারারশিপ, স্কলফাইন্যান্সলের হেড এগজামিনার হয়ে কিছু পয়সা করেছে। বনলতার সঙ্গে প্রেম সেরে একদা দুঃসাহস ভরে বনলতার ডাকসাইটে বাবার অমতে তাকে রেজিস্ট্রী করেছে। আলাদা বাসায় সংসার পেতেছে। আর তখন অরিজিং হয়তো বা হিমালয়ের গভীর খাঁজে শিপিডের মতো বুক হেঁটে চলেছে, চতুর্দিকে নির্জন তুষারপাত, সানুদেশে নদীর জন্ম, আকাশে দুর্যোগ।

সকলেরই বয়স হয়। অরিজিংয়ের কি হয়নি? তবু অরিজিং শিকড় ছাড়েনি এতদিনে। এবারই জগন্নাথ দেখল অরিজিংয়ের মেকআপ ধুয়ে গেছে, ছদ্মবেশের জীর্ণ ফাঁক ফাঁকর দিয়ে দেখা যাচ্ছে বুড়োটে ক্লান্ত মানুষটাকে। বড় কষ্ট হয় জগন্নাথের। সেদিন ওভাবে অরিজিংকে না বললেও চলত।

কলেজ থেকে বেরিয়ে বাস ধরে শ্রীমানি বাজারের কাছে নেমে অনেকটা হেঁটে আমহাস্ট স্ট্রীট। দু'চার বার গলি ভুল করে জগন্নাথ অবশেষে বাড়িটা খুঁজে পেল। নীচে থেকেই দেখল এতকালের অন্ধকারে পড়ে থাকা দোতলাটায় আলো জ্বলছে। অরিজিং আছে। জগন্নাথ সিঁড়ি বেয়ে ক্লান্ত পায়ে উঠতে লাগল।

সাদা পেয়ে অরিজিং বেরিয়ে এল। এখন একটু হিমভাব বাতাসে, তবু ওর আদুর গা। সেই গায়ের চামড়া গজদন্তের মতো হলেদেটে সাদা। মুখ আর হাতের রঙ তামাটে। রোদে জলে ঐ হয়েছে। প্রথমে একটু থমকে গিয়ে ছিল জগন্নাথকে দেখে, তারপর একটু হাসল।

জগন্নাথের বড্ড লজ্জা করছিল। বস্ততঃ সে খুঁজে খুঁজে অরিজিংয়ের কাছে আজ কেন এসেছে তা ভেবে পাচ্ছিল না। একটু বিস্মিত গলায় বলল—তোমার কাছে এলাম।

—আয়।

ঘরে ঢুকে জগন্নাথ দেখল, সেই পুরোন আমলের আসবাবে বোঝাই ঘরগুলো প্রায় তেমনই আছে। ছ কোণা কাঠের টেবিল, তার সর্বাসে খোদাইয়ের কাজ, দু'মানুষ সমান উঁচু বার্মা সেগুনের আলমারি, বেলজিয়াম আয়না লাগানো, আবলুশ কাঠের লেখার টেবিল, চেস্ট অব ড্রয়ার্স, হ্যাট স্ট্যান্ড—এসব আসবাব আজকাল আর দেখা যায় না। বিশাল মাঠের মতো বড় পালক, হাতীর পায়ের মতো মোটা পায়াল। মেঝের বরফি কাটা পুরনো আমলের মোজেক, নতুন দুচারটে জিনিসের মধ্যে ঘরে টিউবলাইট এসেছে, একটা রেডিওগ্রাম, বুক কেস, বিছানায় একটা হাল আমলের বাটিকের কাজ করা বেডকভার। দেখে শুনে মনে হয় এবার বোধ হয় অরিজিং স্থিত হবে।

রেডিওগ্রামে একটা রেকর্ড চাপানো ছিল। গান শেষ হয়ে খ্যাস্ খ্যাস্ শব্দ করছে, সেটা বন্ধ করল অরিজিং! প্রকাণ্ড একটা গদীওলা চেয়ারে বসে জগন্নাথ ক্লান্তটাকে টের পেল। এ ঠিক শরীরের ক্লান্তি নয়। একটা

মানুষ সব দিক থেকে ভেঙ্গে পড়লে যেমন হয় ঠিক তেমন ক্লাস্তি।
সর্বশাস্ত হয়ে যাওয়ার মতো। জগন্নাথ চোখ বুজে বলল—তোমার ঘরের
বড় আলোটা নিভিয়ে দে, একটা ছোট আলো জ্বাল।

অরিজিৎ টিউবলাইট নিভিয়ে টেবিল বাতিটা জ্বালল। কোনো প্রশ্ন
করল না। তার আত্মীয়-হয়ে যাওয়া চাকর সিধুকে ডেকে চায়ের কথা
বলে দিল। তারপর মুখোমুখি আর একটা চেয়ারে বসে রইল।

জগন্নাথ চোখ সামান্য খুলে দেখে, অরিজিৎ তার দিকে চেয়ে আছে।
কলকাতার মানুষেরা এখন আর কেউ কারো প্রতি তেমন কৌতূহল বোধ
করে না, মানুষে মানুষে সম্পর্কের পচনশীলতা তাদের কৌতূহল ক্ষয়
করে দিয়েছে। কিন্তু অরিজিতের চোখে এখনো সজীব উদ্ভিদের মতো,
জীবনীশক্তির মতো এক আগ্রহ রয়ে গেছে। মানুষ সম্পর্কে এখনো
ওর ক্লাস্তি আসেনি। জগন্নাথ বুঝতে পারে, অরিজিতের কাছে সে বোধ
হয় এই জনাই এসেছে।

জগন্নাথ সিগারেট ধরাল। সারাদিনেই সে আজকাল অজস্র সিগারেট
খায়। যত খায় তত তার স্নায়ু উত্তেজিত হয়, শরীর ক্লান্ত হয়। তবু
খায়। সিগারেট ছাড়া থাকতে পারে না। সিগারেটের কোনো স্বাদ
গন্ধ এখন আর সে বোধ করে না। জগন্নাথ বলল—অরিজিৎ, তুই
আমার ওপর রাগ করিসনি তো?

—রাগ! রাগ করব কেন?

—সেদিন তোকে আমি যা তা বলেছি।

অরিজিৎ ব্যাপারটা উড়িয়ে দেয়—দূর পাগল! তুই কিছু খারাপ
বলিসনি। আমার ভবঘুরেমীটা এখন একটা ছদ্মবেশ মাত্র। আমিও কি
তা বুঝি না?

জগন্নাথ দুঃখিতভাবে বলে—আমি কিছু ভেবে বলিনি রে! তোকে
বরাবর হিংসে করতাম, সেই হিংসে আজও রয়ে গেছে। আমরা যখন
ঘরদোর গোছাচ্ছি তখন তুই দুনিয়ার মেলায় সাতটা হাঁটুরের মতো ঘুরে
বেড়াচ্ছিস—এটা ঠিক আমার সহ্য হয় নি। তাই কমপ্লেক্স থেকে তোকে
সেদিন খামোখা কতগুলো কথা শুনিয়েছি।

অরিজিৎ খুব মৃদু একটু হাসল, বলল—তোমার কথা তুই ভাল জানিস।
কিন্তু আমার মনে হয়, বারমুখো থেকে আমার কিছু লাভ হয় নি।
সারা ভারতবর্ষ কমসেকম দশবার ঘুরেছি, তিব্বত, চীন, বার্মা এমন

কি একবার পাকিস্তান পেরিয়ে মিডল ইষ্ট পর্যন্ত গিয়েছিলাম, ইউরোপের
দরজা থেকে ঘুরে এসেছি। কয়েক লক্ষ মানুষ দেখেছি, কিন্তু তাতে
হলটা কী? সংসারের জ্ঞান আমার কিছুই বাঁড়েনি। এখনো আমি মানুষ
হিসাবে অপরিণত, বোধ বুদ্ধি নাবালকের, গুছিয়ে কথা বলতে পারি
না, তাই ভাবছি এবার আমি—সংসারের সবই তো দেখা দরকার,
যেমন বাইরেটা, তেমনি ভিতরটা কী বলিস?

সুগভীর ক্লাস্তিতে জগন্নাথ মাথাটা পিছনে হেলিয়ে চেয়ে রইল। বিশ্বাস
সিগারেট, ঠোঁটটা জ্বালা করছে। চেয়ে রইল অরিজিতের দিকে। তারপর
করণ হেসে বলে—দেখতে ইচ্ছে হয় তো দেখিস, আমি তো দেখছিই,
বড্ড মাথা ধরেছে, তোমার সিধুকে একটু তড়াতাড়ি চা দিতে বল, আর
যদি পারে তো পানের দোকান থেকে দুটো মাথা ধরার ট্যাবলেট।

—তোমার কী হয়েছে? শরীর খারাপ?

—সব খারাপ, শরীর, মন, কপাল সব।

বাইরে ফিকে অন্ধকার, বাতাসে হিমভাব, অল্প একটু কুয়াশার আন্তরণ,
জানালার বাইরে আলোজ্বলা কলকাতার আকাশ আবছা দেখাচ্ছে।

অরিজিৎ উঠে ভিতর বাড়িতে সিধুকে বলতে গেল। ফিরে এসে
আবার বসল মুখোমুখি। তারপর মুদু গলায় বলল—সেদিনের চেয়ে আজ
তোকে রোগা লাগছে। এত অল্পদিনে মানুষের চেহারা পাল্টায় না, একটা
কিছু হয়েছে জগন্নাথ!

—হয়েছে। তিজ্ঞ গলায় জগন্নাথ উত্তর দেয়।

—কী?

—অরিজিৎ, আমি বড্ড ভয় পাইরে?

—কিসের ভয়?

—স্পষ্ট কোনো ভয় নয়। সেদিন কতগুলো ছেলে চাঁদা চাইতে
এসেছিল। ইতর টাইপের ছেলে, পাড়ার মস্তান টস্তান হবে। খামোখা
চোখ গরম করে কথা বলছিল। তাদের সঙ্গে ছোট্ট একটা টাসল্ হয়ে
গেল। বড্ড নার্ভাস লাগছিল সেই থেকে। কেবলই মনে হচ্ছে, ভদ্রলোক
হয়ে থাকার মধ্যে অনেক ট্রাবল্ আছে। চারদিকে কত অ্যান্টি ফোর্স,
এত বিরুদ্ধ শক্তি যে এর মধ্যে ভদ্রলোক থাকা বড্ড মুশ্কিল। ছেলেগুলো
আমাকে অপমান করে গেল, কিছু কয়তে পারলাম না, মনে হচ্ছে
কিছু করা উচিত ছিল। সেই থেকে মনটা বড্ড চঞ্চল। তার ওপর বনলতা—

বলে কিছুক্ষণ উদাস চোখে চেয়ে থাকে জগন্নাথ।

অরিজিৎ অপেক্ষা করে।

জগন্নাথ শ্বাস ফেলে বলে—যাক গে, মোটকথা, মনটা ভাল নেই।
ইচ্ছে করছিল কোথাও গিয়ে দুদণ্ড শান্তিতে বসে থাকি, তোর কাছে
চলে এলাম।

অরিজিৎ সমবেদনার গলায় বলে—বোস না তোর যতক্ষণ খুশী।
কে তোকে ওঠাচ্ছে? তোর বাসায় ফোন থাকলে একটা ফোন করে
দে, তারপর এখানেই আজ রাতে থেকে যা। সারা রাত জেগে দু'জনে
গল্প করব।

জগন্নাথ মাথা নাড়ল—না রে, তা হয় না। বনলতা একা থাকবে।

অরিজিৎ চুপ করে থাকল কিছুক্ষণ, তারপর বলল—জগন্নাথ, সংসার
করার ঐ একটা অসুবিধে।

—কী?

—ঐ যে বললি বনলতা একা থাকবে! কে একা থাকবে! সেই
চিন্তায় আমি আর কোথাও থাকতে পারব না, সংসারের এইটাই সবচেয়ে
বড় অসুবিধে।

—তুই সেদিক দিয়ে সুখী অরিজিৎ। তোর কারও ভাবনা নেই।

অরিজিৎ হাসল—সেটাও অসুবিধে, আমার জন্য কেউ ভাবছে না,
অপেক্ষা করছে না। আমার কেউ নেই—এই চিন্তাও বড় অসহ্য। বুঝলি
জগন্নাথ, সুখ আসলে কোথাও নেই, সুখের চিন্তায় একমাত্র সুখ আছে।

—আমার তাও নেই। আমার সুখের চিন্তাও শেষ হয়ে গেছে।

—কেন রে?

—আমার আর কিছু হয়ে ওঠার নেই। আমি যা হয়েছি সেই পর্যন্তই
আমার লিমিট। তার ওপর বিয়েটা করে ফেলেছি, মেয়েদের নিয়ে সুখের
সংসারের ছবি দেখা ফিনিশ্। আর কী বাকী থাকল বল!

—সমস্ত পৃথিবীটাই তো বাকী থাকল রে। পুরো জীবনটা।

—সে সব তোর ব্যাপার। গোটা পৃথিবী বা পুরো জীবন নিয়ে আমার
আর ভাবনার কিছু নেই। আমি ফাঁদে পড়া মানুষ, বয়স হয়ে গেছে,
সব ছেড়ে ছুড়ে বেরিয়েও পড়তে পারব না। আমার জীবনে একটাই
মাত্র জ্ঞানলা খোলা আছে। আর বই। কেবল বই আর বইয়ের মধ্যে
ডুবে যাওয়া ছাড়া কিছু করার নেই।

—তোর কী হয়েছে জগন্নাথ?

জগন্নাথ সে কথার উত্তর দিল না। অন্যমনে বলল—কদিন আগে
কলেজে একটা উটকো লোক এসে হাজির। বনলতাদের বাড়িতে এককালে
আশ্রিত ছিল, এখন রাণাঘাটে পোলট্রি করেছে। আমার ধারণ, ছেলেটা
বনলতাদের বাসার চাকর বাকরের কাজ করত। অবশ্য এখন ভদ্রলোক
হয়ে গেছে। সে এসে আমাকে বিস্তর উপদেশ দিল, একটু চোখও
রাঙাল। বনলতাকে বিয়ে করেছি বলে বিস্তর লোক আমার ওপর চটা।

অরিজিৎ উদ্বিগ্ন হয়ে জিজ্ঞেস করে—কেন?

জগন্নাথ ম্লান হাসে—কী জানি, ঠিকঠাক সব বলতে পারব না।
তবে শেষ পর্যন্ত আমার বিয়েটা বোধহয় টিকবে না রে অরিজিৎ!

—কী সব বলছিস! বিয়ে তো সদ্য করেছিস!

জগন্নাথ নিখর বসে থাকল। চোখ বোজা। অসীম ক্লান্তি।

সিধু লুচি আলুর দম করে এনেছে। চা আর মাথা ধরার বড়ি।
খাবারটা জগন্নাথ ছুঁলও না। চা দিয়ে বড়ি দুটো গিলে ফেলল। চাটুঁকু
খেল নিঃশেষে। তারপর আবার সিগারেট।

অরিজিৎ তার আগ্রহী এবং স্নেহশীল চোখ দুটো মেলে চেয়ে আছে
কেবল। জগন্নাথের সে কিছুই জানে না। তবু তার আগ্রহ এবং উদ্বেগ
দুই-ই তার চোখে ফুটে আছে। মানুষ সম্পর্কে এখনও তার ক্লান্তি আসেনি।

জগন্নাথ কপালটা ডানহাতে টিপে ধরে বলল—আমার প্রবলেমের
কথা বলে কোন লাভ নেই। প্রতিটি লোক প্রতিদিন একে অন্যকে
নিজের দুঃখের কথা শোনাতে থাকে। ব্যাপারটাকে আমি ঘেমা করি
অরিজিৎ। আমি তোর কাছে কিছু বলতে আসিনি। শুধু তোর ঠাণ্ডা
ঘরটায় নিঃবুঝ একটু বসে থাকব কিছুক্ষণ।

অরিজিৎ জগন্নাথের মুখের ওপর থেকে চোখ সরিয়ে নিল।
বলল—বাতিটা নিভিয়ে দিই, তুই বসে থাক। যতক্ষণ খুশী।

—না না। তুই বোস। আমি তোকে দেখব। অরিজিৎ, তুই ঠিক
সংসারের মানুষ নোস বলেই আমি তোর কাছে এসেছি। এখনো তুই
বেশ ফ্রেশ আছিস। তোর শরীরে আর মনে এখনো প্রচুর ক্যালসিয়াম
ভিটামিন ক্লোরোফিল। তাজা ভাঁটো একটা গাছের মতো আছিস এখনো।
তোর কাছে এলে এখনো রোদ বাতাস আর গাছপালার গন্ধ পাওয়া
যায়। তুই বসে থাক আমার সামনে। আমার মতো তোকে এখনো

শহুরে রোগ ধরেনি।

অরিজিৎ প্রথমটায় অবাক হয়েছিল, পরে হেসে ফেলল—কী আবেল তাবোল বকছিস? ক্যালসিয়াম ক্লোরোফিল ওসব আবার কী?

জগন্নাথ দীর্ঘশ্বাস ফেলে বলল—তুই ঠিক বুঝবি না। ভাবি, আমি যদি গেরো চাষা হতাম তাহলে আমার এতসব ছেঁদো সমস্যা থাকতো না। থাকগে। তুই হয়তো কী না কী ভাবছিস! তার চেয়ে তোর কথা বল। এত ঘুরে এলি, এখন কী করবি?

অরিজিৎ, মাথা নাড়ল—কী করব? কিছু করার নেই, চাকরির বয়স পার হয়ে গেছে, কিছুই তেমন শিখিনি চাকরি পাওয়ার মতো।

—চলে যাবে। খাওয়া পরার তেমন ভাবনা নেই, বুকলি। বাড়ির নীচের তলায় ভাড়াটে আছে, ব্যাঙ্কে কিছু টাকা সুদে বেড়েছে, একা মানুষ, চলে যাবে।

—একা? একাই থাকবি?

—তারও কিছু ঠিক নেই। মাঝে মাঝে ভাবি, একাই ভাল! আবার কখনো কখনো একা থাকতে ভারী ভয়ও করে। বন্ধুবান্ধবরা সংসারী হয়ে গেছে, আজ্ঞা মেরে সময় কাটানোরও উপায় নেই।

—বিয়ে করবি?

—ভাবছি।

জগন্নাথ চুপ করে রইল। এসব আলগা কথা। কোনো মানে নেই।

অরিজিৎ মুখ নীচু করে নিজের নখ দেখতে দেখতে বলল—একজন প্রকাশক ধরেছে একটা ভ্রমণ কাহিনী লিখে দিতে।

বলে মুখ তুলে হাসল।

—কী লিখে দিতে?

—ভ্রমণ কাহিনী। এখন নাকি বাজারে প্রচুর ডিম্যান্ড। শহুরে লোকেরা বসে বসে মানস-ভ্রমণ করতে ভালবাসে। কিন্তু আমার তো লেখাটেখা আসে না, তাই গলদঘর্ম হয়ে যাচ্ছি কদিন ধরে, তবু এ একটা নতুন রকমের খেলা। রাজ্যের ভ্রমণ কাহিনী কিনে এনেছি, কয়েকটা ডিকশনারী আর কাগজপত্র। সারাদিন লিখি আর কাটি। মনের মতো হয় না।

জগন্নাথ অনেকক্ষণ বাদে হাসল, বলল—দ্যাখ, যদি লাগাতে পারিস।

অরিজিৎ উদাস হয়ে বলে—দূর, সব কি লেখা যায়? একটা সূর্য ডোবার যে রঙ তার সব সৌন্দর্য কি লেখায় আসে? লিখতে গিয়ে

তাই বড্ড দুর্বল লাগে। দেখেছি, অনুভব করেছি, আনন্দিত হয়েছি। সেটা আর পাঁচজনকে বোঝাই কী করে? কেবল সুন্দর মনোহর, অতীব চমকপ্রদ—এ আর কত লেখা যায়?

জগন্নাথ হাসতেই থাকে।

অরিজিৎ হাসিটায় সংক্রামিত হয়ে হেসে বলে—মানুষের ভাষা বড় লিমিটেড। জগন্নাথ, তুই আমাকে একটু আধটু লিখতে শেখাবি?

জগন্নাথ নিজের এলোমেলো লম্বা চুল মুঠো করে ধরে থেকে বলল—আমিও ভাষার কিছু জানি না। জানিস, সেদিন ঐ ছেলেগুলোকে খুব অপমান করার ইচ্ছে হয়েছিল। কিন্তু কী বললে অপমান করা যাবে সেই ল্যাংগুয়েজটা খুঁজেই পেলাম না। আমার স্টক অব ওয়ার্ডস বড্ড কম, ভেবে দেখছি।

একটু চুপ করে থেকে জগন্নাথ একটু গাড়িস্বরে আপন মনে বলল—ভাষা যে কী জিনিস অরিজিৎ, কী সাংঘাতিক! যে ভাষায় একদিন বনলতার সঙ্গে প্রেম করেছিলাম সে ভাষাটা কোথায় গেল? সেদিন ছেলেগুলোর দিকে যখন রুখে যাচ্ছিলাম, সেদিন বনলতা পথ আটকে দাঁড়াল, আমি ওর চুল ধরে টেনে সরিয়ে দেওয়ার চেষ্টা করতে করতে ওকে গাল দিলাম—ইউ বিচ্। সেই থেকে আমাদের মধ্যে ফাটলটা বড্ড স্পষ্ট হয়ে গেল। ল্যাংগুয়েজের একটু গোলমালে কত কী হয়ে যায়!

অরিজিৎ একটু অবাক হয়ে বলে—বলনি? ঐ কথা কেউ বৌকে বলে? এমন তো কিছু দোষ করেনি তোর বৌ!

জগন্নাথ আলাধরা চোখে চেয়ে বলে—মানুষের যখন ভাষা পার্লেট যায় তখন আসলে ভিতরে মানুষটাও পার্লেট। নইলে আমি ওকে ওকথা বলব কেন? আমি চিরকাল ভদ্রলোক। কিন্তু তবু কিছুতেই কথাটা আটকাতে পারলাম না। আনকনশাসলি বেরিয়ে গেল। তখন খেয়াল করিনি কিন্তু, তারপর অনেকবার ভেবে দেখেছি কথাটা কি করে এল আমার জিভে। ভেবে পাইনি। নিজের ভাষাকে আমার বিশ্বাস নেই।

সতর্ক গলায় অরিজিৎ প্রশ্ন করল—তোদের প্রবলেমটা কী?

জগন্নাথ অসুস্থ একটা হাসি হেসে বলে—আমাদের কোনো প্রবলেম নেই। ভালবাসার বিয়ে, তারপর সুখে দিন যাচ্ছিল। অবশ্য আমরা জাতটা মানিনি, বনলতা বামুনের মেয়ে। সেইজন্য আমার পরিবার থেকে একটা আপত্তি উঠেছিল। মা একদম মানতে চায়নি, তার কেবল পাপের ভয়।

বামুনরা যতই মুগী খাক ওদের এখনো বেশীর ভাগ লে-ম্যান ভয় খায়! প্রতিলোম বিয়ে তাই মা ভয়ে অস্থির। আমাকে তাই আলাদা হতে হল। বনলতার বাবা অবশ্য জাত ফাত মানেন কিনা জানি না, কিন্তু গোলমালটা ওদিকেও দেখা দিয়েছে। ওর বাবা বড় রাশভারী বিশাল চেহারা, বিশাল চাকরি, বিশাল পার্সোনালিটি, বনলতা তার একমাত্র মা-মরা সন্তান। পাত্র হিসেবে আমাকে তিনি গণ্যই করেন না। তিনিও আমাকে অ্যাকসেপ্ট করেননি। কৌশিক নামে একটি ছেলের সঙ্গে বিয়ে ঠিক হয়েছিল, বনলতার বাবা পাকা কথাও বলেছিলেন! সে সময়ে আমরা লুকিয়ে রেজিস্ট্রি করি। সেই জন্য বখেরা।

অরিজিৎ একটা শ্বাস চেপে রাখল! তার মুখটা স্নান দেখাল। একটু সময় চুপ করে থেকে সে বলল—জগন্নাথ, কাজটা বোধ হয় তুই ভাল করিসনি।

জগন্নাথ মাথা বাঁকিয়ে বলে—করিনিই তো। তবু আমাদের দুজনের মধ্যে কোনো প্রবলেম ছিল না। উই বোধ ওয়্যার হ্যাপি। কিন্তু সেটা খুব অল্প সময়ের জন্য। এত লোককে অসন্তুষ্ট করে বোধ হয় সুখী হওয়া যায় না। তুই কি অভিষাপটাপ মানিস?

অরিজিৎ বলে—দূর!

—আমি আজকাল মানছি।

—কেন?

—অভিষাপ ছাড়া কী বল? দুটো নিষ্পাপ সুখী স্বামী স্ত্রীর মধ্যে আচমকা এ কী গেরো? বাইরে থেকে দেখলে কোনো প্রবলেম নেই, তবু কেউ কারো শরীর ছুঁতে পারছি না, কথা বলার সময়ে সাবধান হয়ে যাচ্ছি। কী যে হচ্ছে বুঝতে পারছি না।

অরিজিৎ সামুনার কথা বলবে, আশা করেছিল জগন্নাথ। কিন্তু অরিজিৎ তা বলল না। অনেকক্ষণ অন্যান্যনস্ক থেকে বলল—আমি বিস্তর ঘুরেছি জগন্নাথ, তার ফলে আমার কিছু প্রত্যক্ষ জ্ঞান বেড়েছে, আমি দেখেছি মানুষ বাই নেচার ক্লাসিফায়ড।

অর্থাৎ?

—অর্থাৎ, মানুষের মধ্যে সুস্পষ্ট শ্রেণীভেদ আছে। জাত মানিস বা না মানিস মানুষে মানুষে যে পার্থক্য আছে তা আমার অভিজ্ঞতালব্ধ সত্য। বর্ণাশ্রম আমি মানি। মানুষের বৈশিষ্ট্য অনুযায়ী তাকে শ্রেণীভাগ

করা সম্পূর্ণ বৈজ্ঞানিক পদ্ধতি, অবশ্য তাকে ছেঁদো জাতিভেদে রূপান্তরিত করে নিলে অন্য কথা। কিন্তু এটা ঠিক, প্রকৃতিতে হুবহু, একরকমের এক জাতের কোনো গাছ, পশু পাখি নেই। মানুষেরও তাই।

—তাতে কী হল?

—এই পার্থক্য বর্ণাশ্রম।

—হোকগে। কিন্তু আমার প্রবলেমের সঙ্গে এর কী সম্পর্ক? গভীর আর হতাশার সঙ্গে জগন্নাথ বলে।

চুপ করে থাকল অরিজিৎ। তারপর আস্তে আস্তে বলল—হয়তো সেই। আমি স্বামী স্ত্রীর সম্পর্ক কীরকম হয় তা তো জানি না, তাদের প্রবলেমটাও খুলে বলিস না। তবে হয়তো এটা তেমন গভীর বা জটিল কিছু নয়। মিটে যাবে। কিন্তু তাহলেও বলি, এরকমটা না করলেও পারতিস। বহুদিনের পুরানো একটা প্রথা, তার পিছনের কারণ বা উদ্দেশ্য না জেনে সেই প্রথাকে ভেঙে ভাল করিসনি।

বিরক্ত হল জগন্নাথ। আবার সিগারেট ধরাল। অরিজিৎের শাস্ত মুখচ্ছবির দিকে চেয়ে বলল—প্রথা ভেঙেছি বলেই কি অশাস্তি?

—তা বলিনি।

জগন্নাথ একটু রাগের স্বরে বলে—অরিজিৎ, সংসারের সম্পর্কগুলো অত সরল করে বোঝা যায় না। আমাদের প্রবলেমটা জটিল!

—জানি।

—কী জানিস?

অরিজিৎ লাজুক মুখভাব করে বলে—জানি বলাটা ভুল হল। জানলাম। তুই জানালি।

—কিছু জানিস না।

—তাহলে জানি না।

জগন্নাথ সিগারেটটা আশট্রেতে পিষে ফেলে আবার একটা ধরাল। তারপর হঠাৎ বলল—নীতা নামে একটা মেয়ে ছিল, বুঝলি। আমারই ছাত্রী। মাঝে মাঝে ক্লাশের বাইরে আমার কাছে পড়া বুঝে নিতে আসত। আমার কোনো দুর্বলতা ছিল না, কিন্তু ওর ছিল। মেয়েটা বড় ভাল। খুব সুন্দর টুন্দর কিছু নয়, আটপৌরে কিন্তু স্বভাবটি ছিল ঠাণ্ডা, মনে হয় খুব একটা বুকছেঁড়া ভালবাসা ছিল তার আমার প্রতি, পাত্রা দিইনি। আজকাল সেই নীতার কথা খুব মনে পড়ে। মেয়েটা হয়তো এ জীবনে

খুব সুখী হতে পারবে না।

জগন্নাথ একটা শ্বাস ফেলে উঠে দাঁড়াল।

—চললি?

—যাই। তোর ঘরটা তেমন ঠাণ্ডা নেই, আগে যেমন ছিল। ভেবেছিলাম তোর ঘরটায় বসে পুরোনো কথা বলব খানিকক্ষণ, মনটা হালকা হয়ে যাবে। হল না। বয়েসটা নেই, মনটাও নেই।

অরিজিৎ কথা বলল না।

জগন্নাথ বলল—ভ্রমণকাহিনীটা লেখ। আমি গিয়ে আমার নিরানন্দ ঘরটিকে ফেস্ করি।

সিঁড়ি ভেঙে জগন্নাথ নেমে এল।

তার কেবলই মনে হয়, যেখানেই সে যাক কোথাও তার জন্য কোনো ঠাণ্ডা, নিব্বুম একটা জায়গা নেই যেখানে সে দুদণ্ড বসে থাকবে।

কাল একবার তিসাটার খোঁজ করতে যাবে সে।

নয়

রাতে ভাল ঘুম হয় না আজকাল।

এখন প্রথম শীত পড়েছে। তুলোর কম্বলে ওয়ার দিয়ে গায়ে দিয়ে পাতলা একটা ওম্ হয়। চড়াই পাখীর বুকের মতো। তাতে নিঃস্বুম ঘুম হয়। কিন্তু বনলতার হয় না। মাথাটা বড্ড গরম হয়ে ওঠে। মাঝরাতে উঠে বাথরুমে যায়, হিম হয়ে থাকা জল কপালে, ঘাড়ে থাকে। আবার চূপ করে এসে শোয়। চোখ লেগে আসে। তখনই আবার দুঃস্বপ্ন দেখে। চমকে ঘুম ভেঙে যায়।

জগন্নাথ কি ধুমোয়? বোধহয় না। মাঝে মাঝে দেখেছে সে। জগন্নাথ উঠে সিগারেট খাচ্ছে জানালার কাছে দাঁড়িয়ে। বনলতা চেয়ে থাকে। বড্ড কষ্ট হয়। এই লোকটাকে সে কত ভালবাসত কদিন আগেও! আজও কি বাসে না? কিন্তু ভালবাসা জিনিসটা সঠিক হিসেবে আসে না। সকলের ভালবাসা কি সকলের মাপ মতো হয়? বৃথা এক ভালবাসার রক্তশ্রোত এক গোপন ক্ষতস্থান থেকে ড্রিপ ড্রিপ করে ফোঁটার ফোঁটায় গড়িয়ে যাচ্ছে। তার সামনে অঞ্জলি পেতে বসে কে ভিক্ষে করছে? কে পান করছে পিপাসার্তের মতো? কেউ না। রক্তক্ষরণ বৃথা হয়ে যাবে।

সর্বক্ষণ বনলতা তার বাবার কথা ভাবে আজকাল, আর ঘুমের মধ্যেও শুনতে পায় একটা দূর উড়োজাহাজের শব্দ কিন্তু অবিরল শব্দ। কলঘরে যখন কলের জল বয়ে যায় বেখেয়ালে, তেমনি এক উদাস করা শব্দ সেটা। উড়োজাহাজের কথা কেন বনলতার মনে আসে? সে তো কৌশিকের দিকে একবারের বেশী তাকিয়ে দেখেনি। একটা উড়োজাহাজ কোথায়, কত দূরে ভাসিয়ে নিয়ে গেছে একটা অচেনা লোককে। আর এই এক ঘুমহীন অন্ধকারে নিজের হৃদয়ের ভিতরে সেই শব্দটাই বাগান থেকে উড়ে আসা বোকা ফড়িঙের মতো উড়ে উড়ে বসে, পাখা কাঁপায়।

এও কি ভালবাসা? বনলতা আর এসব বিশ্বাস করে না। বড় খাট, তার একপাশে বনলতা, পড়ে থাকে। কদিন হল জগন্নাথ তার আলাদা বিছানা করেছে চোকিতে। এক ঘরের দু পাশে দুজন। শরীর স্পর্শ হয় না। কথাবার্তা কমে গেছে ঢের। চোখাচোখি তারা এড়িয়ে চলে।

কিছু হয়নি। বাইরের কোন কলহ নয়, অপমানও নয়। ভুল বোঝাবুঝি নয়। শুধু একদিন মারকুটে বাজে কতগুলো ছেলের সঙ্গে বগড়া করতে যাচ্ছিল বলে জগন্নাথকে আটকাতে গিয়েছিল সে। জগন্নাথ বনলতার অমন সুন্দর চিকন, কেশরাশি দু হাতে মুঠো করে চেপে ধরে বলেছিল—ইউ বিচ! কেন বলেছিল? ভাবতে গেলে বনলতার দুটো চোখের কোল জুড়ে টলটলে জল জমে ওঠে, কেন বলেছিল জগন্নাথ? মুখ ফসকে যে কথা বেরোয় তার কি কোনো শিকড় থাকে না? সে কি হঠাৎ উড়ে আসা কথা? সে কি বাইরে থেকে আসে?

তা নয়, বনলতা জানে একসময়ে বাবা তাকে শিখিয়েছিল মুখ ফসকে কথা বলে কিছু নেই। কথার জন্ম মুখে হয় না। কথা জন্মায় মানুষের গহীন, অন্ধকার মনে। সেই মন কে কারটা দেখতে পাচ্ছে? বনলতা জানে, জগন্নাথ কিছু সচেতনভাবে ভেবে বলেনি। ছেলেগুলোর ওপর বড্ড রেগে গিয়েছিল বলে তার মাথার ঠিক ছিল না, মনের ভারসাম্য হারিয়ে ফেলেছিল। ওটুকুর জন্য ক্ষমাও করা যেত জগন্নাথকে। কিন্তু ক্ষমা জগন্নাথ চাইছে না। একবার, উন্মুখ জগন্নাথ বনলতার দিকে অকপটে তাকিয়ে যদি একবার ক্ষমা চাইত। বনলতা তাই জানে, কথাটা মুখ ফসকে বেরোলেও মনে কখনো না কখনো তার জন্ম হয়েছিল, মানুষ এরকম আচমকা কখনো কখনো তার অন্ধকার মনটাকে প্রকাশ করে ফেলে।

বনলতার ঘুম আসে না। সারা রাত কেবলই পাশ ফেরে! পাশ বালিশ আঁকড়ে ধরে। বিছানাটা শরীরের তাপে গরম আর অসহ্য হয়ে যায়, আবার তখন পাশ ফিরে ঠাণ্ডা দিকে চলে যায় সে, বালিশ উল্টে শোয়। ঘুমোয় একটু, স্বপ্ন দেখে, জেগেই থাকে বেশী।

সকাল বেলাটায় একরকম ভালই থাকে বনলতা, রান্নাঘরে তার তখন হাজার কাজ। কাজ অবশ্য যেটুকু তা বনলতার অগোছালো স্বভাব আর অনভ্যাসের জন্য হাজার গুণ বাড়ে। ডালের জল পড়ে উনুন নিভে যায়, তরকারী কাটতে বসে আঁচ বইয়ে দেয়, আবার কয়লা ঢেলে আঁচ করতে গিয়ে গুচ্ছের কয়লা নষ্ট, এরকম কত কী হয়! তবু সে সময়টুকু ব্যস্ত থেকে কিছুক্ষণ অন্ততঃ সে তার উড়েজাহাজের শব্দ আর গোপন রক্তক্ষরণের হাত থেকে রেহাই পায়। ততক্ষণ চোখের জলটুকুকে অন্ততঃ আটকাতে পারে।

জগন্নাথ আজকাল সকালে খবরের কাগজ মুখে দিয়েই কাটায়। চা চায় না। বনলতাই বার তিনেক চা দিয়ে যায়।

শিশিরে ভেজা কবোক্ষ এই প্রথম শীতের সকালগুলো তাদের কত সুন্দর কাটতে পারত! বয়ে যায়, ঝরে যায়, নষ্ট হয়ে যায় তাদের সুন্দর সময়। অভিমানে? না, তাও নয়। অভিমানের ভিতরে একটা কিছু আছে যা ক্রমশঃই ভালবাসাকে নষ্ট করে দেয়। কিন্তু এ ঠিক অভিমানও নয়। এ হচ্ছে ব্যবধান।

সকালে আজ সেই ব্যবধানটাই টের পেল বনলতা!

ঠিকে ঝিটা বড্ড সেয়ানা। বনলতাদের রেশন কার্ড নেই, খোলা বাজার থেকে চাল চিনি কেনে তারা। ঠিকে ঝি কদিন হয় একটু সস্তায় তার নিজের রেশনের চিনি দেয় বনলতাকে। তাতে তার প্রতি কেজিতে দুটাকা লাভ থাকে। তবু পাঁচশো গ্রামের হরলিক্সের শিশি ভরে না কেন এই নিয়ে আজকাল একটা খুঁত খুঁত করতে শিখেছে বনলতা। আগে খেয়াল করত না, ঝিও সুযোগটা নিত। বনলতা সেয়ানা হচ্ছে দেখে ঝি আজকাল নতুন কায়দা করে ততক্ষণ বনলতাকে এ বাড়ি সে বাড়ির গল্প শোনায়। খুব আন্তরিকভাবে বনলতার শরীরের খবর নেয়, সংসারের গল্পটল্প শুনতে চায়। কথা বলার লোক পেয়ে বনলতা প্রসন্নও দেয় তাকে। চিনির মাপ নিয়ে কথাটা আর ওঠে না।

ঝি আজ সকালে চমৎকার একটা গল্প ফেঁদেছিল। একটা নতুন বৌ

আর তার খিটখিটে শাসুড়ির ঝগড়ার কথা। শেষে একদিন বৌটার শাসুড়ি বর কেমন করে আস্তে আস্তে মায়ের ওপর বিরক্ত হতে হতে গায়ে হাত তুলে ফেলল সেই গল্প। গল্পটার চূড়ান্ত জায়গায় এসে বনলতা শুনতে পেল সদরের কড়া নড়ছে। গা করল না। প্রায় সময়েই আজকাল জগন্নাথের ছাত্রা নম্বর জানতে আসে। এসে এসে ফিরে যায়। পরীক্ষার খাতা উঁই হয়ে পড়ে আছে। জগন্নাথ ছোঁয়নি এখনো।

কিন্তু আজ কড়া নাড়ার শব্দ হতে না হতেই জগন্নাথ চীৎকার করে ডাকল—বনলতা, দেখে যাও—

সেই ডাকে বনলতা কেঁপে উঠল না, চমকাল না, আনন্দিত হল না। গত প্রায় পনেরো দিনে যে জগন্নাথ একবারও তাকে এরকম ভাবে ডাকেনি সে কথাও মনে পড়ল না। নিরুত্তাপভাবে সে উঠল। বাইরের ঘরে এসে দেখল, খুব সাজ পোশাক পরা দুটি মেয়ে দাঁড়িয়ে আছে, সঙ্গে একটি প্যাট পরা ছোকরা, ছোকরাটার চেহারায় জগন্নাথের ছাপ আছে।

দুজনের মধ্যে একজন মেয়ে সুন্দরী আর অহংকারী। সে নিম্পলক এবং তীক্ষ্ণ চোখে বনলতাকে দেখছিল। অন্য মেয়েটির বয়স সুন্দরজনের চেয়ে একটু বেশী, বাড়ন্ত মোটাসোটা আলুদী চেহারা, কপালে সাদা টিপ, পরনে সাদা খোলার শাড়ি, মুখে হাসি, হাতে মিষ্টির বাস্কা একটা শাড়ির প্যাকেটও।

সেই এগিয়ে এসে হঠাৎ প্রণাম করে বলল—বৌদি, আমাদের তো চেনোও না! আমরা তোমার দুই ননদিনী আর এটি তোমার দেওর। দেওরটি পেটুক। ননদিনীরা ঝগড়ুটে, খুব সাবধান।

বলে হাসল খুব। সুন্দরজন একবার হাসল।

—এসো। বনলতা নিরুত্তাপ গলায় বলল।

জগন্নাথের পরিবারের কাউকেই সে চেনে না। এই প্রথম সে ওর পরিবারের লোকজন দেখছে।

সন্দের ছেলোট অর্থাৎ তার দেওর ভারী লাজুক। মুখখানি মিষ্টি, চোখ তুলে তাকায় না। সে প্রণাম করার পর সুন্দরজন যেন অনিচ্ছা সত্ত্বে এগিয়ে এল।

বনলতা বলল—থাক না ওসব।

—না, থাকবে কেন? সম্পর্কে তো তুমি বড়োই! সুন্দরজন বলল।

মোট মেয়েটি বলল—আজ কিন্তু থাকছি আমরা, বুঝলে? সারাদিন।
খাবো দাবো আর তোমার ঘরসংসার দেখব।

বনলতা আস্তে করে বলল—দেখো। এতদিনের মধ্যে বুঝি আসার সময় হয়নি?

—কী করে হবে? আমরা দু বোন এবার একসঙ্গে প্রিইউনিভার্সিটি দিলাম যে!

—ও!

—শাড়িটা দেখ তো বৌদি, পছন্দ না হলে দোকানদারকে বলা আছে বদলে দেবে।

—দেখব'খন, রান্নাঘরে যে আমার কড়াই পুড়ে গেল।

—যাক্গে। আগে দেখ। আর রান্নাবান্নার চার্জ আজ আমরা নিচ্ছি। তুমি একটু সাজো তো। নতুন বৌকে একটু দেখি কনের সাজে। তুমি আজ বিবি সেজে বসে থাকবে কিন্তু বৌদি, মাইরি বলছি।

জগন্নাথ আবার খবরের কাগজে মুখ ঢেকেছে, আড়চোখে দেখে নিল বনলতা। একটা দীর্ঘশ্বাস ভেঙে কয়েকটা দ্রুত শ্বাস ফেলে নিল সে। এরা সব জগন্নাথের বোন, ভাই, কিন্তু তার কে?

সুন্দর মেয়েটা কথা বলছে না, কিন্তু প্রায় এক দৃষ্টে তাকিয়ে আছে। অহংকারী মুখচোখ এবং চোখে একটা ঈর্ষার জ্বালাও আছে বুঝি। সুন্দরীদের এই এক মুষ্কিল, অন্য সুন্দরীর মুখোমুখী হলেই তারা বড্ড সচেতন হয়ে ওঠে। বনলতা নিজের চেহারা নিয়ে কতকাল ভাবে না।

—তুমি রেবা, না? বনলতা সুন্দরীজনের দিকে তাকিয়ে বলে।

—হঁ। সংক্ষিপ্ত উত্তর দিয়ে রেবা মুখটা ফিরিয়ে নেয়—

—কী সুন্দর তুমি!

—ছাই! তোমার কাছে কিচ্ছু না। সে বলল।

বনলতা একটু হাসল। ঠিকই, সে এখনো যা সুন্দর তার কাছে বহু সুন্দরই ম্লান হয়ে যায়। তবু সে বলল—আমার আর চেহারা কী! বিয়ের আগে যাও বা একটু ছিল, এখন সব গেছে।

মোটাজন খুব হাসতে থাকে, বলে—বৌদি ভাই, বিয়েটা কি তাহলে তোমার মনের মতো হয়নি?

বলেই দাদার দিকে চেয়ে তাড়াতাড়ি জিব কাটল। জগন্নাথ অবশ্য এসব লক্ষ্যও করছে না। খবরের কাগজে মুখ ঢেকে আছে। আড়াল

থেকে সিগারেটের নীল ধোঁয়া পাকিয়ে পাকিয়ে উঠছে।

—চলো তোমার রান্নাঘর দেখে আসি। বলে মোটাজন বনলতার কোমর ধরল অনয়াসে। চট করে আপন করতে পারে।

বামুনের মেয়ে বিয়ে করেছে বলে জগন্নাথের বাড়ি থেকে ব্যাপারটাকে কেউ অনুমোদন করেনি। প্রায় একঘরে অবস্থায় একা বিয়ে করেছিল জগন্নাথ। বিয়ে মানে রেজিস্ট্রেশন, গড়গড় করে কতগুলো সরকারী মস্ত্র বলা, তার পরই তারা বর-বৌ হয়ে যায়। বুঝি তাই আজও বনলতা নিজেকে বৌ-বৌ ভাবতে পারে না ঠিকমতো। সিঁদুর পরে, নামের শেষে 'বোস' লেখে, তবু যেন সে, সেই বনলতা লাহিড়িই রয়ে গেল আজও।

রান্নাঘরে এসে মোটাজন বলল—তুমি বুঝি আমার নাম জান না? আমি দয়াময়ী, সবাই দয়া কিংবা দয়ী বলে ডাকে!

বনলতা হাসল—জানি।

—তরকারী টরকারী বের করো কুটে নিই। ভাইকে পাঠাই ডিম আনতে, ডিমের ডালনা হোক। হোটেল টোটেল কাছাকাছি নেই?

—হোটেল দিয়ে কী হবে?

দয়া মুখ টিপে হাসল—মুগীর মাংস আনবো।

—মাছ আছে, ডিম আনানো হবে, আবার মুগীও?

—আজ ফিষ্টি করতে এলাম তো। বাবা টাকা দিয়ে দিয়েছে!

রেবা দরজায় এসে দাঁড়িয়েছে। মুখের ভাব এখনো কাঠ-কাঠ। গোমরা মুখেই বলল—তোমার কেবল খাওয়া দিদি? সেই জন্যই মুটিয়ে যাচ্ছিস।

দয়ার মুখের হাসি শুকোয় না, গলায় হাসির গুরু গুরু শব্দ তুলে বলে—মোটো মানুষদের ধাত ঠাণ্ডা। আমার তোমার মতো মেজাজ খারাপ হয় না রেবা, নতুন বৌদিকে দেখতে এসেছিস, একটু হাসবি তো!

—হাসার কী?

—তোমার হাসি আসেই না। মোটারা হাসতে পারে। বলে বনলতার দিকে ফিরে বলল—এই বৌদি কাপড়-টাপড় দাও! পোশাকী শাড়ি পরে তোমার রান্নাঘরের কালিবুলি মাখবো নাকি?

বনলতা দুবোনকে আটপৌড়ে শাড়ি বের করে দিল!

সোমনাথ—জগন্নাথের ভাই গেল দোকানে, ডিম, মাংস দৈ কিনতে। কাপড় বদলে দুই বোন রান্নাঘরের দখল নিল।

বনলতার ক্লান্তি লাগছিল। জলটোকির ওপর বসে সে দরজার পাটে

মাথাটা হেলিয়ে রেখে বলল—তোমরা এ বাসায় প্রথম এলে, আজ না হয় আমিই রাঁধি।

দয়া মাথা নাড়ল—সে হবে না। আমরা জানি তুমি বড়লোকের আদুরে মেয়ে, সংসারে খাটাখাটনির অভ্যাস নেই। নতুন সংসারে এসে তোমাকে খুব খাটতে হচ্ছে। মা তাই পৈ পৈ করে বলে দিয়েছে আজ যেন নতুন বৌ রান্না না করে। বড়জোর পানটান সেজে, জল গড়িয়ে দিও কিংবা স্টোভে একটু চা করতে পারো।

জগন্নাথ নিজের পরিবারের গল্প কখনো বলত তার কাছে করে না, তবে বলত জানে, খুব গরীব ঘরে জগন্নাথ মানুষ হয়েছে। পাটিশনের পর তারা যখন এদেশে আসে তখন প্রায় ভিথিরিদ্দা। সেই থেকে আস্তে আস্তে তারা দাঁড়িয়েছে। জগন্নাথের বাবা একটা দোকান করে। জগন্নাথ তখনো তার মাইনের মোটা অংশ মাস পয়লায় বাবার হাতে দিয়ে আসে। এখনো কষ্টেই চলে জগন্নাথের সংসার।

দয়া সেই কথাই বলছিল—বৌদি, খরচ করাই দেখে ভেবো না যে আমরা বড়লোক। অনেক হিসেব টিসেব করে আমাদের চালাতে হয়।

বনলতা ক্লান্ত গলায় বলে—জানি দয়া।

রেবা আলুর খোসা ছাড়তে ছাড়তে হঠাৎ আবেগহীন গলায় বলল—দাদা আলাদা হওয়াতেই যত গণ্ডগোল। নইলে আমরা ভালই ছিলাম।

বেফাঁস কথা। দয়া তাড়াতাড়ি বলল—বাঃ, আলাদা হবে না তো কী? আমাদের একটুখানি বাসা।

রেবা তবু জেদি গলায় বলে—দাদার তো বিয়ে করার প্ল্যান ছিল না এখন। সোমনাথ দাঁড়ালে তবে বিয়ে করার কথা। অন্তত একটা বোনের বিয়েও দেওয়া উচিত ছিল।

দয়া বলে—বাঃ, তা করতে গেলে বয়স বয়ে যাবে না? পাকা চুলে টোপের পরবে নাকি?

রেবা সোজা বনলতার দিকে তাকিয়ে বলল—কত কষ্ট করে আমাদের বিয়ের জন্য দাদা টাকা জমাচ্ছিল। হট করে নিজে বিয়ে করে বসল। দাদা কীরকম যেন হয়ে গেছে।

বনলতা জোর করে একটু হাসল। সংসার সম্পর্কে তার অভিজ্ঞতা কম, তবে সংসারে এসবই হয়। আঘাত প্রত্যাঘাত। সে জবাব দিল—মানুষ

তো বদলায়।

—তাই দেখছি।

—আমি গুণ করেছি রেবা। বনলতা আবার বলল।

রেবা উত্তর দিল না। কিন্তু দয়া খুব হাসল। বলল—গুণ করবে না তো কী? আমি আমার বরকে কেমন গুণ করি দেখো।

সে কথায় কেউ হাসল না।

রেবা বলল—আলাদা সংসারের খরচ কি কম? এই ফ্ল্যাটটারই তো কত ভাড়া! তার ওপর নতুন ফার্ণিচার, বিছানা—বালিশ কাপড়—চোপড়—

—দয়া বলে—তুই এত হিসেবী জানতাম না তো রেবা। তবে কেন তুই সিনেমা দেখিস, পুজোর সময়ে কেন গতবারে পিওর সিঙ্ক নিলি জোর করে?

—তুই চুপ কর দিদি!

—ওর কথা ধোরো না বৌদি। ভীষণ ঝগড়াটে! বলে দয়া।

বনলতাকে কোনো আঘাতই তেমন আঘাত করে না। সে ক্লান্ত মাথাটা তেমনি দরজায় হেলিয়ে রেখে বলে—বিয়ের আগে তোমার দাদার এসব হিসেব করা উচিত ছিল।

—ছিলই তো। সেই জন্যই তো বললাম, দাদা কীরকম যেন হয়ে গেছে।

—তুই চুপ কর রেবা। অত চ্যাটাং চ্যাটাং কথা বলিস না! দাদা শুনলে কি ভাববে?

—দাদার শোনাই উচিত!

বনলতা উঠে বলল—দয়া, আমি দশ মিনিট একটু শুয়ে থেকে আসছি। বড্ড মাথা ধরেছে।

দয়া ব্যগ্র হয়ে বলে—আমি সঙ্গে আসবো, টিপে দেবো একটু মাথাটা?

—না। একটু শুয়ে থাকলেই সেরে যাবে। কিছু দরকার হলে ডেকো।

—কিছু দরকার হবে না। আমরা সব খুঁজে পেতে নেবো। তুমি বরং মাথা ধরা সারলে নতুন শাড়িটা পোরো।

রেবা হঠাৎ মুখ তুলে বলে—বৌদি, শোওয়ার ঘরে আর একটা বিছানা কার? কেউ এসেছে তোমাদের বাড়িতে?

—না, বনলতা উত্তর দিল, আমরা আলাদা শুই।

—আলাদা শোও? ভারী অবাক হয় রেবা।

দয়া বলে—আলাদা শোওয়াই আজকাল ফ্যাশান।

শোওয়ার ঘরে এসে বনলতা দেখল, জগন্নাথ তেমনি বসে আছে আধাশোয়া হয়ে! খবরের কাগজ সামনে খোলা, কিন্তু সেদিকে মন নেই। অন্যমনস্ক ভাবে জানালার বাইরে আকাশের দিকে চেয়ে মাথায় লম্বা অবিনাস্ত চুলে আঙুল ডুবিয়ে বিলি কাটছে। বনলতার হাতের বাউন্টি দুটো বজ্র শব্দ করে, সেই শব্দে জগন্নাথ ফিরে তাকাল, চোখে চোখ।

—ওরা কি আজ থাকবে নাকি? জগন্নাথ জিজ্ঞেস করে।

—হঁ।

জগন্নাথ হঠাৎ বাঁঝালো গলায় বলে—যত ঝামেলা! হঠাৎ এভাবে ওদের আসার কি দরকার ছিল?

—তুমিই ওদের জিজ্ঞেস করো।

—কেন এসেছে তা তোমাকে বলেনি?

—বলেছে, ফিষ্টি করতে এসেছে।

—কেন, এটা কি বোটানিক্যাল গার্ডেন নাকি যে ফিষ্টি করতে এসেছে?

বনলতা একটু অবাক হয়ে যায়। জগন্নাথের সঙ্গে তার পরিবারের সম্পর্ক যে এতটা তেতো তা সে আন্দাজ করেনি। সেই তিক্ততার কারণ সে নিজেই কিনা তাই বা কে জানে। বনলতা কোনো উত্তর দিল না। খাটের বিছানায় বেডকভার পাতা। নির্ভাজ সুন্দর বিছানাটার গিয়ে শুয়ে পড়ল।

জগন্নাথের দেশলাই জ্বালাবার শব্দ হয়। সিগারেটের সুন্দর গন্ধটি পায় বনলতা। উপুড় হয়ে শোয়া সে, দুহাতের মধ্যে ঢাকা তার মুখখানা। বনলতার চোখ জলে ভেসে যাচ্ছে আপনা থেকেই।

জগন্নাথ অনেকক্ষণ বাদে বলল—ঐ যে ছোটোজন, রেবা, ও সব লক্ষ্য করে যাচ্ছে। গিয়ে মাকে লাগাবে। বিছু একটি।

বনলতা চুপ করে রইল। শোয়ার ঘরে দুটো আলাদা বিছানায় তারা দুজন আধাশোয়া হয়ে বা শুয়ে আছে। তবু মনে দুস্তর এক সামুদ্রিক জলরাশির দূরত্বে তারা দুই চলিষ্ণু জলযান, যাদের পথ বিপরীতমুখী। এখন এই বিছানা থেকে ইচ্ছে করলে রুমাল নেড়ে জগন্নাথকে বিদায় জানানো যেতে পারে।

একটি হাত নরম ভাবে বনলতার মাথা স্পর্শ করে। একটু বিম্ব ধরে থাকে বনলতা। না, জগন্নাথ নয়। এতটা সাহস জগন্নাথের আর নেই।

—বৌদি!

কার গলা তা ঠিক বুঝতে পারে না বনলতা। তবে স্বরের নম্রতা আর আন্তরিকতা শুনে অনুমান করে দয়া।

—উম্ ! উত্তর দেয় সে।

—কড়া করে চা করে এনেছি। খাও।

—খাবো না। চা আমি বেশী খাই না। বনলতা মাথা না তুলেই বলে।

—ওঠোনা বৌদি ভাই! তুমি রাগ করেছে।

কারো সামনে চোখের জল মোছা বড্ড মুশ্কিল। তাই সহসা বনলতা মুখ তুলতে পারছিল না।

—বৌদিভাই, ওঠো।

স্থলিত আঁচল চোখের কোলে চেপে জলটা মুছে বনলতা উঠে বসে। তারপর অবাক হয়। চা করে এনেছে, দয়া নয়, রেবা। মুখের রুম্ব ভাবটা যেন বৃষ্টিতে ধুয়ে কমনীয় হয়ে গেছে মেয়েটার। অকপট চোখে বনলতার দিকে একটু চেয়ে থেকে হঠাৎ গলা নামিয়ে ফিস্ ফিস্ করে বলে—কাঁদছিলে?

—না। ব্যথায় চোখে জল এসেছিল।

বনলতার হাতে চায়ের কাপটা দেয় রেবা। পাশে বসে। তারপর বনলতার বাঁ হাতখানা হাতে তুলে নিয়ে তেমনি চাপা গলায় বলে—আমার মাথার অনেকগুলো জু টিলে আছে। সবাই আমাকে পাগল বলে। আমার কথায় কেউ কিছু মনে করে না।

বলে হাসল। ওর সামনের দুই দাঁতের মাঝখানে একটু পোকায় খাওয়া কালো দাগ। তবু হাসিটি যে কত সুন্দর তা এই প্রথম বোঝা গেল। সে আবার ফিস্ ফিস্ করে বলল—আমাদের বাড়িতে একমাত্র বাবা ছাড়া কেউ আমাকে দেখতে পারে না।

—কেন?

—ঐ যে, বড্ড কথা শোনাই সবাইকে। তেমনি ফিস্ ফিস্ করে বলে রেবা। বনলতার হাতখানা দুহাতের চেটোয় ময়দা মাথার মতো পিষতে পিষতে সে তেমনি চাপা গলায় বলল—আমার কথা ধরতে নেই বৌদিভাই। তুমি কেঁদেছো বলে আমারও কান্না পাচ্ছে। চলো তো বাইরের ঘরে যাই, এখানে কথা হয় না।

বনলতা চুপ করে থাকে। চায়ে চুমুক দিয়ে তেতো মিষ্টি স্বাদটা অনুভব করে। জগন্নাথ তেমনি পাথরের মতো বসে আছে। বাইরে চোখ। বনলতা আর জগন্নাথের সম্পর্কের ব্যবধান যে কোনো বাইরের লোক তাদের বসবার ভঙ্গী থেকেই ধরে ফেলতে পারে। বনলতা ওঠে, বলে—চলো।

তারা বাইরের ঘরে এসে বসে। বড় বেতের সোফায়, পাশাপাশি।

আর হাতটা ধরে থেকেই রেবা বলে—সামনের মাস থেকে তুমি কি আমাদের বাড়িতে থাকবে?

বনলতা প্রশ্নটা বুঝতে না পেরে বলে—তার মানে?

—মানে আবার কী! সামনের মাস থেকে তো তোমাকে কোথাও গিয়ে থাকতেই হবে! হয় আমাদের বাড়ি নয়তো তোমার বাপের বাড়ি।

কেন?

—বাঃ তবে কি এ বাসায় তুমি একা থাকবে? দাদা যে চলে যাচ্ছে!

বনলতার হঠাৎ শীত করে বুঝি!

প্রশ্ন করে—কোথায়?

—তুমি আচ্ছা হাবা মেয়ে তো! দাদা ভিসা পেয়ে গেছে, এখন চলে যাবে না বিলেতে!

—ভিসা পেয়ে গেছে? বলে বনলতা একটু চেয়ে থাকে।

রেবা একটু সন্দেহের চোখে বনলতার দিকে চেয়ে থেকে বলে—কেন বৌদি, তুমি কিছু জানো না?

বনলতা সামলানোর চেষ্টা করে। বলে, জানি।

—তবে ওরকম করছো কেন? যেন কিছু জানো না।

বনলতা চুপ করে থাকে।

রেবা তেমনি তার হাতখানা নিয়ে খেলা করতে করতে বলে—তুমি যদি বাপের বাড়ি থাকতে চাও তো আলাদা কথা। কিন্তু আমাদের খুব ইচ্ছে, তুমি আমাদের কাছে থাকো। একটু অসুবিধে হবে তোমার, কিন্তু দেখো আমরা তোমাকে নিয়ে খুব হুল্লোড় করব। সময়টা কেটে যাবে হু-হু করে। আমাকে যতটা খারাপ ভাবছো ততটা নই গো। তোমাকে খুব ভালবাসবো। থাকবে আমাদের কাছে?

বনলতা আনন্দে ধীরে চা খেতে খেতে পা দোলায়। হঠাৎ তার ভার বুকখানা হালকা লাগতে থাকে। বন্ধ ঘরে হঠাৎ যেন হাওয়া বাতাস খেলা করে যায়। বনলতা টের পায়, অদূরে তার মুক্তি।

সে হেসে বলে—দেখি। এখনো কিছু ভাবিনি।

—তুমিও একটা পাগল। আমার মতো। তারপর গলাটা আরো নামিয়ে রেবা কানের কাছে নিয়ে এসে বলে—কবে থেকে চলছে?

—কী?

—তোমাদের ঝগড়া!

—যাঃ, ঝগড়া কোথায়?

—তোমরা বড় ছেলমানুষ বৌদি, সকলেরই ঝগড়া হয় কিন্তু বাইরের লোক এলে তারা ঝগড়াটা ঢাকা দিয়ে রাখে। তোমাদের ঝগড়া একটা বাচ্চাও বুঝতে পারে। বলোনা কবে থেকে?

পা দোলাতে দোলাতেই বনলতা বলে—ঝগড়া নয় রেবা।

—গুল দিও না। নইলে ভিসার কথা তুমি জানো না কেন?

—জানতাম। খেয়াল ছিল না।

রেবা হাসে—খেয়াল ছিল না? বর তিনচার বছরের মেয়াদে পাঁচ হাজার মাইল দূরে চলে যাচ্ছে, আর তোমার খেয়াল ছিল না! তাহলে বলো, তুমি আমার দাদাকে ভালোবাসো না।

—কে জানে ভালবাসা-টাসা আমি বুঝি না।

—বোঝো না তো বিয়ে করেছিলে কেন? ইয়াকী!

বনলতা হঠাৎ গলায় একটা গুড় গুড় শব্দ তুলে বাচ্চার মতো দুষ্ট হাসি হাসে। বলে—অ্যাডভেঞ্চার করে দেখলাম।

রেবা হাসছিল। ক্ষীণ হাসিটা হঠাৎ গিলে ফেলে খুব সীরিয়াস গলায় বলল—বৌদি, একটা কথা বলব? কিছু মনে করো না।

—বলো না! জগন্নাথ ভিসা পেয়েছে, সামনের মাসে চলে যাবে, এই সংবাদটাই যেন হঠাৎ বনলতার সব ক্লাস্তি হরণ করে নেয়। মনটা ভারী ঝরঝরে লাগে। পা দোলাতে দোলাতে সে উৎসুক চোখে রেবার দিকে চেয়ে থাকে।

রেবা নিবিড়ভাবে বনলতার মুখের দিকে চেয়ে ছিল। চোখ না সরিয়েই বলল—তুমি এত সুন্দর যে তোমাকে যেমন তেমন ঘরে একদম মানায় না।

—ওটা বাজে কথা। আমি তেমন সুন্দরই নই।

রেবা হাতখানা জোরে চেপে ধরে বলে—বাজে কথা বোলো না। তুমিও জানো তুমি কেমন সুন্দর। আমার দাদার কিছু গ্ল্যামার নেই।

না চেহারা, না চাকুরিতে। উদ্বাস্ত কলোনীতে আমাদের বাড়ি। কী দেখে তুমি দাদার প্রেমে পড়লে বলো তো? আমি শুনেছি তোমার বাবা খুব বড়লোক! তোমার জন্য খুব ভাল পাত্রও পাওয়া গিয়েছিল। তুমি ফ্রাংকলি বলো তো, কেন দাদাকে বিয়ে করলে?

বনলতা তেমনি হাসতে থাকল।

রেবা জুঁককে বনলতার দিকে চেয়ে থেকে বলে—আমরা সবাই এই নিয়ে বাড়িতে আলোচনা করি। মা আর বাবা অবশ্য ভাবে, তাদের ছেলে মস্ত কেউকেটা, তাকে বিয়ে করে তুমি বর্তে গেছ। তাদের আপত্তি অবশ্য তুমি বামুনের মেয়ে বলে—সেই কারণেই তোমাকে মা ঘরে নিতে খুঁত খুঁত করে বলে—বামুনের মেয়ের প্রশ্রাম-টনাম নেওয়া যাবে না, এঁটো ছোঁয়া খাওয়ানো যাবে না,—এমন বৌ বাড়িতে এলে বড্ড অস্বস্তি।

কোনো কথাই বনলতাকে স্পর্শ করে না। সে হাসে।

রেবা একটা শ্বাস ফেলে—আমরা কিন্তু মা বাবার মতো ভাবি না। আমরা আলোচনা করি। কী দেখে তুমি দাদাকে বিয়ে করলে! কিছুতে আমাদের মাথায় আসে না! বলবে?

—বলবার মত কিছু নয়। নিজেকে আমি তেমন কিছু ভাবি না।

রেবা বলে—তোমার মাইরি খুব বড়লোকের ঘরে বিয়ে হলেই মানায়। কেবল সাজগোজ, আয়নায় মুখ দেখা, নানা কস্টমটিকস্, গাড়িতে করে মার্কেটিং—এই সবই তোমাকে মানায়। রান্নাঘরে বসে উনুন ধরানো, গেঞ্জী কাটা, বিয়ের সঙ্গে ক্যাচ ক্যাচ এসব তোমার কস্ম নয়।

বনলতা একটা চোরা শ্বাস টানল। বুকটা ফুলে উঠল অনেকটা।

রেবা মুখখানা গম্ভীর করে বলে—দাদা বড় হঠাৎ বিয়েটা করে ফেলল। ও যে কাউকে ভালবাসে তা কখনো টেরই পাইনি। মেয়েদের সঙ্গ পছন্দ করত না। একটা মেয়ে—বলেই সতর্ক হয়ে থেমে গেল রেবা।

বনলতা মাথা নেড়ে বলে—জানি। নীতা তো?

রেবা বুঁকে বলে—তুমি জানো?

—জানি। চিনিও। একদিন এসেছিল এখানে। বড় ভাল মেয়ে।

রেবা একটা দীর্ঘশ্বাস ছেড়ে বলে—খুব ভাল। আমাদের সকলের পছন্দ ছিল ওকে, কেবল দাদারই ছিল না। দাদা বলত, ও হ্যাংলা মেয়ে। দাদার পিছনে লোভীর মতো ঘুরত, দাদার তাই রাগ।

বনলতা হাসে খুব, বলে তবে যে বললে তোমার দাদার কোনো গ্লামার নেই! না থাকলে নীতা পিছু নিয়েছিল কেন?

—নীতা তো তোমার মতো নয়। সে সাধারণ ঘরের মেয়ে, তেমন সুন্দর টুন্দরও কিছু নয়। তার কাছে দাদা দেবতা। কিন্তু তুমি বৌদি, তোমার কথা আলাদা।

—ওসব কথা থাক রেবা, যা হবার হয়ে গেছে।

রেবা বনলতার হাতখানা তখনো ধরে রেখেছে। বলল—আমি বড্ড বেশী কথা বলি। সেই জন্য বকাও খাই। কিন্তু যা মনে আসে তা বলে না ফেলেও পারি না। এসব কথা বলা কি অন্যায় হল বৌদি?

—কী জানি ভাই! তবে প্রশ্রঙ্গটা ভাল লাগে না।

—তবে বলো তোমাদের ঝগড়া হল কী নিয়ে?

—ঝগড়া হয়নি, বিশ্বাস কর।

—তবে তোমরা দুজনে কেন গাল ফুলিয়ে আছো? কেন আলাদা বিছানায় শোও?

বনলতা একটু ইতস্তত করে বলল—সেটা হয়তো ভুল বোঝাবুঝি।

রেবা গম্ভীর মুখে বলে—আমার কি ভয় হয় জানো?

—কী?

—তোমাকে দেখে আমার কেবলই মনে হচ্ছে, এ যেন ঠিক জোড় মেলেনি। তোমাদের মধ্যে অনেক তফাৎ।

—হবে।

—বৌদি, তোমাদের খুব ভাব হোক, তোমরা দুজন দুজনকে খুব ভালবাসো।

বনলতা স্নান মুখে একটু ঠাট্টার চেষ্টা করে—ভালবাসারই তো বিয়ে!

—তাই তো ভয়!

—তাই তো ভয় মানে?

—ভালবাসার বিয়েকে আমি একদম বিশ্বাস করি না। ভালবাসাটা বড্ড পল্কা জিনিস।

বনলতা রেবার গালে ঠোঁসা দিয়ে বলে—জানলে কী করে?

—জানি। আজকাল সবাই সব জানে। আমি এ বয়সে দুটো লাভ অ্যাক্ফয়ার কাটিয়ে এসেছি।

—দুটো?

—দুটো।

বনলতা হালকা গলায় বলে—আর আমি একটাই কাটিয়ে আসতে পারলাম না!

রেবা নিম্পলক চোখে বনলতার মুখের দিকে চেয়ে থেকে বলে—একটা?

—একটা।

—ইস্ বৌদি, প্রেমের ব্যাপারে তোমার কোনো অভিজ্ঞতাই ছিল না, না?

—না রেবা।

—রেবা দুঃখিত মুখে আস্তে করে বলল—তাই।

—তাই কী?

—তাই বেছে নেওয়ার সুযোগ পাওনি।

বনলতা হঠাৎ বলল—তোমার দাদার সম্পর্কে তুমি এত হতাশ কেন?

—হতাশ! না, হতাশ হবো কেন? আমি শুধু দাদার স্ট্যাটাস আর পার্সোনালিটির তুলনা করছি তোমার সঙ্গে। মিলছে না।

বনলতা মনে মনে রেবাকে ভয় পাচ্ছিল। মেয়েটা গন্ধ পায়। বুদ্ধিও রাখে। হয়তো স্থির বুদ্ধি নয়, তবুও ওর অনুভূতি প্রখর।

হঠাৎ রেখা বনলতার দিকে চেয়ে একটা পরিষ্কার স্বচ্ছ হাসি হাসল। ঐ হাসিটা এতক্ষণের সব কথা কে ভাসিয়ে নিয়ে গেল যেন। আচমকা রেবা বলল— এইজন্যই আমি জীবনে কখনো সুখী হতে পারবো না, জানো?

—কী জন্য?

—আমি ভীষণ খুঁতখুঁতে। আর আমার ভীষণ বুদ্ধি। দুয়ে মিলে আমি মেয়ে হিসেবে ভীষণ বেমানান। কোনো পুরুষই আমার মনের মতো হয় না। এত বেশী খুঁতখুঁতে হওয়া ভাল নয়। তা ছাড়া আমি অনেক কিছু টের পাই যা আমার মা-বাবা-দাদা-দিদি কেউ টের পায় না।

—কী টের পাও?

রেবা গুচ্ছ হাসিটা মুখে রেখেই বলল—যেমন এখন টের পাচ্ছি, আমার কেমন যেন মনে হচ্ছে, তোমাকে বৌদি হিসেবে শেষ পর্বন্ত আমরা পাবো না। তুমি ঠিক তোমার জায়গায় ফিরে যাবে।

কেঁপে উঠল বনলতা! মেয়েটা রক্ত রাঙ্গুসে কথা বলে।

রেবা একটা শ্বাস ফেলল। বনলতার হাতটা খুব জোরে একবার চেপে ধরে ছেড়ে দিয়ে বলল—দাদা বিলেতে যাবে বলে তোমার একটুও দুঃখ হয়নি!

বনলতা অস্বস্তিতে উঠে দাঁড়িয়ে বলে—চলো রান্নাঘরে, দয়া একা পড়ে গেছে।

রেবা মুখ তুলে হাসল। হাসতেই থাকল।

দশ

দুদিন জোর বৃষ্টি নেমে শীত পড়ে গেল প্রায়। পূজোর এখনো বেশ দেবী, রাণাঘাটের আশেপাশে কুয়াশা নামে, শিশির পড়ে!

বৃষ্টিতে এবার পুকুর ভরে বিশ্বের পোলট্রির ভিতরে জল এসে গেল। মুর্গীর মস্তো খাঁচাটার তলায় এক কি দুই ইঞ্চি নীচেই জল। বাগানের দিকটায় পাঁচ লরী মাটি ফেলেছিল সে, পুরোনো মাটির রস কষ শুকিয়ে গেছে। গাছ-পালা তেমন বাড়ে না। একটা কবিরাজী কোম্পানীর সঙ্গে বন্দোবস্ত করেছিল বিশ্ব। কালমেঘ, কুলেখাড়া, বাসক, বুড়ো নিমের শেকড়, অমনি আরো নানা গাছগাছড়া সাপ্রাই দেবে। ভেষজের গাছ করলে লাভ বেশী। জমিও আর একটু বাড়ানোর ইচ্ছা ছিল। পোলট্রির পিছন দিকটায় একটা মজে-আসা মস্ত পুকুর, সেটার মালিক মুর্শিদাবাদের এক মুসলমান লোক। এখানে থাকে না। ফলে পুকুরের ধারে ধারে মাটি ফেলে আশে পাশের লোকরা একটু একটু করে এনক্রোচ করে নিচ্ছে। বিশ্বও করেছে খানিকটা। ভেষজ করতে গেলে এক লপ্তে অনেকটা জায়গা দরকার। বুড়ো মুসলমানটা মাঝে মাঝে তদারকীতে আসে, অসহায়ভাবে পুকুরটাকে ক্রমশঃ ছোটো হতে দেখা যায়। লোকে এমনিতেই জমি দখল করে নিচ্ছে, কাজেই কারো কেনার গরজ নেই। বুড়ো লোকটা বিক্রী করতে চেয়েছে অনেকবার পারেনি। বিশ্ব ঠিক করেছিল, এবার বুড়ো এলে কিছু থোক টাকা ধরে দিয়ে দশকাঠার মতো জমি নিয়ে হাসিল করবে। পুকুর বলে সস্তাও হবে, বুড়ো ফাঁদে পড়ে ছেড়েও দেবে। কারণ এমনিতেই বেহাত হচ্ছে। বৃষ্টির পর সেই পুকুরের অবস্থা দেখে একটু দমে গেল বিশ্ব। পাঁচ লরী মাটি বৃষ্টিতে ধুয়ে নিয়ে গেছে। পয়সাটা জলে গেল। মাছের চারা ছেড়েছিল কিছু, ভেসে গেছে।

সকালে বিশ্ব মুনিষ জন নিয়ে পুকুরটার ভিতরে জলে একটা বাঁধ ত্রি-৭

৯৭

দেওয়ার চেষ্টা করছিল। জলে কাদায় মাখামাখি অবস্থা তার। বাঁধ না দিলে তার ঘরের ভিত ডুবে যাবে এরপর। চারিদিক থেকে পুকুরে মাটি পড়ে পড়ে জল ফুলে উঠেছে। পাম্প করে জলটা বের করে দেওয়ার কথা কেউ ভাবেনি, নালা টালাও কেটে দেওয়া হয়নি। কাজেই পুকুরের জমা জল এখন বৃষ্টি পেলোই ফুলে উঠে চারিদিকে ভাসায়! এরকম চললে ভেবজের বাগান চুলোয় তো যাবেই, পোলট্রিও তুলে দিতে হবে।

সারা সকাল ভাঙা ইঁট, কাঠের কুঁদো, পুরোনো টিন এসব নানা জিনিস দিয়ে তুস্তুসে পচা কাদায় জলে একটা বাঁধ দেওয়ার বৃথা চেষ্টা করেছে সে। মূনিষরা হেসে আকুল। তারা বলে—পুরো পাড়টা বাঁধাবেন তবে তো। একটুখানি জামগায় বাঁধ তুললে জল আটকাবে না।

কোনক্রমে বাঁশের খোটা পুঁতে ইঁট ফেলে, টিন খাড়া করে একটা কিস্তুতাকার বাঁধ দাঁড় করিয়ে বিশু এসে হাত পা ধুঁছিল। দুটো মুগী বিমুনী ধরেছে। তাদের খাঁচা থেকে বের করে ফেলে রাখা হয়েছে। চালা ঘরে কেটে কেটে বাজারের হোটলে পাঠিয়ে দেবে। আর কটা মুগীর বিমুনী লাগতে পারে সেটা চিন্তা করতে করতে বিশু ঘরে এসে গামছা নিয়ে স্নানে বেরোতে যাবে, ঠিক সে সময় দরজায় দাঁড়িয়ে দেখল মেঘলা আকাশের নীচে ছাইরঙা আলোর চলতাতলায় রাস্তা দিয়ে একটি বাহরী মেয়ে আসছে। কমলা রঙের শাড়ি, গায়ে একটা বাটিকের কাজ করা খদ্দেরের চাদর, হাতে বেঁটে ছাতা। গাছপালার ভিতরে মুখটা দেখা যায় না, কিন্তু গাঁয়ের অসম্ভব ফর্সা রঙটা বিলিক দেয়।

বিশু এক লাফে বারান্দা থেকে নামল। সামনের ছোট জমিটা পার হয়ে গেট খুলে দুহাত ওপরে তুলে চেঁচিয়ে বলল—বনা!

বনলতা চারদিকে চাইছিল, বিশুকে দেখে হাসল একটু।

কর্তাকে নিয়ে এলি না?

বনলতা কাছাকাছি এসে জ্র কুঁচকে একটু দেখেই বলল—একেবারে গাঁইয়া হয়ে গেছিস!

—একেবারে!

—তোর মাছ আর হাঁস মুগী দেখতে এলাম।

বিশুর মাথা থেকে তেল গড়িয়ে নামছে, গায়েও তেলমাখা হাতের খাবড়া দেখা যাচ্ছে, ডলা মারার সময় পায়নি। ঘরে এনে বিছানায় বনলতাকে বসিয়ে বলল—বোস, দুটো ডুব মেরে আসি।

বনলতা দম নিয়ে বলল—বিশু, তিনটে তিরিশের গাড়িতে তুই আমার সঙ্গে কলকাতায় যাবি।

—কেন?

—কাজ আছে?

—কী কাজ?

—স্নান করে খেয়ে নে তড়াতাড়ি। বলছি।

বিশু বনলতার মুখখানা একপলক দেখে ঘাড় হেলিয়ে বলল—বনা, তোকে খুব হ্যাপী দেখাচ্ছে। কোনো খারাপ কিছু হয়নি যে-সে সম্পর্কে আমি সিওর।

—খারাপ কী হবে?

একটু দোনামোনো করে বিশু বলল—তোর সম্পর্কে কেবল খারাপ চিন্তা আসে। সেদিন তোর বাড়িতে গিয়ে তোকে ভাল দেখে আসিনি বনা।

বনলতা হাসছিল। বলল—খারাপের কী! ভালই আছি।

—না, তুই ভাল ছিলি না সেদিন, আজ তোকে ভাল দেখাচ্ছে।

—তুই ডুব দিয়ে আয়।

—তুই দুটো ভাত খাবি আমার সঙ্গে বনা? ডিমের ওমলেট করব, ভাল মাছ আছে খাবি?

বনলতা মাথা নাড়ে—না রে।

বিশু, মায়াময় চোখে তাকিয়ে বলে—তুই বরাবর কম খাস, কিছু খেতে চাস না কখনো।

—তুই যা তো।

বিশু গেল। আনন্দে সে শিস্ দিচ্ছিল। তার পায়ে এক আনন্দিত চঞ্চলতা। পুকুরের বাঁধ বা মুগীর বিমুনী রোগের কথা সে একদম ভুলে গেল। বাচ্চা যে ছেলোটা বিশুর সব কাজকর্ম করে সে ছিপ নিয়ে বসে ছিল পুকুরের ধারে। তার পিঠে দুই খাবড়া মেরে বিশু তুলে দিল। বলল—দৌড়ে যা, ঘরে এক দিদিমণি বসে আছে দেখবি, আমার বোন হয়। তাকে এক কাপ দুধ গরম করে দিবি। দুধ খেতে না চাইলে চা করে দিবি। যা।

ছেলোটা দৌড়োলো।

বিশু বাঁপ দিল জলে।

তিনটে তিরিশের গাড়িটা পেয়ে গেল তারা। রাণাঘাট লোকাল প্রায় ফাঁকই এ সময়। বিশু বনলতাকে জানালার খারে বসাল, চীনেবাদাম কিনে এনে দিল একরাশ। স্টেশনে চেনা লোক অনেক। গাঁ গঞ্জের লোক সব কৌতূহল চেপে রাখতে পারে না। জিজ্ঞেস করে— সঙ্গে উনি কে গো বিশুদা?

বিশু তার গরবী মুখখানা তুলে বলে—বোন হয়।

—তোমার তো তিনকূলে কেউ—

কথা শেষ হয় না, বিশু প্রায় ধমকে বলে—এইটুকু বেলা থেকে আমরা এক সঙ্গে মানুষ, রক্তের সম্পর্কের চেয়ে বড় সম্পর্ক।

তারপর চাপান সারের কথা আসে, পাম্পসেট ভাড়ার কথা আসে, অস্টেলিয়ান গো-বীজের কথা উঠে পড়ে। নানাজনের সঙ্গে এরকম ইন্টারভিউ দিতে দিতে গাড়ির ভেঁ বাজে। বিশু লাক্ষিয়ে গাড়িতে ওঠে। বনলতার পাশে বসতে বসতে তৃপ্ত মুখে বলে—সবাই চেনে আমাকে।

—তাই দেখছি। বলে বনলতা হাসে। চীনে বাদাম আঙুলের চাপে ভাঙতে পারে না বনলতা, দাঁতে কামড়ে ভাঙে।

দেখে বিশু ভ্রু কঁচকে বলে—কত জীবাণু থাকে খোসায়।

—তো তুই ভেঙে দে।

বিশু খোসা ছাড়িয়ে দিতে থাকে। বনলতা সম্মেহে ওর দিকে চেয়ে থেকে বলে—গাঁইয়া কোথাকার!

—কী কথা বলবি বলছিলি যে!

বনলতা, এতক্ষণে সব ভুলে ছিল। এবার মনে পড়ে গেল—বনলতা, জগন্নাথ, বিয়ে। সব। একটা শ্বাস ফেলে বলল—তেমন কিছু না। তুই আজ একবার বাবার কাছে যা।

—গিয়ে?

—তুই বলিস, বনলতা একবার দেখতে চায় আপনাকে! একবার একটু ক্ষণের জন্য।

বিশু উদাস মুখ করে যসে রইল একটু।

তারপর বলল—বলার কী! তুই সোজা বাড়িতে চল্ না। তাড়িয়ে তো দেবে না!

বনলতা মাথা নাড়ল—না। সে ভারী লজ্জা করবে আমার, তার ওপর প্রশারের রুগী, হঠাৎ আমাকে দেখে যদি কেউ ব্যস্ত হয়ে পড়ে?

—তা অবশ্য ঠিক কিন্তু তুই হঠাৎ বুড়োকে দেখতে চাস কেন?

—এমনিই। প্রায় রাত্তিরে আমি বাবাকে নিয়ে দুঃস্বপ্ন দেখি।

—স্বপ্নই।

বনলতা বাদাম খাওয়া বন্ধ করে বাইরের চলমান প্রকৃতির দিকে ঋনিক চেয়ে রইল। তারপর হাতের দলাপাকানো রুমাল তুলে চোখের ওপর চেপে ধরল একটু।

গলাটা ধরে গেছে, যখন কথা বলল তখন লক্ষ্য করল বিশু। বনলতা বলল—তাছাড়া আমি বার্ণপুরে একটা মাস্টারী নিয়ে চলে যাচ্ছি। সামনের মাসে জয়নিং ডেট। কলকাতার আর আসা হবে না।

বিশু চমকে বলে—কোথায় চলে যাচ্ছিস?

—বার্ণপুরে।

—কেন বনা?

—তোমাদের প্রফেসর বোস বিলেত চলে যাচ্ছে। একা আমি কোথায় থাকব। ওরা অবশ্য আমাকে শ্বশুর বাড়িতে নিয়ে যেতে চায়, গতকাল আমার শ্বশুর শাশুড়িও এসেছিল সেই কথা বলতে। কিন্তু আমি যাবো না।

—যাবি না কেন?

—এমনিই। বড় সংসারে থাকতে আমার ভাল লাগবে না। তার চেয়ে বাইরে মাস্টারী নিয়ে থাকতে ভালই লাগবে। হোস্টেলে ওরা জায়গা দেবে লিখেছে।

বিশু একটু ভেবে বলে—কাজটা ডেবেচিস্তে করেছিস তো?

বনলতা আশ্তে আশ্তে বলল—ভাবনা চিন্তা করার মতো মাথার জোর আর আমার নেই। কী করছি, ভাল না মন্দ কে জানে! আমার হয়ে জববান্ড তো আর কেউ নেই। কাজেই, যা ভাল বুঝছি করছি। যা হওয়ার তা হবে।

বিশু হঠাৎ সচেতন হয়ে বলে—কাকাবাবুর কাছেই ফিরে যা না বনা।

—বাবা আমাকে আর নেবে না।

—কে বলল—আমি গিয়ে রাজি করাবো। আজই।

বনলতা ম্লান হাসে—আমি বাবারই মেয়ে বিশু। জেদ আমারও কিছু কম নয়। বাবার কাছে আমি থাকব না। শুধু বলিস একবার দেখতে

চাই বাড়িতে ঢুকবোও না। বাবা বাইরের বারান্দায় দাঁড়িয়ে থাকবে, আমি নীচের রাস্তায় দাঁড়িয়ে দূর থেকে এক মিনিটের জন্য দেখে নেবো।

বিশুর চোখ ছলছল করছিল। সে বলল—কী সব বলছিস? অত নাটক করার দরকার নেই। চল আজই তোকে কাকার কাছে নিয়ে যাই।

—দূর বোকা! এতক্ষণ তবে কী বললাম তোকে? বাবা আমাদের দেখলেই উত্তেজনায় একটা কাণ্ড বাঁধিয়ে বসবে।

বলে বনলতা আবার চোখ চেপে ধরে রুমালে। কিছুক্ষণ কথা বলতে পারে না।

বিশু অপেক্ষা করে।

—তারপর এক সময় বলে—বোস সাহেবের সঙ্গে তোর কিছু হয়নি তো?

—কী হবে? কিছু হয়নি।

—বোস সাহেবের জন্য একদিন সব ছেড়েছুড়ে এলি, কাকাবাবুর কথা তখন তো ভাবিসনি বনা! আজ আবার কাকাবাবুর জন্য অস্থির হয়েছিস। তার মানে যার মুখ দেখে সব ভুলে ছিলি, তার মুখ এখন আর তোকে ভুলিয়ে রাখতে পারছে না।

বলে—তোকে যতটা গাঁহিয়া ভেবেছিলাম ততটা তুই নোস তো! কী সুন্দর সাজিয়ে গুছিয়ে কথা বলছিস!

—ইয়াকী দিস না বনা। আমি সিরিয়াসলি বলছি। বোস সাহেবের সঙ্গে তোর কিছু হয়নি তো?

—না রে! ভদ্রলোকদের মধ্যে ঝগড়াঝাঁটি হয় না। তাদের সম্পর্ক খুব ভদ্র থাকে, কেবল ভিতরে একটু সুইচ অফ হয়ে যায়। টেরও পাওয়া যায় না।

বিশু কথাটা না বুঝে তাকিয়ে রইল।

বনলতা জানালার ধারে মাথাটা হেলিয়ে বলে—অনেকটা ট্রেন জার্নি করেছে, আজ আর আমাদের বকাস না বিশু আমি একটু চোখ বুজে থাকি।

—থাক। বলে বিশু সাবধানে শাটার বন্ধ করে দিচ্ছিল!

—বন্ধ করছিস কেন?

—এ লাইনে মাঝে মাঝে চাষার ছেলেরা গাড়িতে পাথর ছুঁড়ে মারে। বনলতা স্নিগ্ধ হেসে চোখ বন্ধ করল।

শিয়ালদা থেকে দুজন আলাদা হয়ে গেল।

বিশু যাওয়ার সময় বলল—বড্ড নাটুকে ব্যাপার হয়ে যাচ্ছে রে। কাকাবাবুকে ঐ বারান্দায় দাঁড়ানোর কথা বলাটা যে কী শক্ত কাজ!

বনলতা হাসল, বলল—শক্ত কাজ বলেই তো তুই পারবি। তুই সোজা কাজ কবে পেরেছিস?

—তবু, বড্ড যাত্রার চণ্ডের ব্যাপার হয়ে যাবে। বরং তুই একদিন বাড়িতে আসতে চাস, সেই কথা বলে আসবো।

—না বিশু, আমি বাড়িতে ঢুকবো না।

বিশু হাসল, বলল—পাগল!

শীতের বেলা ধপ করে ফুরিয়ে যায়। শিয়ালদার জ্যাম পার হতে হতেই বিশুর সন্ধ্যা হয়ে গেল। যখন বনলতাদের বাড়িতে পৌঁছালো তখন অন্ধকার হয়ে এসেছে।

সিঁড়ি ভেঙে উপরতলায় এল। সদরটা খোলা। বোধহয় দরজা খুলে রেখে বাচ্চা ঢাকরটা কোথায় গেছে। ঘরে এল।

সামনের ঘর পার হয়ে বিশু ভিতর দিকটার ঘরে এল।

জানালার কাছে ইজিচেয়ার। তাতে আধশোয়া বসে আছেন বনলতার বাবা। আবছা দেখা যায়, আঙুলের ফাঁকে অন্যমনে ধরে থাকা সিগারেট পুড়ে যাচ্ছে। পাকিয়ে উঠছে ধোঁয়া।

বিশু ডাকল না। চেয়ে রইল। লোকটা এখন বনলতার কথা ভাবছে বোধহয়!

বিশু একটা দীর্ঘশ্বাস খুব নিঃশব্দে ছাড়ল। দৃশ্যটা দেখতে তার খুবই ভাল লাগে। বড্ড করুণ আর সুন্দর। দৃশ্যট্যা ভেঙে দিতে ইচ্ছে হয় না।

কিন্তু বিশুকে ফিরতে হবে। রাত আটটার ট্রেনটা ধরতে না পারলে বড্ড অসুবিধে। ঝিমুনি লাগা মুগী দুটোর ব্যবস্থা করে আসেনি। অনেক কাজ পড়ে আছে।

বিশু ইজিচেয়ারের পিছন দিকটায় হাত রেখে ডাকল—কাকাবাবু!

উনি চমকে মুখ ফেরালেন—কে?

—আমি বিশু।

—ও। কী খবর?

—ভালই। কেমন আছেন?

—খারাপ কী ?

বিশু হাসল।

—আজ অফিসে যাননি ?

—গিয়েছিলাম। কামাই বড় একটা করি না।

বিশু আর কথা খুঁজে পেল না।

বনলতার বাবাই আবার বলেন—কাল বেরিয়ে পড়ছি।

—কোথায় ? বিশু একটু অবাক হয়ে বলে।

—প্রথমে বেনারস। তারপর উত্তরে, হিমালয়ের দিকে। দিল্লী আগ্রা ঘুরে মাস দুই পরে ফিরবো, যদি বেঁচে থাকি।

—হঠাৎ বেরোচ্ছেন কেন !

—একা ভাল লাগে না।

—যাওয়ার আগে বনলতাকে একটা খবর দেবেন না ?

উনি মুখ তুলে অন্ধকারেই বিশুর দিকে তাকানোর চেষ্টা করে বললেন—তাকে জানানোর কী ? সে কী জানতে চায় ?

—চায় কাকাবাবু। বনলতা আপনার জন্য বড় কান্নাকাটি করে।

—তুই কি সেখানে বাস ?

—যাই।

—ঘরদোর কেমন দেখলি ? ভাল আছে ?

—আছে।

—তবে আর কী।

বলে উনি চুপ করে খানিকক্ষণ ভাবেন। তারপর মুখ তুলে বলেন—বিয়ের পর মেয়েরা যত তাড়াতাড়ি পর হয়ে যায় ততই ভাল। বাপের বাড়ির টান থাকলে মেয়েরা সুখী হয় না। বনার সঙ্গে কখনো দেখা হলে কথাটা আমি বলেছি বলে বলিস।

—বলব।

—সেই ছোকরাটা কি প্রফেসারী করে ? কেমন ছেলে ?

—ভালই।

—বনার সঙ্গে সম্পর্ক কেমন ?

—ভাল।

—তবে বনা কাঁদে কেন ? কাঁদতে বারণ করিস। বেশী কান্নাকাটি করলে ছোকরাটা হয়তো ভাববে বনার বাপের বাড়ির টান বেশী রয়ে

গেছে। পুরুষেরা চায় তাদের বৌ একেবারে তাদেরই হয়ে যাক।

—তাই কি হয় ? বনা আপনার কাছে একবার আসতে চায়।

—তার আর সময় কৈ—কাল বিকালে আমার গাড়ি।

—যদি অনুমতি দেন তো সকালে ওকে নিয়ে আসি। বাইরের রাস্তায় ও দাঁড়াবে, আপনি বারান্দা থেকে ওকে দেখা দেবেন।

উনি সঙ্কম্বে মুখ তুলে বলেন—বাড়িতে আসতে পারে। তবে কাল সারাদিন আমার অনেক কাজ। অফিসেও যেতে হবে।

—ওর বর বিলেত চলে যাচ্ছে। তিন-চার বছরের জন্য।

—বিলেত ! কেন ?

—ফর হায়ার স্টাডিজ।

উনি চুপ করে থাকেন। একটু পরে বলেন—বনা কোথায় থাকবে ? শ্বশুর বাড়িতে ? নাকি সেও সঙ্গে যাচ্ছে ?

—না। বনা চাকরি নিয়েছে বার্নপুরে, মাস্টারি।

উনি আবার চুপ করে থাকেন। তারপর বলেন—কৌশিকও বিলেত গিয়েছে।

—কে ?

—কৌশিক। ছেলেটার কথা প্রায়ই মনে পড়ে। বড় ভাল ছেলে ছিল।

—জগন্নাথও ভাল ছেলে !

উনি শ্বাস ছেড়ে বলেন—হবে। আজকাল ভাল ছেলেতে দুনিয়া ভরে যাচ্ছে। সবাই ভাল।

—বনাকে কি কাল আনবো ?

—না।

—কেন ?

—আমার সুন্দর মেয়েটাকে যদি একটু রোগা বা একটু বিমর্ষ দেখি তবে আমার মাথায় আগুন জ্বলে যাবে। তার চেয়ে না দেখাই ভাল। কষ্টটা প্রায় সয়ে এসেছে। এটাকে আবার বাড়তে দেওয়া ঠিক হবে না।

—আপনি কি এখনো একটুও ক্ষমা করেননি ?

উনি চুপ করে হাতের ওপর খুঁতনি রেখে সামনে চেয়ে রইলেন একটু। তারপর বললেন—আমি ক্ষমা করার কে ? বামুন কায়েতে বিয়ের

নিয়ম নেই, সেটা বহুযুগের প্রথা। সে বিয়ে ভাঙার অধিকার আমার নেই। কেউ যদি ভাঙে তাকে আমি ক্ষমা করার অধিকারীও নই। সে সমাজের কাছে অপরাধী। আমার ক্ষমায় কী যায় আসে ?

—নিয়মটা আজকাল সবাই ভাঙছে, ঘরে ঘরে হচ্ছে।

—নিয়মটা লোকে ভাঙছে, তবু নিয়মটা কিছু আছেই। পাল্টে যায়নি।
বিধান কি লোকের ইচ্ছেয় বদলায় ?

—বনা যদি সুখী হয় তবে ?

—বনাকে কি তুই সুখী দেখলি ?

বিশ্ব একটু ইতঃস্তত করে। বলে—সুখীই তো !

—তবে কাঁদে কেন ?

—সে আপনার জন্য।

—আমার জনাই বা কাঁদে কেন ? বাপের বাড়ির জন্য কোন মেয়ে দিনের পর দিন কাঁদে ? বরং বিয়ের পরই তারা কিছুদিন সুখে, স্বামীর আদর সোহাগ, নতুন সংসারে নতুন লোকজনের মেলামেশা—এসব তো বড় সুন্দর ব্যাপার। বনা তবে কাঁদে কেন ?

বিশ্ব চূপ করে থাকে।

উনি গভীর গলায় বলেন—বনা সুখী নয়।

বিশ্ব একটু চমকায়।

উনি আবার বলেন—কিন্তু সেটা আমার কাছ ছাড়া হয়ে আছে বলেও নয়। আমি সবই টের পাই।

বিশ্ব মেঝের ওপর অনেকক্ষণ বসে রইল।

বাচ্চা চাকরটা ফিরে এসেছে। বাইরের ঘরের বাতি জ্বাল। রান্নাঘরে টুকটাক শব্দ আসছে। দরজা বরাবর ওঘর থেকে একটা বাঁকা চৌকো আলো এসে এ ঘরে পড়েছে। তার ক্ষীণ আলোর আভাষ বিশ্ব দেখে কাকাবাবুর মুখকানা বড় উদাসীন, যেন বা পৃথিবীর সব প্রিয়জনের মুখ ভুলে যাওয়া এক বৈরাগ্য। প্রকৃত এক তীর্থধাত্রীর মতো দেখাচ্ছে তাঁকে।

বিশ্ব আচমকা জিজ্ঞেস করে—বনার কী হবে—কাকাবাবু ?

উনি তেমনি অচঞ্চল ভাবে বললেন—বিশ্ব, বনা কখনো সুখী হবে না।

—কেন ?

—ওর ভাগ্য। বড় বেশী আদরে মানুষ করেছি বলে ও একটু স্বেচ্ছাচারী

হয়েছিল। এখন কর্মফল ভোগ করছে। আমিও করছি। তুই মাঝে মাঝে ওকে দেখতে যাস।

—যাবো।

বিশ্ব উঠল। শরীরটা বড় ভার ভার লাগছে তার। মনটা অন্ধকার। একটু স্বর স্বর ডাব। বলল—চলি কাকাবাবু।

—আয়।

বনলতাকে একবার খবর দিয়ে গেলে হত, একবার ডাবল। তারপর ডাবল—থাক কিছুটা সময় বনলতা অপেক্ষাকৃত সুখে থাক। তারপর তো জানবেই।

এগারো

ঘর ফাঁকা, গতকাল বনলতা বার্নপুর চলে গেছে।

আসবাবপত্রগুলো জলের দরে বেচে দিয়েছে জগন্নাথ। কিন্তু বাসনপত্র বাড়িতে পাঠিয়ে দিয়েছে। জগন্নাথ মেঝেতে বিছানা পেতে শোয়। তার সূটকেস ট্রাটকেস সব গোছানো হয়ে গেছে। পরশুদিন দমদম থেকে তার প্লেন ছাড়বে। অপেক্ষা করা ছাড়া আর কিছু করার নেই। একদিন তাকে বাড়িতে থাকার জন্য মা বাবা বারবার বলেছিল। জগন্নাথ রাজি হয়নি। তার আর বনলতার সম্পর্ক নিয়ে পাছে কোনো প্রশ্ন ওঠে।

বনলতার কথা দীর্ঘ সময় ধরে মনে পড়ে।

দুপুরে ঘুমিয়ে উঠে জগন্নাথ সিগারেট ধরিয়ে আধশোয়া হয়ে বসে ছিল। ফাঁকা ঘরটা কী ভীষণ বিষন্ন লাগছে। রোদ-মরা আলোয় ঘরটায় ঘুলিয়ে উঠছে অন্ধকার। জগন্নাথ চেয়ে থাকে। অনেকদিন আগেকার একটা ঘটনা মনে পড়ে গেল।

সেদিন তারা সদ্য এক ঘরে প্রথম থাকে। এক বিছানায় দুজনের মধ্যে কোনো সংশয়ের লেশমাত্র ছিল না। কত এলোমেলো, পাগলাটে ভালবাসার কথা বলেছিল তারা। তারপর এসেছিল সেই সময় যখন তারা শরীরে শরীর দিয়েছিল। সেই প্রথম আনন্দময় উন্মোচনের মুহূর্তে, সুন্দর ক্ষণটিতে হঠাৎ বনলতা একটু অস্বুট চীৎকার করেছিল, ঠেলে সরিয়ে দিতে চেয়েছিল জগন্নাথকে। জগন্নাথ ঠিক বুঝতে পারেনি, কী হয়েছিল। সে ছাড়েনি। আর তখন হঠাৎ জগন্নাথকে চমকে দিয়ে বনলতা তার কোমরে একটা লাথি মেরেছিল, বলেছিল—এত পশু কেন তুমি ?

বড় অপ্রস্তুত হয়েছিল জগন্নাথ, অপমানে লজ্জায় উঠে বসে সে তাড়াতাড়ি তার শরীর ঢেকে বসে রইল। অনেকক্ষণ ধরে হাঁপিয়েছিল বনলতা। ঘামা মুখে ফ্যানের তলায় বসে উদভ্রান্তের মতো চেয়ে রইল সামনের দেওয়ালে। তারপর জল খেয়ে শান্ত হয়ে বলল—আমার এসব করতে যেমা হচ্ছে।

জগন্নাথ কথা বলেনি।

বনলতা হঠাৎ মুখ ঢেকে কেঁদে ফেলে বলল—ভীষণ নোংরা লাগছে, বুঝলে!

জগন্নাথ ভেবেছিল, অভিজ্ঞতার অভাব আর শৈশব থেকে লালিত সংস্কারই এর কারণ। সে বলেছিল এটা স্বাভাবিক ব্যাপার, এতে নোংরামীর কিছুনেই বনলতা।

বনলতা অনেকক্ষণ কেঁদে বলল—জানি। আমার কোনো গোঁড়ামী নেই। কিন্তু হঠাৎ ঐ সময়টা আমার ভিতরে কী যেন হচ্ছিল—

—কী?

—ঠিক বোঝাতে পারব না। কী একটা যেন ভেঙে চুরে যাচ্ছে, কারা যেন আমার ভিতর থেকে চীৎকার করে বলছে—একাজ করো না, এ মহাপাপ।

জগন্নাথ একটু হেসে বলেছিল—ওসব ভিশন। তোমার কল্পনা।

তারপর ধীরে ধীরে তারা ব্যাপারটা স্বাভাবিক করেছিল। বনলতা আর পাগলামি করত না।

কিন্তু বনলতার সেই লাথিটার কথা কোনোদিনই জগন্নাথ ভুলবে না।

আজ সেই ঘটনাটা বড় বড় হয়ে জগন্নাথের মনটাকে আচ্ছন্ন করল। সে ভাবতে লাগল, বনলতাকে সম্পূর্ণ পাওয়ার মুহূর্তে সেই রাড় প্রত্যাখ্যান। তারপর আবার তাকে নিয়েছিল বনলতা। নাকি সে ঠিক গ্রহণ নয়? তবে কি প্রতিটি রতিক্রিয়াই ছিল বনলতার আত্মবিসর্জন?

জগন্নাথ জেনে গেছে, বনলতার ঘরে তার ফেরা হবে না। ভাগ্য ভাল বনলতা আজও সন্তানসম্ভবা হয়নি। হলে ঝামেলা হত। বনলতার সঙ্গে প্রায় অকারণেই বোধ হয় তার ছাড়াছাড়ি হয়ে গেল, জন্মের শোধ। কিংবা অকারণেও নয়! গূঢ়নিহিত কোনো কারণ ছিলই যা বুঝতে অনেকদিন সময় লাগবে।

সহজে ফিরবে না জগন্নাথ। সে যাবে দূরে। আরো বহু দূরের নিকটে।

সেই সংস্কৃত শ্লোকটা তার কেবলই মনে পড়ে। হে অচ্যুত, দুই দলের মাঝখানে আমার রথ স্থাপন কর, আমি দেখি কিভাবে যোদ্ধবৃন্দ অবস্থান করছে, আজকের সমুদ্রত রণে কার সঙ্গে সঙ্গে আমার যুদ্ধ। অবশ্যস্তাবী এই শ্লোকের সঙ্গে অরিজিতের মুখখানা চোখের সামনে ভেসে ওঠে। গর ঠিকানায় অরিজিৎ, ভবঘুরে পৃথিবীর যুদ্ধক্ষেত্রে যে বেরিয়ে পড়েছিল।

জগন্নাথের সুখের আড়াল গেছে সরে। সামনে মহা পৃথিবী। অব্যবহৃত মানুষের সমাজ। ঘর ভাঙার দুঃখ থেকে থাকে। জগন্নাথ একবার সেই যুদ্ধক্ষেত্রে গিয়ে পঁড়াবে। মৃত্যুর আগে অন্তত এক মুহূর্তের জন্যেও সে নিজেকে সঠিক অনুভব করতে চায়।

সিগারেটটা ফেলে দিলে জগন্নাথ। হাসল একা একা। বড় ভাবপ্রবণ হয়ে যাচ্ছে সে। বয়স হচ্ছে না তোমার, জগন্নাথ! যে বয়সে লোকে ঘরে ফেরে সেই বয়সে ঘর ছাড়ার কথা কেউ ভাবে?

অরিজিৎ একটি মেয়েক পছন্দ করে এসেছে বনগাঁ থেকে। শীগগীরই বিয়ে। জগন্নাথ সাদা দেয়ালের দিকে মুখ করে শুয়ে রইল। মুখে একটু বিষণ্ণ হাসি। অরিজিৎ আর কখনো বেবিয়ে পড়বে না। কী আশ্চর্য! গৃহস্থ অরিজিতের কথা ভাবতে তাব বড় হাসি গায়।

জগন্নাথ ভাবতে লাগল। কখনো হাসল, কখনো গভীর আর বিষণ্ণ হয়ে গেল। তার মাথার ভিতর দিয়ে কখনো বনলতা, কখনো অরিজিৎ, কখনো সেই ফটোতে দেখা কৌশিক আর কত মুখ ভেসে যেতে লাগল।

বারো

একটা উড়োজাহাজের শব্দ কেন যে বারবার শোনে বনলতা। মাঝরাতে ঘুম ভেঙে উঠে বসে। ঠিক বুঝতে পারে না। কোথায় আছে। তাদের এনটালির বাড়িতে, না কি জগন্নাথের সঙ্গে পাইকপাড়ায়। বিমুনি কেটে গেলে খেয়াল হল, এটা হস্টেল, এটা বাণপুর। বর্ধমান জেলা।

ছেঁটে ঘরে দুটো বেড। অন্যটায় আর একজন মিসট্রেস থাকে। তাব বড় নিঃসাড় ঘুম।

উড়োজাহাজের শব্দটা ভাল করে শুনবার জন্য বনলতা জানালায় এসে দাঁড়ায়। বন্ধ পাল্লা দুটো খুলে শিকের ফাঁক দিয়ে মুখখানা বের করে দেয় যথাসম্ভব। শীত-হাওয়া এসে লাগে, ঠাণ্ডা লোহার শিক গাড়ে।

লেগে গাল কন্ কন্ করে। চোখে জল আসে। তবু প্রাণপণে কুয়াশার ভিতরে চেয়ে থাকে বনলতা। একটা উড়োজাহাজ অবিরল উড়ে যাচ্ছে, দূর থেকে দূরে। কিন্তু সে মিলিয়ে যায় না। শব্দটা কল্পনায় থেকে যায়! থাকে হৃদয় জুড়ে।

কাছাকাছি কোন নদী নেই। তবু বনলতা এই মাঝরাতে দোতলার জানালা খুললে টের পায় অদূরে এক নদী বয়ে যাচ্ছে। কী মিষ্টি তার ঝর্ণা ঝরা শব্দ! ওপারে একটা অন্ধকার দূর পৃথিবী। বনলতা তার এই জীবনে যত মানুষকে ভালবেসেছিল সবাই সেই ওপারে রয়েছে। একটু দূরে। কিন্তু ঠিক কেউ হারিয়ে যায়নি। ততদিন হারাবে না যতদিন উড়োজাহাজের শব্দটা তার থাকবে। মস্ত পৃথিবীটা তার প্রিয়জনদের টেনে নিয়ে গেছে।

বনলতা নিঃশব্দে সাবধানে আবার জানালা বন্ধ করে ফিরে আসে। শোয়। তারপর অবিরত জলধারায় ভাসে তার চোখ। উড়োজাহাজের ম্লান শব্দটাই তখন আস্তে আস্তে ঘুম পাড়াতে থাকে।
